

## **Aposel Agena Cabi Oc Aqunec Je**

Buk i, Aposel Agena Cabi Oc, eu Lukna Me Je tubdona. Luk buk iha jaqen. Buk ina Kis Gun uqa aposel jic dado madeceb age Jerusalem onodec Judiaca Sameriaca li hatuhatu cunugna dana cajaca Jisasnu me je qasali maadein (1.8 feiga) eunu Luk jaqen.

Buk Aposel i Jisasna tamanec eu Juda dana cajaca gemona sanan mimei eu hibna li dana cajaca age hatuhatu cunugna bilegina euna ben calen eunu dodo saena. Luk uqa cete ha ihacecnu gale dona. Eu Jisas Kraisna cabica, dana cajaca age Jisas todogina agena cobocca eu wele Anut uqa Isrel dana cajaca je hahun oso maaden eu ihoc lena eunu ihacena. (Age 2.14-36 feiga.) Buk Aposel i cete ben ononu saena, eu Kis Gun, Anutna Kis uqana cabi. Pentikos Deel Benna Kis Gun nime Jisasna malogomca bilen. (Age 2.1-4 feiga.) Odime Jisas Gun uqa Anutna gagadic odoc aposel adime uqa aposelna cisdoc gaid dado meceb age agena cabi oin.

Buk ina me je qasali madec cecelac mati nijia, age 2.14-41, 3.11-26, 4.8-12, 7.2-53, 10.34-48, 13.16-41, 17.22-31, 22.1-21, 24.10-21, 26.1-23, 28.23-28 feiga. Dana cajaca mati bahic age me je inu wawaga melec Jisasna tamanec ben calen.

Buk i aposel cunugnu saena, euqa aposel lecis odosinnu je mati saena, eu Pita Polca. Pita uqa aposel age Jisas gami coboin eundec oso. Pol uqa

casac Jisas qee toodol, uqa Jisasna cad oso bilen. Uqa Jisasna tamanec cilehadecnu cabi gagadic oloi. Euqa uqa Damaskas jicna Jisas gulucdon. Odocob uqa Jisasna aposel ben eundec oso calen.

Saen osona Luk uqa Polca jic cobosin. Buk ina cudun leihna Luk uqa Pol odonnu saena uqa egenu madena. (Age 16.10-17, 20.5-21.18, 27.1-28.16 feiga.) Eunu Luk uqa Pol cabi hijagul oso.

*Je Dunuhnu Dado Mec*

1. Pitana cabica Kristen tamanec sanan menca (dac 1-12)
  - A. Aposel age Jisasnu me je Judiaca, Galilica, Sameriaca euna qasali maadein (1.1-9.31)
    1. Aqunec je (1.1-2)
    2. Kraiseseli cajimei cabi on (1.3-11)
    3. Aposel age Kis Gun ocnu sumudein (1.12-26)
    4. Aposel age Kis Gun oin (dac 2)
    5. Pita Jonca ale dana jaih laleg mec me mudecebil age Pita Jonca gihacdoc jona malein (3.1-4.31)
    6. Kristen tamanec age agena ceteteh eu osoben utecebutec eb ein (4.32-5.11)
    7. Age aposel 12-pela gihacdoc jona madein (5.12-42)
    8. Age dana 7-pela age aposel cesuladecnu nesiladein (6.1-7)
    9. Juda dana age Stiwen cegulec amagana mudecebil je maadeceb age Stiwen meenna qocobil cal men (6.8-7.60)
    10. Wawaga meleec dana cajaca Jerusalemdec age bilisadu belein (8.1-4)
    11. Filip uqana cabi (8.5-40)

- a. Uqa Sameria hatuna cabi on (8.5-25)
- b. Uqa dana Itiopiadec me je madon (8.26-40)
- 12. Sol Jisasnu waug meleen (9.1-31)
- B. Aposel age Fonisia hatunaca, Saipras nuinaca, Antiok taunnaca me je qasali maaden (9.32-12.25; 11.19 feiga)
  - 1. Pita uqa Mediterenian Macas lanna cabi on (9.32-11.18)
    - a. Uqa Inias me mudimei Dokas cesuldon (9.32-43)
    - b. Uqa Koniliasna jona me je qasali maaden (10.1-11.18)
  - 2. Juda dana gee eundec tamanec Antiokna calen (11.19-30)
  - 3. Herod uqa Kristen tamanec me gee odadimei cal men (dac 12)
- 2. Pol uqana cabica, odocob Kristen Antiokdec Rom ono li ben fulusdon (dac 13-28)
  - A. Aposel age Frigia hatunaca, Galesia hatunaca me je qasali maaden (13.1-15.35; 16.6 feiga)
    - 1. Pol uqa me je maadecnu cabi cocobi hatu filfil nuen (dac 13-14)
    - 2. Tamanec uqana cegulec ben Jerusalem ono calen (15.1-35)
  - B. Pol uqa Masedonia hatuna macas leti nuen (15.36-21.16; 16.9 feiga)
    - 1. Pol uqana me je maadecnu cabi coboc lecisdod odon (15.36-18.22)
    - 2. Pol uqana me je maadecnu cabi coboc cijeddod odon (18.23-21.16)
  - C. Pol uqa Rom ono nuen (21.17-28.31; 28.14 feiga)

1. Age Jerusalem ono tempelna Pol hewudein (21.17-23.35)
  - a. Rom agena han dana Pol hewudein (21.17-22.29)
  - b. Pol Juda agena cegulec benna amagana je maaden (22.30-23.11)
  - c. Han dana ilo Pol suldocob uqa Sisaria taun ono nuen (23.12-35)
2. Pol gihacdoc jona Sisaria ono bilen (dac 24-26)
  - a. Pol uqa Filiks amegna je madon (dac 24)
  - b. Pol uqa Festas amegna je madon (25.1-12)
  - c. Pol uqa Festasca King Agripaca amalana je maalen (25.13-26.32)
3. Pol uqa macasna Rom nuen (27.1-28.15)
4. Pol uqa cabi gel lecisna Rom ono uqana jona gihacdoc bilen (28.16-31)

*Jisas uqa Kis Gun suldocob malogom ageca hugian ec maaden*

<sup>1</sup> O Tiofilas, ijana buk casac jaqem euna ceteh cunug Jisas odonca, iwaladenca saen uqa cabi sanan mennadec <sup>2</sup> hocob li Anut uqa Jisas ehudeceb enedec sao ohisna ten eunu jaqem. Uqa sao ohisna qee tec uqa Kis Gun odocna aposel\* dana uqa nesili cedaden eundec uqa je gatitina ulicaadi dado maden. <sup>3</sup> Saen uqa dain ben umei cal meceb li deel 40 hedocob uqa ceteteh ihacadeceb uqa cebac bilia ec doqagannu uqa uqana aposel eu amagana saen mati bahic camas men. Age uqa fefegin

---

\* **1:2:** Age je eu Matju 10.2na nijia eu feiga.

uqa Anutna culnu age gami togodoin. <sup>4-5</sup> Saen age uqaca gabandu bibileig uqa je i maaden, “Jon wana wa joaden qa deel osooso hedocob Anut age Kis Gunna wa joadigian. Eunu age Jerusalem cain culuwain. Ceteh me Memige Anut adigiannu maden maadem eu sumudi bileiga,” aden.

<sup>6</sup> Saen aposel age Jisas gami gabandu bibileig age sisildoin, “O Tibud, hina qila saen ina Isrel cul agena cofdoc haun ceseli Isrel adeganfo?” doin.†

<sup>7</sup> Odocob Jisas maaden, “Ceteh i cel saen cali hugian eu Memige Anut ebengulna odocob cali hugian. Age saen euna caligian ec docnu qee nijel. <sup>8</sup> Euqa saen Kis Gun ageca neceb age gagadic odocca biluqagan. Odocob age dana cajaca cunug ijanu je qasali maadoqagannu Jerusalem onodec Judiaca Sameriaca li hatuhatu cunug olom dani-gian,” aden.

### *Jisas sao jobon ceseli ten*

<sup>9</sup> Uqa je i madi hedumei Anut uqa ehudeceb sao jobon teten mecidu tawein. Oodogin ti taen dunuh li jebuc daneceb amagana haun qee felein.

<sup>10</sup> Age amaga uqa sao ten odi tatiein tatawegin mahuc odi dana lecis lotoc senenec himec tacimesi age cemenega ni tawimesi <sup>11</sup> maadesin, “Galilidec dana, age eetanu sao jobonna tatii ene tawegina? Jisas i Anut uqa ehudeceb enedec sao jobon teia uqa teten feiga odi ceseli tonigian,” adedin.

---

† **1:6:** Wele bahic Isrel age agena eundec oso uqa agena king biloloi. Euqa Jisasna saenna Rom age Isrel hatu cofdoin. Odocob Jisas calen saenna dana mati age uqa Rom ititacadime i Isrel cul haun sanan migian ec cisdoin.

*Dana oso Judasna cabi ugiannu age nesildoin*

<sup>12</sup> Odocob aposel age Oliw Aluh eunadec haun ceseli Jerusalem belein. Eu Jerusalem taundec hocnu eu nag bahuca qee, eu kilomita osol odi.

<sup>13</sup> Age taun benna limeig jo hamol ohis age ni-joloigna tein. Aposel eu age ijanaga odi, Pita, Jon, Jems, Andruca, Filip, Tomasca, Batolomju, Matjuca, Jems, uqa Alfias melah, uqaca, Saimon, uqa Selot<sup>†</sup> dana, uqaca, odocob Judas, uqa Jems melah uqaca. <sup>14</sup> Aposel ageca, caja age Jisas toodoloig ageca, Maria Jisas anagca, uqa waliagulca age cunug inondoqagannu wawaga osolca gaid ceguloloig.

<sup>15</sup> Deel osooso hedocob euna wawaga meleec cotogail 120 odi cegulein. Odocob Pita je maadi-giannu caji tawen. <sup>16</sup> Uqa maaden, “O cotiel, je oso eu Anutna jagec je weledecna nijia. Wele bahic Kis Gun odocob Dewid uqa je oso Judasnu maden. Judas uqa Jisasna cad jic dado madimej uqa age ebenegana Jisas mudigian eunu je maden. Odocob je i wele aig qon. <sup>17</sup> Ge, Judas uqa egena eundec oso eunu uqa egena cabina cabi oso muguh mein,” aden.

<sup>18</sup> “Judas uqana cabi oc me qeenu meen qaig on eu maha oso fajen. Euna uqa toni qocob cal men. Uqa big fugudocob big anag maliogca cunug basecdon. <sup>19</sup> Odocob dana cajaca cunug Jerusalem bilein eu dah mimeig age agena jena maha eu ‘Akeldama’ ein. Uqana gug eu odi ‘Golac Maha,’” aden.

---

<sup>†</sup> **1:13:** Selot agena am age Juda dana eu Rom dana Judiadec ititacadcenu ein.

20 “Ge, Buk Songna je oso age jaqein eu odi madena:

‘Uqana bilec gauc nijiale.

Dana oso euna qee biliaun,’ ena. (*Buk Song 69.25*)

Odocob je oso ha edi madena:

‘Uqana cabi cudun eu oso oiale,’ ena,” aden. (*Buk Song 109.8*)

21 “Eunu egenadec dana oso uqa Jisas Tibud cal mecnadec ceseli cajen eu fen uqa ege gami gabandoc bilom dana i uqa nesili ehudecnu. Uqa saen cunug Jisas Tibud ege gami cobom, 22 saen hahawan Jon uqa wa joadecnu je maaaden li deel Jisas uqa egecadec ehudi sao jobonna ehi ten eu gadac. Odocob dana i uqa egeca gami Jisas cal mecnadec ceseli cajennu je qasali maadec cabi oqale,” aden.

23 Eunu age dana lecis ijanala madein, Josef uqa Basabas doloig, uqa ijan oso ha Jastas doloig, Mataiasca. 24-25 Odimeig age inondu madoin, “O Tibud, hina cunug agena cisdoc dogona eunu dana lecis i alenadec in eu uqa aposel cabi cudun Judas uqa cuculi uqana gucna nuen eu ugiannu hina nesili ehudem ege ihacgaga,” doin. 26 Odimeig age ijanala meen lecis jaqimeig hal oso tacimeig lahidocobil meen oso toni non. Mataias ijan calen. Uqa ageca gabanadeceb uqa aposel bilec 11-pela odi age gami bilein. §

---

§ 1:26: Age Anut uqa dana oso nesili ehudeceb uqa Judas Iskariotna cudun ocnu gale aden. Eu Juda agena kobol age wele odi odoloig. Age 1 Stori 26.13-16 feiga.

## 2

### *Kis Gun nen*

<sup>1</sup> Saen Pentikos Deel Ben cali hon euna\* age cunug cudun osolna ceguli bilein. <sup>2</sup> Odocob saen nag bahic odi udududoc sao jobondec fufu ben bahic fuludoc cinigwe nimei jo hamol bileinna eu cunug ihoc len. <sup>3</sup> Odocob age ja belican cinigwe cagucagu dana filfil ilomogana taldu ninijen fein. <sup>4</sup> Kis Gun nimei dana ono bilein eu dewenegana cunug ihoc len. Age cunug beilamaga falicdocob je filfil madecnu Kis Gun ihoc cesuladen eu odi madein.

<sup>5</sup> Odocob saen euna Juda dana leih Jerusalem ono bilein. Age cuha fecnu dana ititom hatu filfil-nadec cegulein. <sup>6</sup> Saen age hutan eu dah mimeig dana am ben cegulein. Age osolosol je madec gug filfil mamadegin dah madeinnu age cunug dadanein. <sup>7</sup> Tumatumaeig wawaga cacaden madein, “Dana je madegina i age cunug Galilidec. <sup>8</sup> Euqa ege cunug egena je gul mamadegin egedodoc ihoc dah madoqona eu adi? <sup>9</sup> Ege Patiadec, Midiadec, Ilamdecca. Ege Mesopotemiadec, Judiadec, Kapadosiadecca. Ege Pontasdec, Esiadecca. <sup>10</sup> Frisiadec Pamfiliadecca, Isipdec, Libia hatuna Sairini cemenugca. Ege leih Romdec dana. <sup>11</sup> Ege leih eu Juda dana bahic, ege leih eu Juda dana ibuldom. Ege Krit nuidec Arebiadecca. Euqa ege cunug egena je gulna Anutna gagadic odocnu dah moqona!” ein. <sup>12</sup> Odocob age cunug wawaga

---

\* **2:1:** “Pentikos Deel Ben” eu “Cabinadec Sab Ocnu Ceelec Deel Ben” ijan oso. Age Wok Pris 23.15-22 feiga. Deel ben i Pasowa Sab Jec Ben Deel caleceb deel 50 hedocob eu calen.



cacaden dadanecca sisildocobsisildocobein, “I eu cel gugnu?” ein. <sup>13</sup> Euqa leih age dana wawaga meleec eundecnu lelanec je madein, “Dana i age ceu tinca jecebil dalul aqeia!” ein.

### *Pita je maaden*

<sup>14</sup> Oodonqa Pita uqa aposel 11-pela gami caji tawimeig seeci dana am ben ninijen maaden, “Cotiel, Juda dana age, cunug Jerusalem bilegina ageca cehna ija dah mimatebil i cel gugnu ceteh i calena eu maadigen. <sup>15</sup> Age dana i age eu dalul aqeia ec cisdogina. Euqa qila i 9 kilok qasil himec. Eunu dana i age eu dalul qee aqel.† <sup>16</sup> Euqa ceteh i caleia eunu je hahun madec dana, Joel, wele maden:

<sup>17</sup> Anut madena, “Deel cit qocna ija ijana Kis dana cajaca cunugna basecdocomin nugian. Age melemegail atagailca je hahun madec danawe ijana me je madoqagan.

Agena dana haunhaun eu age majaudocnu foqagan.

Agena dana toiatoia age bebecna foqagan.

<sup>18</sup> Mele, ijana cabi dana cajaca ha ijana Kis deel eunu agena basecdocomin neceb age je hahun madec danawe ijana me je madoqagan.

<sup>19</sup> Ija gaga odoc sao ohisnaca, kobolkobol odoc mahanaca odigen.

Saen euna golacca, jaca, ja casuc benca caloqagan

<sup>20</sup> Tibudna deel ben eu camasac migiannu dodoldodob casac cam eu tu ibuldugian.

---

† 2:15: Juda age qasil bahicna sab waca qee joloig. Eunu Pita uqa je i maden.

Odocob jagel eu golacwe golca ibuldugian.

21 Odocob saen euna dana oso uqa Tibud ijanna utadocobfi Tibud uqa dana eu caha-hadugian,” ena,’ en,” aden. *(Joel 2.28-32)*

22 “Isrel dana, je i dah meigale! Jisas Nasaret-dec, Anut uqa dana i nesili ehuden, uqana gadac eu odi. Age gemo uqa gagadic odoc mati odon, uqa kobolkobol odoc ha mati odon, uqa gaga odoc mati ihacaden. Eu Anut uqa Jisas ebenna age gemo odi odon agedodoc dogina. 23 Age Jisas i uqa dana age Mosesna loo je bisalu qee bilegina eu ebenegana mudecebil age na babalecna tuitu qocobil cal men eunu Anut uqa wele don, Anut uqa wele eunu cois maden. 24 Euqa cal mec uqa gihacdocwe qee. Cal mec† uqana gagadic odoc qee mudimei haun ehuden. Eunu Anut cal mecnadec haun tulidocob cajen. 25 Euha Dewid uqa Jisasnu maden:

‘Ija dugina, Tibud uqa ijaca gaid bilina. Uqa ija ebeni meulana isec bilina eunu culumen oso ijaca hocobfi ija qee qeleligaun, qee cucuiigaun.

26-27 Eunu ija wawi celeboen. Ija conina ceelec je madem.

Anut hina ija doloni cal mecna\$ qee culdugaun.

Hinana cabi dana gun eu hina culdocom uqa deweg qee huluoiaun.

Eunu ija cal mec dana qa ija jaen mudecnu gaid wawi madena odi.

---

† 2:24: Grik je i bahic eu “oloqanih” § 2:26-27: Grik je i bahic eu “oloqanihna”

28 Hina cebac coboc jic wele ihactem.

Odocob saen hina ijaca bilimeg ija wawi celeboecnu itegan,' en," aden. (*Buk Song 16.8-11*)

29 "Cotiel, age du cuhadocnu ija saluqi u maadigen. Egena sihul gugnadec dana, King Dewid, wele bilen uqa cal meceb heel cisein, euqa uqana qalqal eu ene egeca deel ina bilia. 30 Uqa Anutna je hahun madec dana, odocob uqa Anut je cagoc oso madon, 'Ija dana hinana sihulnadec hibna caligian hinana king cudunna mudigen,' don eu don. 31 Eunu Dewid uqa Anut hibnanu ceteh oso odocob caleceb fen. Odimej Anut uqana Krajs eu cal mecnadec ceseli cajigiannu maden:

'Anut cal mecna\*\* uqa qee culdol.

Uqa deweg ganac ha heelna qee huluel,' en," aden.

32 "Anut uqa Jisas i cal mecnadec haun tulidocob cajan eunu ege cunug fimeb qasali maadoqona. 33 Uqa Jisas suli u sao ohis ehi ti eben meulana isec muden. Odimej Memige Anut uqa wele maden odi Kis Gun uten. Odocob Jisas Kis Gun basecdocob nen eu ceteh qila i fegina, dah megina. 34 Eu odi ha Dewid uqa Jisas sao jobonna ten odi qee tel qa uqa maden:

'Anut Tibud uqa ijana Tibud odi madon,

"Ijaca hu ebeni meulana isec bibilem

35 ija odocomin hinana cad cunug hu ninijebil hina jaimna lahacadegan," don,' ec maden," aden. (*Buk Song 110.1*)

---

\*\* 2:31: Grik je i bahic eu "oloqanihna"

<sup>36</sup> “Eunu Isrel dana cunug age doiga, Jisas i age na babalecna tuitu qocobil cal men eu Anut uqa Tibud Kraisca mudeceb uqa ege Cahahagec calen bilia!” aden.

*Dana mati age tului falicdumeig wa joc oin*

<sup>37</sup> Dana age odi dah mimeig age wawaga qon. Odocob age Pita aposel leihca maadein, “Cotigeil, ege qila adi odocnu?” adein.

<sup>38</sup> Odocob Pita maaden, “Age osolosol agena silailnu tului falicdumeig Jisas Krai ijanna wa joc ocobil Anut agena silail cagasiadigian. Odocob Anut uqa Kis Gun bagolwe adigian. <sup>39</sup> Eu odi ha Anut uqa wele maaden odi agenuca, age talacunugailnuca Kis Gun adigian. Odocob dana leih onoca bileginanu ha adigian. Cunug Tibud, egena Anut, utaadeceb hoqagan eu uqa Kis Gun adigian,” aden.

<sup>40</sup> Pita haun maadime i dahiniga hewec je maaden, “Anut uqa qisol dana qila bilegina wadacadecec ben bahic adigian. Eunu age wadacadecec owainnu agedodoc cahahaadec adecnu agena qisol kobol culeiga!” aden. <sup>41</sup> Odocob geh bahic uqana jenu wawaga melececeb wa joc oin eu 3,000 odi casacdecca gabandoin.

*Kristen kobol me bahic calen*

<sup>42</sup> Odocob age aposel agena iwaladec je dah mecnu gale adoloi. Age cegulecnuca, bred feni jecnuca, inondocnuca gaid odoloig.†† <sup>43</sup> Odogin Anutna kobolkobol geh bahic gaga odoc ha geh

---

†† **2:42:** Doc dana mati age odi cisdogina. Saen euna Kristen age cunug cegulimeig sab joloig. Ji hedumeig age Jisas deweg golaccanu cisdocnu sab joloig.

bahic aposel ebenegana odoim eunu cunug age cucuiein. <sup>44</sup> Cunug age wawaga melecca age wawaga osol meceb bilein. Agena ceteteh eu agena dih qee elein eu cunug agena. <sup>45</sup> Age cehewanagaca agena mahaca suldodoig meen qaig eu umeig dana filfil age sabca qee cetetehca qee eu siwiadoloig. <sup>46</sup> Deel cunug age tempelna age wawaga osolna gabandu biloloig. Odimeig age agena jonana bred feni jejeig age wawaga meca celeboecca sab gabandu joloig. <sup>47</sup> Age Anut binan susulegin dana cunug agenu culunuga oin. Odocob deel cunugna Tibud uqa cahahaaadi dana cajaca am haun eu cedi ahu gabanaadien.

### 3

#### *Pita Jonca dana jaih laleg mec me mudesin*

<sup>1</sup> Deel osona Pita Jonca wesu 3 kilok odi inondoc saenna ale tempelna tesin. <sup>2</sup> Tetesin ono Jic Cebec Nege Bahic odi madoloig euna dana oso uqa simnadec jaih laleg mec bilen. Deel cunugna uqa dana age tempel dunuh lelebil meen qaig nu niniadigiannu gahidu ehi li tempel jic cebecna mudoloig. <sup>3</sup> Saen uqa Pita Jonca dunuh lelesin mecialime i uqa ceteh oso utuwasannu ninialen. <sup>4</sup> Ale gugca mecidosin. Odimesi Pita madon, “Hina ele mecilaga!” don. <sup>5</sup> Odocob uqa ceteh oso utuwasan ec cisdumei uqa mecialen. <sup>6</sup> Euqa Pita madon, “Ija meen qaigca qee qa ija ceteh osoca eu hina ihigen. Jisas Krai Nasaretdec ijanna mahigina cajimeg coboga!” don. <sup>7</sup> Odime i uqa eben meulana hewi suldocob cajan. Mahuc bahic dana eu jaih cabal jaih katca gagadic men. <sup>8</sup> Uqa

bitacimei caji tawen. Odimeis cobocnu temdon. Uqa tooalimeis cocobi bitacis Anut binan susulien tempel hamol lein. <sup>9</sup> Oodon dana ono bilein eu uqa cocobi Anut binan susulen fein. <sup>10</sup> Odimeis uqa dana jaih laleg mec tempel Jic Cebec Nege Bahic eginanu meen qaignu ninii bilina eu wele fein. Age cunug dana jaih laleg mec cocobon fimeis filicitimeis dadanein.

### *Pita tempelna me je qasali maaden*

<sup>11</sup> Saen dana eu Pita Jonca hewalen tatawen Solomonna hamol eu odi madoloig euna dana dadanimeis guguli fecnu ageca lein. <sup>12</sup> Saen Pita meciadimeis maaden, “Isrel dana, age eetanu ceteh i edinu filiciteiga? Eetanu gugca mecigegina? Age elena gagadic odocnafo, elena ititom cobocnafo odi odudocohul coboia ec cisdoginafo? Eu odi qee. <sup>13</sup> Ebrahim Aisak Jakobca agena Anut, ege jajanigeil agena Anut, uqa uqana cabi dana, Jisas, ijan meca gagadic odocca uten. Jisas i age Pailat ebenna mudimeis, uqa Pailat culdeceb nuigiannu wele cisdon, age Pailat amegna uqanu je me qee madein. <sup>14</sup> Euqa age Dana Gun Bahic, Dana Ititom Bahic uqanu je me qee madein. Odimeis Pailat agena gale adec toodugiannu sisildocobil uqa han dana qagaadec eu gihacdoc jonadec besiton. <sup>15</sup> Age madecebil age Dana Cebac Bilecna nuecnu jic dado migec eu qoin. Euqa Anut cal mecnadec tulidocob cajan. Ele eu fimeu qasali maadowona. <sup>16</sup> Jisas ijanna gagadic odoc dana i amagana fegina age dana i uqa Jisas ijannu waug meleec euna gagadic

meia ec dogina. Uqana Jisasnu waug meleec age amagana me mudia,” aden.

<sup>17</sup> “O cotiel, ija age agena iwaladecca age Jisasnu qee doloin, eunu age odi odoin ec mele dugina. <sup>18</sup> Euqa Anut wele bahic cete*h* i cali hugiannu maaden. Uqana je hahun madec dana

conogana maden, ‘Age Anutna Krai*s* eu dain ben umei gahidugian,’ en eu odi mele bahic ihoc len.

<sup>19-21</sup> Tibud uqa agena silail cagasiadigiannu gale dona. Odocob Tibud uqa age dolonoga gagadic odoc ocnu saen dodoldodob uqa cemenugnadec

ageca suldocob nigian*nu* gale dona. Uqa uqana Krai*s* uqana dana caja cahahaadecnu wele nesili ehuden, eu Jisas, eu suldocob nigian*nu* gale dona.

Jisas uqa sao jobon bibileb saen maha ina cete*h* haun cali hugiannu eu odi Anut uqana je hahun madec dana gun welewele bilein eu conogana

maden. Eunu Anut uqa odi odigiannu silailnu tului falicdoiga. <sup>22</sup> Weleca Moses maden:

‘Anut Tibud ija ageca sulteceb homwe eu odi uqa je hahun madec dana oso hibna age gemonadec ageca suldocob hugian.

Uqa je maadeceb age jejeg toodu odoigale.

<sup>23</sup> Odocob oso uqa jejeg qee toodu odigiaqa uqa geldocob fadaligian.

Odocob uqa Isrel agena sihul qee biliaun,’ en.\*

*(Loo 18.15, 18-19)*

<sup>24</sup> Anutna je hahun madec dana cunug Samjuel-nadec leceb uqa toodoin eundec ageha qila deel ina cete*h* adi cali hugian euha madein. <sup>25</sup> Age

---

\* **3:23:** Hahun je madec dana i Anut suldocob hugian eunu Pita maden, eu Jisas.

je hahun madec dana talaculunugail. Agenu je hahun eu madein. Anut uqa bal cehec je age jajanagail weledec maaden eu age mugumuga nijia. Uqa Ebrahim madon:

‘Hibna hinana sihulna dana cajaca cunug maha ina biluqagan age eeladec oqagan,’ don.  
(*Jenesis 22.18; 26.4*)

<sup>26</sup> Eunu Anut uqana cabi dana ehudimeu uqa age eeladeceb age abesabes agena qisol mec kobolnu tului falicdoqagannu uqa casac ageca suldocob nen,” aden.

## 4

### *Age Pita Jonca gihacdoc jona malein*

<sup>1</sup> Pita Jonca ale dana je maaadesin, ihanec dana ageca, tempel cofdoc han dana agena ilo uqaca, Sadjusi ageca age aleca lein.\* <sup>2</sup> Age Pita Jonca dana iwalaadesi Jisas uqa cal mecnadec haun ceseli cajen je eunu dana cunug age cal mecnadec ceseli cajecnu ihoc eu qaçasali maadesinnu gemanaga ben. <sup>3</sup> Odocob age hewalimeig cedali ehi li gihacdoc jona malein. Eu wesu mecebnu ono bibilesin deel osol hedon. <sup>4</sup> Euqa mati bahic age me je dah mein eundec wawaga meleen eu 5,000 odi ihoc len.

### *Pita Jonca Juda agena cegulec amagana tawesin*

---

\* **4:1:** Tempel cofdoc han dana agena ilo eu ihanec dana oso. Liwai sihul age dana cajaca age tempel dunuh lein eu cofadein. Odocob cofdoc han dana i uqa Liwai sihul agena ilo dana.



<sup>5</sup> Deel osona Juda agena iloiloca, agena matumatuca, loo je iwaladecca Jerusalem ono cegulein.† <sup>6</sup> Age ihanec dana agena ilo Anasca, Kaiafasca, Jonca, Aleksandaca, dana cunug age ihanec dana agena ilo agena sihul eundecca gami cegulein. <sup>7</sup> Age Pita Jonca malecebil amagana tatawesin sisilalein, “Ale ceteħ i adi odesian? Ale cel gagadic odocnafo, qee in ijanna odesian?” alein.

<sup>8</sup> Odocob Pita Kis Gun am bi cacawudeceb jejenega hewi maaden, “O Juda agena iloiloca, agena matumatuca age <sup>9</sup> qila ele dana jaih laleg mec me mudewan, me mudec euna dana eu me tawena eunu sisillifeig <sup>10</sup> age doiga. Isrel dana cunug ageha doiga. Dana laleg mec qila age amagana tawena eu uqa Jisas Krai Nasaretdec uqa ijanna me mudec tawena. Age Jisas Krai eu na babalecna tuitu qocobil cal men, euqa Anut haun tulidocob cajen.‡ <sup>11</sup> Jisas uqanu Anutna jaqec je maden:

‘Meen oso age meen gel cehec memei dana culein eu

qila meen jo big gug jo hehdocnu tawena,’ en.  
(*Buk Song 118.22*)

<sup>12</sup> Anut uqa cahahagecnu oso ijan hatu i cunugna qee igel. Uqa himec ege Cahahagec. Osoca qee,” aden.

---

† **4:5:** Dana i age cegulein eu Juda agena gesilec ben. Age Juda agena cuha fecnu ceteħ cunug cofdoin. ‡ **4:10:** Juda agena cegulec age Pailat hina Jisas qocom cal migian ec madein. Age Luk 22.66-23.5 feiga. Odocob Jisas cal mi hedocob age dana cajaca uqanu wawaga meleecnu qee gale adel.

<sup>13</sup> Odocob cegulec age Pita Jonca ale je saluqi u mamadesin eu dah mein. Odocob aleha dana gauc, ale Farisi agena doc qee iwalalein eu doin. Eunu age tumatumaen. Odocob ale Jisasca coboloig eu doin. <sup>14</sup> Euqa ale dana me mudesian eu Pita Jonca gami tatawegin fein eunu je oso madecwe qee. <sup>15</sup> Odocob age maalecebil ale cegulec cudun eunadec cuculadi cali hosin. Odimeig age himec je togodoin. <sup>16</sup> Age madein, “Ege dana lecis i alenu adi odeqan? Jerusalem ene dana cajaca cunug dana i ale kobolkobol odosian ec dogina. Eunu ege qee ecwe qee. <sup>17</sup> Euqa je i hatuhatu leceb dana cajaca cunug dowainnu ege je gatiti maalecnu, ‘Dana i ijanna je cain madowasin,’ alecnu,” ein.

<sup>18</sup> Eunu age haun utaaecebil hocobil maalein, “Ale haun Jisas ijanna dana oso je cain madowasin. Jisas ijanna oso cain iwaldowasin,” alein. <sup>19</sup> Euqa Pita Jonca jejenega hewi maadesin, “Ele Anut amegna age conoga todocnu eu coisfo, qee ele Anut co todocnu eu cois, eu age agedodoc gesileiga. <sup>20</sup> Euqa Jisasca ceteteh cunug ele foh, dah moh eunu qasali madecnu culecwe qee,” adesin. <sup>21</sup> Odocob cegulec age haun je gatiti maalimeig culalecebil belesin. Dana cajaca cunug age kobolkobol fein eunu Anut binan sulein. Eunu age ameg alecnu jic oso qee felein. <sup>22</sup> Dana i ale kobolkobolna me mudesian eu uqa cabi gel 40 wooldoc eu odi.

*Kristen age me je madec gagadic odoc oqagannu Anut cesuladigiannu inondoin*

<sup>23</sup> Saen age Pita Jonca culalecebil ale dana cajaca wawaga meleec tamanec bileinna belesin.

Ono ale je cunug ihanec agena iloiloca Juda agena matumatuca maalein eu saadesin. <sup>24</sup> Wawaga meleec dana cajaca age dah mimeig age cunug Anut inondocnu wawaga osolca cegulein. Age madoin, “O Ben, hina sao, maha, macasca ifanem. Hina age cunug euna bilegina euha ifanadem. <sup>25</sup> Wele hina Kis Gunna ege jajanige Dewid hinana cabi dana Kis Gun cona mecem je maden:

‘Eetanu Juda dana qee eundec age gemanaga ben?

Eetanu dana cajaca cunug age ege Tibud me qee odudeqan imeig qa odocwe qee?

<sup>26</sup> King mahanadec cunug age Tibudca uqana Kraisca aqalecnu saciadin.

Mahamaha agena ilo age Tibudna Kraisca han cadecnu cegulein,’ en. *(Buk Song 2.1-2)*

<sup>27</sup> Eu mele bahic, taun ina Herodca, Pontias Pailatca, Juda dana qee eundec ageca, Isrel dana ageca age gabandumeig age Jisas hinana cabi dana gun, hina wele Krais mudem, eu deweg tudocnu cegulein. <sup>28</sup> Age ceteh cunug cali hugiannu hina wele madem eu odocnu cegulein. Eu hinana gagadic odocna hinana cisdocnaca odi doin.

<sup>29-30</sup> O Tibud, qila agena cahacgec dah maga. Hinana gagadic odoc ihacaadi dana cajaca me madaga. Odog kobolkobol filfilha hinana cabi dana gun, Jisas, uqa ijanna odoga. Odimeg gagadic odoc euna ege, hinana cabi dana, hinana me je saluqi u maadecnu cesulgagale,” ein.

<sup>31</sup> Age inondu hedumeig bibilegin cudun euna mim neceb qelelen. Age cunug Kis Gun am beceb age Anutna me je haun saluqi u maadein.

*Kristen dana cajaca age wawaga osol tawein*

<sup>32</sup> Wawaga meleec tamanec eundec age wawaga osolca, cisdoc osolca bilein. Oso uqana ceteh eu uqana himec ec qee madoloi, qa age cunug agena ceteteh eu osoben utecebutecboloig. <sup>33</sup> Odocob aposel age gagadic odocca Jisas Tibud cal mecnadec ceseli cajennu dana cajaca je maadein. Odocob Anut age cunug eeladen. <sup>34-35</sup> Leih age mahaca joca eu cunug idadumeig meen qaig eunadec umeig aposel adoloig. Odocob meen qaig eu age agenadec oso sabca qee cetetehca qee eundec meen qaig eu cesawimeig utoloig. Eunu saen euna age eundec oso cetehnu qee jaen qoloi.

<sup>36</sup> Odocob saen euna Josef, uqa Liwai sihuldec, uqa Saipras nuidec, eu bilen. Aposel age ijan Banabas dogina, ijan eu uqana gug odi “oso uqa jic ihacadec, hulunuga cehec dana,” en. <sup>37</sup> Odimeu uqana maha eu idadimeu meen qaig eunadec eu ehi li aposel jaimagana men.

## 5

*Ananaias Safairaca*

<sup>1</sup> Euna dana oso, ijan Ananaias, uqa aideg Safairaca alena maha oso idadimesi meen qaig osin. <sup>2</sup> Odocob uqa aidegca je qeel qetimesi uqa meen qaig naha hehewi li naha himec aposel aden. <sup>3</sup> Euqa Pita madon, “Ananaias, hina eetanu Seten culdocom cisdoc me qee iheceb Kis Gun uhuldudu meen qaig naha maha idademnadec hewaga? <sup>4</sup> Hina maha qee idadec ninijen eu

hinana bilen. Hibna hina idadem eu hina adinu fajedom meen qaig hinana biloub eu cois. Eetanu kobol me qee i odocnu cisdoga? Hina maha inadec dana qee uhuladelem qa hina Anut uhuldoge!” don. <sup>5</sup> Saen Ananias je eu dah mimei cal mimei toni mahulen. Cunug eu dah mimeig ben bahic cucuiein. <sup>6</sup> Odocob dana haunhaun age hamol humeig uqa deweg lotoc jeuldimeig hewi ehi nui heel cisein.

<sup>7</sup> Odocob aua cijed odi hedocob uqa aideg qee docdoc li hamol len. <sup>8</sup> Odocob Pita sisildon, “Mataga, meen qaig gadac iqa himec hina gemunca maha idadesianadecfo?” don.

Uqa jejeg hewi madon, “Ese, meen qaig cunug iqa,” don.

<sup>9</sup> Odocob Pita madon, “Hina hina gemunca eetanu Tibudna Kis temdocnu je qeel qetesin? Faga, dana hina gemun heel ciseiga eu age qila jic cebecna taweiga. Age hina ha gahihi caloqagan!” don. <sup>10</sup> Mahuc bahic uqa jaihna toni mahulimeic cal men. Dana eu age hamol humeig uqaha cal men eu fein. Eunu age hewi ehi nui gemug nijen qeihna heel cisein. <sup>11</sup> Odocob tamanec cunugca dana caja leihca je eu dah mimeig ben bahic cucuiein.

### *Kobolkobol mati bahic cali hon*

<sup>12</sup> Odocob aposel age kobolkobol odocca, gaga odocca mati bahic dana cajaca gemona odoin. Odocob tamanec cunug age Solomonna hamolna ono ceguloig. <sup>13</sup> Leih maha gemo coboin eu cucuimeig age li gabanadecnu qee cisdoloin, qa dana cajaca cunug tamanec binanaga sulein. <sup>14</sup> Euqa dana cajaca mati bahic age Tibudnu wawaga

meleen uqana tamanec euna lein. <sup>15</sup> Eunu aposel age odi oodogin dana age Pita hu woolaadeb uqa hahun ageceb me madigiannu age hagca gahiadi jicna agena cabalna agena taegna cedi ehi li madoloig. \* <sup>16</sup> Odocob mati bahic dana caja hagca eundec jobon nagnag Jerusalem alildoc onodec buga me qeeca eundec cedi ahocobil age cunug me madein.

*Age aposel gihacdoc jona madein*

<sup>17</sup> Odocobil ihanec dana iloca, Sadjusi dana age uqaca tawein eundecca age heel mec je madein. Eunu age aposelnu age ceteh oso odadecnu cis-doin. <sup>18</sup> Age aposel hewadimeig dana cunug agena gihacdoc jo euna madein. <sup>19</sup> Euqa witic euna Tibudna ensel oso nimei gihacdoc jo cebec hudimei aposel ehadi ehi limei maaden, <sup>20</sup> “Belimeig tempel hamol li taweiga. Odimeig cebac bilec haun inu dana cajaca cunug maadeiga,” aden. <sup>21</sup> Aposel je toodumeig cocojagen age tempel jo hamol lein. Odimeig me je iwaladein.

Ihanec dana iloca dana age uqaca tawein eundecca age Juda agena cegulec cegulecnu maadecebil hu cegulein. Odimeig age aposel cedadi ahocobil cegulec euna age amagana madoqagannu je suldocobil gihacdoc jona len. <sup>22</sup> Saen tempelnadec cabi dana lein eu aposel ono qee gulucadelein. Eunu age cegulecca limeig maadein, <sup>23</sup> “Saen ege gihacdoc jona limeb jic cebec eu gagadic bahic menec tatawen foqa. Gihacdoc jo jic cebec cofdoc dana ha tatawegin meciadoqa qa

---

\* **5:15:** Dana cajaca i age Pita hahun eu hagca agecebfi cois, hagca age meadoqagan eunu wawaga meleen.

saen ege jic cebec hudimeb dunuh loqa eu ono danaca qee!” adein. <sup>24</sup> Saen tempel uqa han qalic iloca, ihanec dana benben ageca odi dah mimeig age dadanii aposel dewenega cel cete h caleia ec cisdoim. <sup>25</sup> Oodon dana oso humei maaden, “Doiga! Dana age gihacdoc jona madeigan eu tempelna dana me je iwalaadi taweiga!” aden. <sup>26</sup> Odocob tempel han qalic iloca, uqana han qalic dana ageca belimeig aposel cedadi ahoin. Age dana meenna aqowainnu cucuiein. Eunu age hihibanagana qee cedadi aholoin.

*Aposel age me je madecnu qee cucuielein*

<sup>27</sup> Age aposel cedadi hamol ehi limeig cegulec amagana madecebil tawein. Odocob ihanec dana ilo uqa sisiladen, <sup>28</sup> “Ege age je gatiti maadom, dana i ijanna cain iwaladowain ec maadom qa feiga, age eeta odoin? Dana cajaca iwaladein eu Jerusalem i cunug ihoc len. Odocob age dana i uqana cal mecnu ha ege um qiguqagannu gale adena!” aden.

<sup>29</sup> Odocob Pita aposel leihca jejenega hewi maadein, “Ege maha inadec dana jejenega qee toodoqaun. Anut jejeg himec toodoqan. <sup>30</sup> Ege jajanigeil agena Anut uqa Jisas uqa age na balebalecna tuitu qumeig caqusecebil caculime cal meceb cal mecnadec tulidocob cajen. <sup>31</sup> Anut uqa dana i tulidocob cajime eben meulana isec ten bilia. Uqa ege iwalgecca cahahagecca bilina. Uqa Isrel dana agena silailnu tului falicdocnu silail cagasiadigiannu ihoc bilina. <sup>32</sup> Ege Anut cete h eu odon eu ege fom eunu qasali maadoqona. Kis

Gunha ceteu eu maadena. Anut uqa dana age uqana je toodu odogina eu Kis Gun adena,” adein.

*Gameliel uqa cegulec aposel hihibanagana cain odadowainnu maaden*

<sup>33</sup> Saen cegulec dana age je eu dah mimeig age gemanaga gagadic bahic beben aposel qagaado-qagannu cisdoim. <sup>34</sup> Euqa agenadec oso, Farisi ijan Gameliel,<sup>†</sup> uqa loo je iwaladec dana cunug age uqa bisalu himec jejeg dogina eu caji tawimeu aposel cedi caloqagannu maaden. <sup>35</sup> Odimeu cegulec maaden, “Isrel dana, dana i agenu ceteu oso odadoqagannufi batut cisdoigale. <sup>36</sup> Ge, saen osona Tiudas cali hon. Odimeu uqa ija meca ec maaden. Odocob dana 400 odi uqaca gabandoin qa uqa qagadogin cal men. Dana uqa toodu coboloig eu filfil buadein. Odocob uqana cabi sanan men eu gauc cal mi qee men. <sup>37</sup> Eu hedocob Judas Galilidec, dana cajaca cunug sanijadec saenna cali hon uqa dana mati bahic diiadeceb toodoin qa uqaha qocobil cal meceb dana uqa toodoloig eu filfil buadein. <sup>38-39</sup> Eunu ija maadigina, dana i agena cabi eu maha inadec dana agena oginafi isi jausigian. Euqa eu Anutnu cabi oginafi age wooladecwe qee. Agedodoc Anutca cadoqaga odowainnu dana i agenu ceteu oso cain mahuc odowain. Culadi qisacadeiga!” aden.

Odocob cegulec age Gamelielna je toodu odoin.

*Aposel age Jisasnu majanaga hewecnu ceelein*

---

<sup>†</sup> **5:34:** Pol uqa Kristen qee calec Gameliel uqa uqana iwaldoc bilen. Age Aposel 22.3 feiga.



<sup>40</sup> Eunu age uqa jejeg toodumeig aposel utaadecebil hamol lein. Odocob age han qalic dana maadecebil age geh bahic qisaadimeig Jisas ijanna me je cain bahic dana maadowainnu cahacadimeig culadecebil belein. <sup>41</sup> Odocob aposel age cegulec culadein. Anut uqa age Jisasnu majanaga hewecnu eu ihoc ec cisdon eunu bebeli bileig age wawaga ceelen. <sup>42</sup> Odocob deel cunugna tempelnaca, agena jo cunugnaca Jisas uqa Anutna Kraiss eunu me je maaadi coboin.

## 6

### *Age dana 7-pela age aposel cesuladecnu nesili ehadein*

<sup>1</sup> Saen osooso hedocob malogom sanijec ohis teten Juda dana Grik je madegina eu madein, “Egena caja wij eu age deel cunug sab siwiadec saenna age gaid hawaadegina,” ein. Eunu Juda dana Grik je madegina, Juda dana Hibru je madeginaca fee dadanein. <sup>2</sup> Odocob aposel 12-pela eu age malogom cunugca maadecebil cegulecebil maadein, “Ege cewel ocnu cabi u Anutna me je maadecnu cabi culecnu eu cois qee. <sup>3</sup> Eunu, cotigeil, age dana 7-pela Kis Gun am becca, docca bilegina agenadec nesili ehadecebil ege caja wij sab siwiadecnu cabi cofdocnu madocomun biluqagan. <sup>4</sup> Egeqa, ege inondocnuca, me je maadecnuca cabi oqan,” adein.

<sup>5</sup> Dana am eu age cunugca aposel agena cisdoc aquni madeinnu wawaga me bahic nijen. Eunu age Stiwen, Kis Gunca waug meleec dana,

uqa nesili ehudein. Odocob age Filip, Prokoras, Naikena, Taimon, Pamenas, Nikolasca nesili ehadein. Nikolas uqa Juda dana qee, uqa dana Antiokdec. Wele uqa Juda sihul ibuldon. <sup>6</sup> Dana am nesili ehadein eu age aposelca cedi ehi lein. Odocob age ebenega ilomogana mimeig inondoin.

<sup>7</sup> Eunu Anutna je ihoc len. Malogom age Jerusalem bilein agena sanijadec ohis ten. Odocob ihanec dana mati bahic me jenu wawaga meleceeb me je toodu odoin.

*Juda dana age Stiwen ehudimeig cegulec amagana mudein*

<sup>8</sup> Stiwen uqa Anut amegna me bilecca, gagadic odocca am bec bibilei uqa kobolkobol odoc gaga odocca benben dana cajaca gemona muden. <sup>9</sup> Euqa dana leih uqa gami fee dadanein. Age Juda am onoadec, age Cuha Jo Dana Besiadec ein.\* Leih age Sairinidec, leih age Aleksandriadec. Ageca odocob Juda dana leih age Silsiadecca, Esiaca age Stiwen gami fee dadanec sanan mein. <sup>10</sup> Euqa Kis uqa cisdoc silecca utennu uqa je maadeceb age uqana uhulec je oso qee felein. <sup>11</sup> Eunu age dana leih Stiwennu je me qee madecnu fajadein. Age madein, “Ege uqa Moses Anutcanu je me qee mamaden dah mom,” ein. <sup>12</sup> I edina age dana cajaca, Juda agena matuca, loo je iwaladecca gemanaga aig metein. Age hu Stiwen hewimeig cegulec amagana ehudi lein. <sup>13</sup> Odimeig age dana leih Stiwennu uhulec je

---

\* **6:9:** Juda dana i age wele dana agena cabi dana bega meh bilein, euqa saen ina age besiadec bilein.

madoqagannu hamol cedi ehi lein. Age madein, “Dana i uqa saen cunug tempel gun ica, Mosesna loo je gun eunuca je me qee gaid madena. <sup>14</sup> Ege uqa dah mumudeqan madi, Jisas Nasaretdec uqa jo ben i wagalime i loo je weledec Moses ebenigena men euha qee mudime i haun odi igian en,” ein. <sup>15</sup> Cunug ono cegulecna bilein eu age amaga Stiwen himec deedoin. Odimeig age uqa ola eu ensel ola cinigwe fein.

## 7

### *Stiwen cegulec je maaden*

<sup>1</sup> Odocob ihanec dana agena ilo uqa Stiwen sisildon, “Dana i age madegina eu melefo?” don.

<sup>2</sup> Stiwen jejeg hewi maaden, “Cotiel memeiela, ija je maadigina dah meiga! Wele ege memige Ebrahim Mesopotemia bibilen Haran qee nuec Anut kobolkobolca ono uqaca camasac men.

<sup>3</sup> Odime i madon:

‘Hinana sihulca hinana mahaca culimeg maha ija ihachigenna nuuga,’ don. *(Jenesis 12.1)*

<sup>4</sup> Eunu uqa Kaldia agena hatu culime i nui Haran hatuna bilen. Hibna Ebrahim memeg cal meceb Anutna odudeceb hu hatu i qila age bileginana bilen. <sup>5</sup> Anut odonqa uqa maha naha uqana bahic oso qee utel, maha mita osahic bahicha qee utel. Euqa Anut utigiannu je hahun maden. Anut uqa Ebrahim melca qeeqa eu uqana bahicca uqana sihul hibna biluqagan eu ageca agena biligian ec je hahun maden. <sup>6</sup> Anut uqa edi madon:

‘Hinana sihul age hatu filna cele dana biluqagan. Ono age gahidoc cabi oqagan,

odocob age qisaadebil cabi ooig cabi gel 400 ono biluqagan.

<sup>7</sup> Euqa dana me qee madoqagan eu ija wadac me qee adigen.

Eu hedocob hibna age hatu eu culimeig hu ene bibileig ija binani suluqagan,' don.  
*(Genesis 15.13-14)*

<sup>8</sup> Odocob Anut uqa Ebrahim bal cehec jenu deweg cagu qoc kobol uten. Odocob Aisak cali hon. Deel 8-pela hedocob Ebrahim uqa Aisak deweg cagu qon. Odocob Aisak hibna melah Jakob cali hon. Odocob hibna Jakob melahul 12-pela cali hoin. Dana 12-pela i age egena sihul gug 12-pela memigeil bahic," aden.

<sup>9</sup> "Jakob melahul age waliniga Josefnu heel memeig age Isip hatu ono gihacdoc cabi ugiannu suldoin, euqa Anut uqaca bilen. <sup>10</sup> Odimei uqana culumen cunugnu besiton. Saen Josef uqa Isip agena king amegna bilen Anut uqa duman meca, cisdoc meca uten. Odocob king hatu eu cofdoc biligiannu muden. Uqaha uqadodoc jo cofdoc biligiannu muden. <sup>11</sup> Odocob saen euna Isip hatuca, Kenan hatuca ono sabnu cahel aqen. Odocob dana cajaca mel cunug wen bilein. Ege jajanigeil age sab ocnu cabi bahic. <sup>12</sup> Odocob Jakob Isip hatu ono sabca ec dumei uqa melahul ege jajanigeil age casac suladeceb wele age qee lecna lein. <sup>13</sup> Odocob age Isip ono li lecisdocobil Josef uqa waliniga ec maadeceb doin. Odocob Isip agena king uqa Josefna sihulnu dugia bili hon. <sup>14</sup> Eunu Josef uqa memeg Jakobna je suldon. Odimei madon, 'Sihunel cunug dana caja 75

cunugca age Isip ene hoqagan,' don. <sup>15</sup> Odocob Jakob Isip nuen. Ono uqaca uqa melahulca cal mein. <sup>16</sup> Age Josef Jakobca dewatera ganac Sekem ono ehi nui Ebrahim heel eu Hemo sihul agenadec qaig silwana fajen euna heel cisalein," aden.

<sup>17</sup> "Saen Anut uqa Ebrahim je hahun madon eu wele dodoldodon egena sihul ha Isip hatuna ono fulusdon. <sup>18</sup> Saen euna king oso uqa Josefnu qee doc Isip ono calimei hatu eu cofdon. <sup>19</sup> Uqa egena sihul uhuladimei uqa qisaadi maadeceb age agena mel sim basoloig eundec cal mecnu ehadi nui maha gemo culadoloig. <sup>20</sup> Saen euna Moses uqa cali hon. Uqa mel galeca bahic, uqa jagel cijed memegna jobon bilen. <sup>21</sup> Odocob saen uqa jobondec ehi nui fil mudein euna king ateg uqa umei melah bahic cinigwe cofdodon ben men. <sup>22</sup> Uqa Isip agena kobol docca iwaldodogin ben men, eu uqana je madec odocca eu gagadic men," aden.

<sup>23</sup> "Saen Moses uqana cabi gel 40 odi uqa cotugul Isrel eu ono li feciadigiannu cisdon. <sup>24</sup> Ono nuimei uqa Isipdec dana oso Isreldec oso qoqon fimei eunu uqa li Isreldec wadadocnu cesuldumei Isipdec qocob cal men. <sup>25</sup> Uqa Isrel dana eu age Anut besiadigiannu cabi uten ec odi doqagan ec cisdon qa eu age odi qee cisdoloin. <sup>26</sup> Deel ona uqa Isreldec dana lecis cacadesin mecialimei uqa cahacalimei tanawaligiannu odon. Odimei maalen, 'Se, dana lecis ale Isreldec himec. Odi eetanu cadesina?' alen. <sup>27</sup> Euqa oso uqa cotig wadon eu Moses gesac sundumei madon: 'In hina ege cofgecca gesilgecca mihen?' don.

Uqa sisildon, <sup>28</sup> ‘Hina cum Isipdec qagadoganwe odi ijaha qagateganfo?’ don. (*Kisim Bek 2.14*)

<sup>29</sup> Moses je eu dah mimei uqa Isipdec busali nui Midia mahana ono bilen. Ono uqa aideg mel manahal lecis basalen,” aden.

<sup>30</sup> “Cabi gel 40 hedocob Tibudna ensel na nag oso ja cijec belicanna tatawen fen, wadauna\* Sainai aluh cemenug. <sup>31</sup> Moses eu odi fimei tumatumaen. Odimeci cisdudu fi cuhadugia eunu na nag eu cemenugca len. Euqa dodoldodon uqa Tibud jejeg dah men.

<sup>32</sup> ‘Ija hina jajaninel agena Anut, ija Ebrahim, Aisak, Jakobca agena Anut,’ en. (*Kisim Bek 3.6*)

Odocob Moses qelelimei jejeg cali honna isec feciecnu culen. <sup>33</sup> Odocob Tibud Moses madon: ‘Cudun hina tawaga eu maha gun.

Eunu hina jaim tacec eu huluga.

<sup>34</sup> Isip dana age ijana dana cajaca me qee odadegina eu ija figina.

Ija agena sogoec eu dah migina eunu ija besadigennu niga.

Qila, ija hina sulhecemin Isip hatuna nuegan,’ don,” aden. (*Kisim Bek 3.5, 7-8, 10*)

<sup>35</sup> “Moses i Isrel dana age uqanu cuculeig sisildoin, ‘In hina ege cofgecca gesiligecca mihen?’ doin. Euqa Anut uqa ensel na nag oso ja cijec belicanna tatawen fen uqa ebenna besiadimeci cofadigiannu suldon. <sup>36</sup> Uqa Isrel dana Isipdec ehadi nuen. Uqa kobolkobol gagadic odocca Isip

---

\* **7:30:** Age je Matju 3.1na nijia eu feiga.

onoca macas golcana odon. Odocob cabi gel 40 leceb wadauna ha odon. <sup>37</sup> Moses i uqa Isrel dana maaden:

‘Anut ija ageca sulteceb homwe eu odi uqa je hahun madec dana oso hibna age gemonadec ageca suldocob hugian,’ aden. (*Loo 18.15*)

<sup>38</sup> Moses uqa Isrel tamanecca wadauna ono bilein, saen euna uqa ege jajanigeilca bibilegin ensel uqa Sainai aluhna ono je madon eu uqa cebac bilec je igecnu uten,” aden.

<sup>39</sup> “Euqa ege jajanigeil Mosesna je qee toodoloin. Uqa gesac sundodoig age haun Isip ceseloqagannu cisdoim. <sup>40</sup> Eunu age Eron madoin: ‘Ege kadan tibud mudadigecem ege jic aqunigeiga.

Ege dana Moses egina uqa Isipdec ehigi ahon eu ana nuia qee doqona,’ doim. (*Kisim Bek 32.1*)

<sup>41</sup> Eunu age uhulec kadan tibud eu bulmakau nag ihicon qu mudein. Uqa ihandoin. Odimeig sab ben cicileig uhulec kadan tibud agedodoc mudeinnu celeboein. <sup>42-43</sup> Eunu Anut age hibe-maden. Odimeig Anutna je hahun madec dana agena jaqec jena taweia eu madenawe:

‘O Isrel dana caji! Age cabi gel 40 wadauna cocoboig dool aqimeig ihanoloig saen euna age ijanu ihantoloig ec cisdoginafo?

Age Molekna jo talahca Refan tibud uqana malaqa ihiconca gahialein.

Eu uhulec kadan tibud himec age eunu cuha foqagannu mudein.

Eunu ija age Babilon hibilohu isec suladecemin beli biluqagan,' madenawe (*Amos 5.25-27*) odi Anut uqa malaqa sao ohis binan suluqagannu ahawaaden," aden.†

<sup>44</sup> "Ege jajanigeil age wadauna bibileig talah jo eu Anut ageca bilen eu ihacaden. Anut Moses mudigiannu madon odi mudein, uqana hahun Moses fen eu odi mudein. <sup>45</sup> Hibna ege jajanigeil talah jo memegail mudein eu gahidumeig Josua todocobil belimeig maha hatu Anut dana eu-nadec cunug qee maden eu oqagannu belein. Odocob talah jo eu maha euna bibilen leceb Dewid king cali hon. <sup>46</sup> Dewid uqa Anut amegna me bileceb Anut uqa Dewidnu gale don. Uqa Jakobna Anut sisildon, 'Hina cois tecemfi ija jo hina bilegannu cehihigen,' don. <sup>47</sup> Euqa Solomon uqa jo eu cehiton," aden.

<sup>48</sup> "Euqa Anut Ohis Bahic uqa jo dana ceheginana qee bilina. Ge, Anutna je hahun madec dana odi maden:

<sup>49</sup> 'Tibud madena, "Sao jobon eu ijana bilec bahim.

Odocob maha eu ija jaimi mec cabal.

---

† **7:42-43:** Molek eu kadan tibud oso dana caja sihul fil age eunu cuha fein. Refan eu malaqa oso ageha eunu cuha fein. Je i Stiwen maden uqa je hahun madec dana, Amos, uqana buk 5.25-27nadec on. Amos uqa odi maden. Isrel wele bilein age Anutnu cuha fecnu bahic qee felein. Euqa age Anutna je hibemdumeig age sihul fil agena kadan tibudnu cuha fein. Hibna Anut uqa Isrel age uqa hibemdoin eu fen. Eunu uqa Babilon culadecib age humeig Isrel han cadi cilehadimeig ehadecebil Isrel age beli Babilon hatuna gihacdocna bilein. Age 2 King 24.10-16 feiga.



Cel jo adec bahic ija cehitegan? Cel cudunna ija biligen?

<sup>50</sup> Ceteteh cunug i ija ebenina mudem,” ena,’ en,” aden. *(Aisaia 66.1-2)*

<sup>51</sup> “Age Anutna je todoc dana qee! Age wawaga eu haiden dana cinigwe! Age dahiniga me je dah mecwe qee! Age jajanagail Kis Gun cahacdoigwe eu odi age ha Kis Gun gaidgaid cahacdogina. <sup>52</sup> Age jajanagail Anutna je hahun madec dana cunug dewenega tuadein. Je hahun madec dana eu age madein, ‘Hibna Anut uqa uqana Dana Ititom Bahic egeca suldugian,’ ein eu age aqein. Odocob qila age Dana Ititom i age balijimeig qoin. <sup>53</sup> Anutna ensel Mosesna loo je adein eu age oin. Euqa age qee todocloin,” aden.

### *Age Stiwen meenna qocobil cal men*

<sup>54</sup> Odocob cegulec dana je eu dah mimeig age gemanaga geh bahic beceb maimaga kicododoig gemanagaca mecidoin. <sup>55</sup> Euqa Stiwen Kis Gun waugna am beceb sao jobon tatiimeig Anutna kobolkobol fimeig Jisas Memeg eben meulana isec tatawen fen. <sup>56</sup> Odimeig Stiwen maaden, “Feiga! Ija sao jobon ceceb hudeceb Dana Melah Anut eben meulana isec tatawen figina!” aden.

<sup>57</sup> Uceldodoig cegulec dana ebenegana dahiniga cit qoin. Odimeig age cunug bahic gulu qahi cemenug lein. <sup>58</sup> Hewi qelecebil taun ben hibiloh isec leceb meen heli qoin. Dana age Stiwenna je dah mein eu age agena lotoc dana

haun oso, ijan Sol, jaihna olomdoin.† 59 Meenna odi ququ ninijegin Stiwen uqa Tibud inondudu madon, “Jisas Tibud ija doloni oga!” don. 60 Uqa mahana gob cehimei gehca utai madon, “Tibud! Hina i agena silail inu dahin celeiale!” don. Uqa eu odi dih mamadi ha cal men.

## 8

<sup>1</sup> Odocob dana age Stiwen qocobil cal men eunu Sol eu tutuc ec cison.

*Wawaga meleec dana cajaca eundec Sol uqa gihacdoc jona madecnu aaqati tooaden*

Age gihacdoc jona madecnu saen euna sanan mimeig wawaga meleec tamanec Jerusalem bilein aaqati tooadein. Eunu dana wawaga meleec eundec cunug budu Sameria hatuca, Judia hatunaca beladein qa aposel age qee budoloin. <sup>2</sup> Dana ititom coboc leih age Stiwen heel cisein. Age geh bahic qadaug utein.

<sup>3</sup> Euqa Sol uqa wawaga meleec tamanec fadal-docnu cabi on. Uqa jojo cijawdudu cocobi dana cajaca wawaga meleecca eundec diiadi ehi nui gihacdoc jona qeladeceb lein.

*Age Sameria hatu ono me je madein*

<sup>4</sup> Dana wawaga meleecca eundec buadein eu cudun cunugna beladein. Odimeig me je qaqasali maaadi coboin. <sup>5</sup> Odocob Filip uqa Sameria hatu uqana taun benna nuimei ono dana cajaca

---

† 7:58: Isrel agena loo je eu odi maden, “Dana oso uqa kobol me qee bahic oso odocobi age ehudi taun ben hibiloh isec limeig ono meen heli qocobil cal migian,” en. Age Wok Pris 24.13-16ca, Namba 15.35ca feiga.

Anutna Kraisnu me je maaden. <sup>6-7</sup> Buga me qee dana geh bahic deweneganadec ititacadeceb cali huhu bebeleig geh bahic utaein. Odocob dana mati age ebenega jaimaga cal mecca laleg mecca me mamaden fein. Eunu dana cajaca mati bahic Filip je maaden eu age cunug uqa dah mumudeig odoc kobolkobol odon eu fimeig dah moqagannu dahiniga cehi cuhadoin. <sup>8</sup> Odocob taun ben euna geh bahic ceelein.

<sup>9</sup> Odocob ceeh dana oso, ijan Saimon, ono biloloi. Uqa saen cecelac dana Sameriadec amagana mahanadec odoc kobolkobolca oodon age tumatumaoloig. Ija binanica adoloi. <sup>10</sup> Odocob taun ben eunadec dana ijanagaca, dana ijanagaca qee age cunug uqa je mamaden cehna dah mudi biloloig. Age odi madein, “Dana i eu Anutna gagadic odocca uqa Gagadic Odoc Ben odocca egina,” ein. <sup>11</sup> Uqa uqana mahanadec odoc kobolkobolca saen cecelac bahic oodon tumatumaein eunu age uqa je mamaden cehna dah mudi biloloig. <sup>12</sup> Euqa saen Filip uqa me je Anutna culnuca, Jisas Kraisnuca qasali maaden eunu dana cajaca cunug wawaga meleeceb wa joc oin. <sup>13</sup> Saimon uqadodoc ha waug meleen. Hibna uqa wa joc umei Filip cemenug bahic bilen. Odocob uqa Filip odoc kobolkobolca odocob fimeifiliciten.

<sup>14</sup> Aposel Jerusalem ono bibileig Sameria dana cajaca Anutna me je oinnu dah mimeig eunu age Pita Jonca sulalecebil ono belesin. <sup>15-16</sup> Saen ale ono li calimesi ale wawaga meleecca eundec age Kis Gun ageca qee nec ninijen Jisas Tibud ijanna dih wa joc oinnu ale Kis Gun oqagannu

inondosin. <sup>17</sup> Inondodosi Pita Jonca ebenela ilomogana mecebil Kis Gun ageca nen.

<sup>18</sup> Saimon uqa Pita Jonca ebenela ilomogana mecebil Kis Gun ageca nen eu fimei Pita Jonca meen qaig aali <sup>19</sup> maalen, “Ijaha ebeni ilomogana mecemin Kis Gun oqagannu gagadic odoc i itesia,” alen.

<sup>20</sup> Euqa Pita jejeg hewi madon, “Ceteh Anut bagol igec hina meen qaigajna fajecnu ihoc cisdogonanu hinana meen qaig hinaca oloqanihna nuesia! <sup>21</sup> Hina wawin meleec eu Anut amegna tutuc qee. Eunu hina ege cabi oqona i ocnu ihoc qee. <sup>22-23</sup> Anutna bagol igecnu amen qona. Ceteh i ocnu heel magana. Silail calwau mihina eu ija figina. Eunu falicdumeg hinana cisdoc me qeenu Tibud uqa ihocfi hinana silail cagasihigiannu inondoga,” don.

<sup>24</sup> Odocob Saimon Pita Jonca maalen, “Odi cain. Ale madesia odi ijaca qee hoiaunnu ijanu Tibud inondosiale,” alen.

<sup>25</sup> Odocob ale alena gugnu madimesi Jisas Tibudnu doc euha Tibudna me je madi hedumesi Pita Jonca haun Jerusalem ceseli belesin. Ale Jerusalem ceceseli bilesi jicna Sameria jobon mati bahic me je qaqasali maaadi belesin.

*Filip dana Itiopiadec me je madon*

<sup>26</sup> Odocob Tibudna ensel Filip madon, “Hina saciadumeg fufu saut isec jic Jerusalemdec Gasa jobon nuc eu toodu nuuga,” don. Jic eu wadau\* gemona nuina. <sup>27</sup> Eunu Filip saciadumei nuen. Nuimei dana Itiopia hatudec jic nunuen fen. Uqa

\* **8:26:** Age je Matju 3.1na nijia eu feiga.

dana bamig selec, uqa Itiopia agena kwinna ilo dana oso. Uqa kwinna meen qaig cofdoc dana. Wele uqa Jerusalem ono Anutnu cuha figia len <sup>28</sup> qa qila uqa karisna ceseli jobon nuen. Uqa karisna guguli bili uqa Anutna je hahun madec dana Aisaiana buk jaqen eu sanijen. <sup>29</sup> Odocob Kis Gun Filip madon, “Karis i cocobi cemenug laga,” don. <sup>30</sup> Odocob Filip cemenug limei uqa je hahun madec dana, Aisaia, uqana buk eu sasanijen dah men. Odimei uqa sisildon, “Hina jaqec je sanijigina eu wawin fogo donafu?” don.

<sup>31</sup> Odocob dana eu Filip jejeg hewi madon, “Oso uqa qee silditecebfu ija adi wawi fogo dugian?” don. Odimei uqa Filip karis ohis uqaca teceb biluwasannu cesusdon. <sup>32</sup> Anutna jaqec je dana eu uqa sanijina eu odi maden:

“Uqa sipsip age qocnu ehi leginawe,  
     sipsip nag dana bagic cacagogin tilii jeca qee  
     tawenawe,  
 eu odi uqa je oso qee madel.

<sup>33</sup> Saen age cewudodoig tutuc qee gesildoloin.

Uqana cebac bilec maha ina eu gohic men  
 Eunu dana oso uqana sihilnu ihoc qee sil-  
 diaun,” en. *(Aisaia*  
*53.7-8)*

<sup>34</sup> Odocob dana eu Filip sisildon, “Mataga, je hahun madec dana je i innu madena? Uqadodocnufo, qee dana osonu madena?” don. <sup>35</sup> Odocob Filip uqa Aisaiana jaqec je sanan mimei me je weledec jaqec je cunugnadec uqa Jisasnu me je eu silditon. <sup>36-37</sup> Odocob ale jic eu toodu numesi wa osona calesin. Odimesi dana eu madon, “Faga, wa ene nijia. Ija wa joitec oga tenafi in oso

ija cahactigian?” don. [Odocob Filip madon, “Hina Jisasnu wawin cunug meleecebfi wa joc ihoc ogan,” don. Odocob uqa jejeg hewi madon, “Jisas Kraiss eu Anut Melah ija wawi meleena,” don.]

<sup>38</sup> Odocob dana bamig selec eu uqa karis cofdoc dana madocob karis tuluen. Odocob Filip dana bamig selec euca wana numesi Filip dana eu wa jouden. <sup>39</sup> Odocob saen ale wanadec cali becebil Tibudna Kis Filip u hewi nuen. Dana eu Filip haun qee fel qa haun jic eu celeboii toodu nuen. <sup>40</sup> Odocob Filip uqa ija Asdod ene biliga ec maden. Odimeu uqa jobon nagnagna nui me je qaçasali mamadi cocobi nui Sisaria taunna calen.

## 9

### *Sol Jisasnu waug meleen (Aposel 22.6-16; 26.12-18)*

<sup>1</sup> Odogin Sol uqa haunhaun maden, “Ija Tibudna malogom eu aaqigen,” en. Odimeu uqa ihanec dana iloca limei <sup>2</sup> jaqec je Sol uqa Juda agena cuha jonana Damaskas ono agena cofadec ihacadigiannu utennu sisildon. Jaqec je eu maden, “Sol uqa danafo, cajafo Jisasna Jic eu todogina eu gulucadifei hewadi jeladimeu cedadi Jerusalem ene ahugian eu cois,” en. Odocob uqa jaqec je eu uteceb Damaskas ono nuen.

<sup>3</sup> Uqa Damaskas nunui bili taun ben eu cemenug hohon nag odi bahic fulacdoc sao jobondec uqa falei talildon. <sup>4</sup> Odocob uqa mahana toni mahulimeu jejeg oso madocob dah men, “Sol, Sol! Hina eetanu ija jabiti tootootagana?” don.

<sup>5</sup> Odocob Sol sisildon, “Tibud, hina in?” don.

Odocob uqa jejeg hewi madon, “Ija Jisas, hina jabi tootoodogona eu. <sup>6</sup> Euqa cajimeg taun benna laga. Ono oso hina eeta odogannu eu mahigian,” don.

<sup>7</sup> Mamadesinqa dana Sol gami belein eu age je oso mamadi qee tawelein. Age tiliein. Age jejeg dah mein qa dana oso qee felein. <sup>8</sup> Odocob Sol mahanadec cajimei ameg huleldon qa meciecwe qee. Eunu age eben hewalimeig qagasadudu nui Damaskas taun dunuh lein. <sup>9</sup> Odocob deel cijed hedocob uqa meciecwe qee eu odi bilen. Odocob deel eu dunuhna wa gab sabca ha qee jel.

<sup>10</sup> Odocob saen euna malogom oso, ijan Ananaias, uqa Damaskas taunna bilen. Odocob Tibud uqa majaudocna madon, “Ananaias!” don.

Odocob uqa jejeg hewi madon, “Tibud, ija ihen,” don.

<sup>11</sup> Odocob Tibud madon, “Cajimeg jic ijan Tutuc euna nuimeg Judasna jona limeg sisilaga, ‘Dana oso, ijan Sol, uqa Tasasdec ene biliafo?’ aga. Faga, uqa inondudu bilia. <sup>12</sup> Uqa majaudocna dana, ijan Ananaias, uqaca hocob haun meciigiannu eben tatacan meceb mecieia,” don.

<sup>13</sup> Euqa Ananaias jejeg hewi madon, “Tibud, dana inu je mati bahic uqa hinana qagu coboc dana cajaca Jerusalem ono bibilegin ihulahladena ec matein. <sup>14</sup> Odocob uqa jaqec je oso ihanec dana benben agenadec hewi ene hon. Jaqec je eu dana cajaca cunug age hina binain sulegina hewadi jeladimej cedadi Jerusalem ono ehi nuigiannu cois en,” don.

<sup>15-16</sup> Euqa Tibud madon, “Juda dana qee ageca, agena king ageca, Juda dana ageca ija ijani hewi ageca nuecnu ija cabi inu nesili ehudem. Odocob ijadodoc uqa ija ijaninu dain doc ganic ugiannu ihacdugen. Eunu nuuga,” don.

<sup>17</sup> Eunu Ananias cocobi nui jona limei eben Sol tatacan mimei uqa madon, “O coti Sol, Jisas Tibud jic homna hina camas men uqadodoc hina haun meciegannuca, Kis Gun am bec ogannuca sulteceb huga,” don. <sup>18</sup> Odocob mahuc bahic ceteh oso dool gonon cinigwe Sol amegnadec cagati toneceb meciimei ceteteh meciaden. Uqa caji taweceb Ananias wa jouden. <sup>19</sup> Odocob hibna uqa sab jimei uqana gagadic odoc haun ceseli on.

*Sol Damaskas ono me je maadec cabi on*

Odocob Sol uqa malogom gami age Damaskas ono deel osooso ageca bilein. <sup>20</sup> Uqa Juda agena cuha jonana limei Jisasnu me je maaden, “Jisas uqa Anut Melah,” aden.

<sup>21</sup> Odocob cunug uqa je eu madeceb dumeig tumatumaein. Odimeig sisilein, “Dana i uqa qeefo Jerusalem ono dana cajaca age ijan i binan sulegina eu aqena? Odocob uqa dana caja enedec hewadi jeladimeihanecc dana benben ageca ehadi Jerusalem ono ehi ligiannu ene qee holfo?” ein. <sup>22</sup> Euqa Solna me je madec eu gagadic odocca bahic haun men. Odocob uqana je madec Jisas uqa Anutna Kraiss eu mele bahic fimeig Juda dana Damaskas bilein age uqa jejeg hewi madocwe qee.

*Juda dana age Sol cad mudecebil busalen*



<sup>23</sup> Odocob hibna deel mati hedocob Juda dana cegulimeig Sol qoqagannu je togodoin. <sup>24</sup> Euqa age uqa Juda dana age qihuqagannu je togodogina ec doin. Juda age cahineg witicca uqa qoqagannu taun ben uqana jic cebec ben eu cofdoloig. <sup>25</sup> Euqa witic osona uqana malogom age ehudimeig gel ohis isec cebec nag osona mudegin leceb galelna tacimeig halu hehewegin maha gemo tonen.

### *Sol Jerusalem ono bilen*

<sup>26</sup> Odocob Sol uqa Jerusalem ono limei Jisasna malogom gabanadiannu odon. Euqa age uqa malogom oso ec mele qee elein. Odimeig age cunug uqa cucuidoin. <sup>27</sup> Euqa Banabas uqa Sol cesuldumei je maadigia ehudi aposelca ehi len. Uqa Damaskas jicna Tibud Solca camas mimei je madonnu sildiaden. Odimeig Sol uqa Damaskas ono Jisas ijanna me je saluqi u maadennu saaden. <sup>28</sup> Odocob Sol uqa age gami Jerusalem ono cudun cunugna me je Jisas Tibud ijanna saluqi u mamadi coboin. <sup>29</sup> Odocob uqa Juda dana Grik je madoloig eundecca ha je madoloig. Odimeig fee dadanoloig. Eunu qoqagannu odoin. <sup>30</sup> Saen wawaga meleec cotugul age dumeig Sol umeig ehudi Sisaria taun ono numeig suldocobil Tasas taunna nuen.\*

<sup>31</sup> Odocob eunu tamanec Judia hatunaca, Galili hatunaca, Sameria hatunaca malol bibileig age

---

\* **9:30:** Hibna Banabas uqa Sol ehudi Antiok ono nuigiannu gale don. Odimeig uqa waludecnu Tasas ono nuen. Age Aposel 11.25 feiga.

gagadic tawein. Age Tibud binan susuli cocobogin Kis Gun cesulaaden dana cajaca me jenu meleec fulusdon.

*Pita Inias me muden*

<sup>32</sup> Odocob Pita hatu cunugna cobon. Odocob saen osona uqa Anutna qagu coboc dana cajaca leih age Lida jobon ono bilein eu meciadigiannu non. <sup>33</sup> Ono uqa dana oso ijan Inias gulucdon. Inias uqa jaih ebenca laleg mecnu uqana cabalnadec cabi gel 8-pela odi oso qee toni coboloi. <sup>34</sup> Odocob Pita uqa madon, “Inias, Jisas Kraiss hina me mihia. Cajimeg hinana cabal eeldoga,” don. Odocob mahuc bahic Inias cajen. <sup>35</sup> Odocob dana cajaca cunug Lida jobonca, Saron hatunaca ono bilein uqa fimeig falicdumeig Tibudnu wawaga meleen.

*Pita uqa Tabita tulidocob ceseli cajen*

<sup>36</sup> Odocob Jopa taun ono malogom caja oso ijan Tabita bilen. Uqa ijan Grik agena jena eu Dokas. Uqa saen cunugna meme mamadi dana sawen cesuladoloi. <sup>37</sup> Saen euna uqa hag umei cal men. Odocob uqa deweg ganac wa joudimeig jo hamol ohisna mudecebil nijen. <sup>38</sup> Odocob Jopa taun eu Lida jobon cemenug nijen eunu saen malogom Jopadec Pita uqa Lida ono bilia ec dumeig age dana lecis je osoca sulalecebil belesin. Ale cesusdudu madosin, “Cain culugaun! Eleca hocom beloqa!” dosin. <sup>39</sup> Eunu Pita saciadocob dana lecis eu ale gami ceseli belein. Saen uqa hu Jopa caleceb ehudi jo hamol ohis ono ehi tein. Caja wij cunug ceguli Pita talildu tawein. Saen Dokas uqa cebac bibili bilei lotoc mudiaden eu age qaqaji

bileig hewi Pita ihacdoin. <sup>40</sup> Euqa Pita cegulein eundec cunug ititacadimei uqa gob cehi inondon. Odimei Pita uqa waldumei deweg ganac mecidudu madon, “Tabita cajaga!” don. Odocob uqa ameg camalimei Pita fecidon. Odimei caji bilen. <sup>41</sup> Pita eben hewimei cesuldocob cajan. Bibilen Anutna qagu coboc dana cajaca, caja wijca maadeceb tecebil cajeia cebac bilia aden. <sup>42</sup> Odocob je Jopa cunug nui ihoc len. Odocob dana cajaca mati bahic Tibudnu wawaga meleen. <sup>43</sup> Pita uqa deel mati Jopa taun ono dana ijan Saimonca bilesin. Saimon uqa dool ganac lotoc cinigwe mudec cabi oc dana.

## 10

### *Ensel cali humei Konilias je oso madon*

<sup>1</sup> Odocob dana oso, ijan Konilias, uqa Sisaria taun ono biloloi. Uqa Rom agena han dana am 100 agena ilo oso. Uqana am ijan eu “Hannu Am Italidec.” <sup>2</sup> Uqa cuha fec dana. Uqaca, uqa aidegca, uqa talaculca age cunug Anut himec gaid binan suloloig. Uqa Juda dana sawen eundec geh bahic cesuladoloi. Odimei uqa Anut gaid inondoloi. <sup>3</sup> Odocob wesu osona 3 kilok eu odi uqa majaudocna Anutna ensel uqaca camasac mimei madon, “Konilias!” don.

<sup>4</sup> Odocob uqa cucui bahic imei ensel gugca mecidumei madon, “O Tibud, adi odeia?” don.

Odocob ensel jejeg hewi madon, “Anut hinana inondoc dah meia, hina dana sawen cesuladagana eu feia. Eunu hinanu dahig bilia. <sup>5</sup> Odocob dana oso, ijan Saimon age Pita egina, uqa Jopa

ono bilia. Dana leih uqa ene ehudi ahocnu suladecem beleiga. <sup>6</sup> Uqa dool ganac lotoc cinigwe mudec cabi oc dana, ijan Saimon, uqana jona macas\* cool ono bilia,” don. <sup>7</sup> Odimej en sel Konilias je madu hedumei haun jausen. Odocob Konilias uqana jo cofdoc cabi dana lecisca, uqa han dana oso uqa cuha fec dana uqaca utaadeceb hoin. Han dana i uqa han dana gaid Konilias cofdoloig eundec oso. <sup>8</sup> Odimej Konilias uqa majaudocna madonnu saadimej suladeceb Jopa ono belein.

*Pita ceteh oso majaudocna fen*

<sup>9</sup> Belimeig deel osona age wele Jopa cemenug dodoldodogin Pita jo qab ohis cam gemo cehen tatawen odi inondugiannu ten. <sup>10</sup> Odimej uqa wen docob sab jigianu cison. Odocob age sab wele saciadodogin uqa majaudocna fen. <sup>11</sup> Odocob uqa sao jobon jic cebec hudeceb ceteh oso lotoc ben cinigwe sucun 4-pelana halu qagec hewen mahana nenen fen. <sup>12</sup> Odimej uqa dool filfil mahana coboginaca, man sononec filfilca, man fululec filfil saona coboginaca lotoc ben euna bibilegin feciaden. <sup>13</sup> Odocob jejeg oso madon, “Pita! Cajaga, aqimeg jaga!” don.

<sup>14</sup> Euqa Pita madon, “O Tibud, qeeo. Ija wele ceteh qee eeldoc gegehincan oso qee jelem,” don.

<sup>15</sup> Odocob jejeg eu haun madon, “Ceteh oso Anut eeldon gegehincan qee eu hina qee eeldoc cain agaun,” don. <sup>16</sup> Eu odiodi cijeddon. Odocob ceteh eu haun sao jobon ceseli ten.

---

\* **10:6:** Macas eu Mediterenian Macas.

<sup>17</sup> Odocob Pita uqa majaudocna fen eu uqana gugnu jaen qoqon bilen. Saen euna dana Konilias suladen eu age Saimonna jonu sisilaadeig age li jic cebec benna tawein. <sup>18</sup> Odocob age utai sisilein, “Dana oso, ijan Saimon age Pita egina, jo ina biliafo?” ein.

<sup>19</sup> Odocob Pita uqa majaudocna fen eu uqana gugnu gagadic cisdodon Kis uqa madon, “Faga! Dana cijed hina walihegina age ene hoiga taweiga. <sup>20</sup> Hina saciadumeg toni noga. Eu age ija suladecemin hoiga eunu hina age gami nuecnu cain culumen heiaun,” don. <sup>21</sup> Odocob Pita toni numei maaden, “Dana age walegina eu ija ihen. Age eetanu hoiga?” aden.

<sup>22</sup> Odocob jejeg hewi madoin, “Konilias, uqa Rom agena han 100 agena ilo, uqa sulgeia. Uqa ititom dana Anut binan sulinanu Juda dana cunug eu age uqa jejeg toodu cuhadogina. Odocob Anutna ensel oso Koniliasca humei odi madon, ‘Hina Saimon Pitana je oso suldoga. Uqa hinana jona hocob uqana je dah megan,’ don. Odocob eunu sulgeceb ene hoqa,” doin. <sup>23</sup> Eunu Pita dana cijed eu age maadeceb lecebil witic osol jo euna nijein.

Odocob deel osona uqa saciadocob uqa age gami belein. Odocob wawaga meleec cotugul leih Jopadec todocobil osoben belein.

### *Pita Koniliasna jona nuen*

<sup>24</sup> Odi belimeig deel eu todocob age li Sisaria taun ono calein. Ono Konilias sumadi bibilen lein. Uqa uqana sihulca danahca maaden hocobil osoben bilein. <sup>25</sup> Saen Pita jo hamol ligia oodon Konilias uqa hu ceguldon. Odimei Pita

olana gob cehi jaihna toni mahulimei Pitanu cuha fen. <sup>26</sup> Euqa Pita uqa madon, “Ijaha dana mahanadec himec. Caji tawaga,” docob cajen. <sup>27</sup> Odocob Pita uqa Konilias je madodon jo hamol lesin. Odimei dana geh bahic cegulein bibilegin meciaden. <sup>28</sup> Odocob Pita maaden, “Agedodoc eu dogina, Juda agena loo je odi madena, ‘Juda dana age Juda dana qee eundec agena jona cain lowain, age gami cain ihol mowain,’ ena. Euqa Anut ija dana oso hina qee eeldocfo, gegehincrafo ec cain madagaunnu eu ihacten. <sup>29</sup> Eunu age ija ehitecnu suladein eunu huga, ija jeca qee. Ija age sisiladegina, age eetanu ijanu suladecebil leigan?” aden.

<sup>30</sup> Odocob Konilias madon, “Deel cijed hedoia saen i edina 3 kilok wesu odi euna ija ijana jona inondudugin mahuc bahic dana lotoc fuladocca tacimei hu ija olanina tawen. <sup>31</sup> Odimei maten, ‘Konilias! Anut hinana inondoc dah meia, hina dana sawen cesuladagana eu feia. <sup>32</sup> Dana oso, ijan Saimon, age Pita egina uqa Jopa ono bilia. Uqa dool ganac lotoc cinigwe mudec cabi oc dana, ijan Saimon, uqana jona macas cool ono bilia. Eunu dana leih uqa ene ehudi ahocnu suladecem beleiga,’ ten. <sup>33</sup> Odocob eunu ija hinanu mahuc bahic suladem. Hina hoganu ege hegaga mahogona. Odocob qila ege cunug Anut amegna ceguluqa. Ege susumihi eeta magegannu Tibud hina maheia eu dah mecnu biluqa,” don.

*Pita uqa dana cajaca Koniliasna jona bilein eu je maaden*

<sup>34</sup> Odocob Pita co suli umei maaden, “Anut uqa jic osolna dana cunug maha ina cofadena eu mele bahic ija qila dugina. <sup>35</sup> Juda danafo, qee Juda dana qeefo, in oso uqa Anut cumundonaca uqa kobol tutuc odonaca uqa Anut amegna me bilina. <sup>36</sup> Me je Anut uqa Isrel dana ageca suldon eu age dogina. Me je eu qila Jisas Kraisna dana cunug age Anutna malol euca bilecnu ihoc en. Jisas uqa dana cunug agena Tibud. <sup>37</sup> Age dogina, Jon uqa wa joadecnu me je maaden. Odocob hibna odoc benben Galili hatu ono sanan mimei Isrel maha cunugna ihoc len. <sup>38</sup> Age dogina, Anut uqa Kis Gunca gagadic odocca Jisas Nasaretdec ilona basecdocob nen. Anut uqaca bilen. Eunu uqa cudun cunugna dana cunug age Seten cilehaden eu me mamadi kobol me oodi cobonnu eu age dogina. <sup>39</sup> Odocob uqa Juda agena hatunaca, Jerusalemca odoc cunug oodon ege fimeb qasali maadoqona. Age uqa na babalecna tuitu qumeig caqusecebil caculimei cal men <sup>40</sup> qa Anut deel cijeddocna tulidocob cal mecnadec ceseli cajimei amagana camasac men. <sup>41</sup> Uqa dana cunugnu qee camasac mel qa dana leih himec amagana camasac men. Ege Anut uqana odoc fecnu nesili cedigen, ege uqa cal mecnadec ceseli cajeceb uqa gami wa gab sabca jom ege eundec himec amigena camasac men. <sup>42</sup> Odimei Jisas uqa ege dana cajaca me je qasali maadecnu magen. Jisas uqa dana cebac bileginaca dana cal meinca gesiladigiannu Anut uqa wele nesili ehuden eunu dana cajaca sildiadecnu magen. <sup>43</sup> Je hahun madec dana cunug age Jisasnu madein, cunug age Jisasnu wawaga meleena Anut uqa

Jisas ijanna agena silail cagasiadigian ec madein,” aden.

*Juda si huldec qee age Kis Gun oin*

<sup>44</sup> Saen Pita uqa je mamaden ono bibili me je dah mein ageca cunug Kis Gun toni nen. <sup>45</sup> Odocob Juda dana wawaga meleec Pita gami Jopadec hoin age Anut Kis Gun bagolwe suldocob neceb Juda dana qee ageha oin eu fimeig tumatumaenin. <sup>46</sup> Ge, age beilamaga filfilna Anut uqana gagadic odocnu binan susulegin dah madein. Odocob Pita jejeg suli u maden, <sup>47</sup> “Ege Kis Gun omwe dana i age odi Kis Gun oiga. In uqa wana wa joadecnu cahacadigian?” aden. <sup>48</sup> Odocob uqa Jisas Kraiss ijanna wa joadecnu je gatiti maaden. Odimeig age deel leih uqa gami biluqagannu ninidoin.

## 11

*Pita tamanec Jerusalem bilegina Juda si hul eundec qee ageha Kis Gun oin ec maaden*

<sup>1</sup> Aposel wawaga meleec cotogailca age cunug Judia hatu ono ilag bilegina age Juda dana cajaca qee ageha Anutna me je wele oin ec doin. <sup>2</sup> Saen Pita Jerusalem teceb Juda dana wawaga meleec age leih Juda dana qee eundec dewenega cagu qocnu gale adena eu age Pita jajabi madoin, <sup>3</sup> “Hina eetanu Juda dana qee age naguc lecem deel leih nijimeig osoben sab jein?” doin.

<sup>4</sup> Euqa Pita mamadi gug qumei je cunug saaden, <sup>5</sup> “Ija Jopa taunna ono inondudugin majaudocna ihacten. Ija ceteh oso lotoc ben cinigwe sao jobondec sucun 4-pelana halu qagec hewen mahana



nenen fem. Nimei ija cemeni tilien. <sup>6</sup> Ija gugca fecidumig dool filfil mahana coboginaca, man sononec filfilca, man fululec filfil saona coboginaca lotoc ben euna bibilegin fem. <sup>7</sup> Odocob jejeg oso maten, ‘Pita! Cajimeg oso qocom cal meceb jaga!’ ten. <sup>8</sup> Euqa ija madom, ‘Tibud, qee bahic! Sab gegehinca qee eeldoc oso ija qee jelem,’ dom. <sup>9</sup> Odocob jejeg sao jobondec haun maten, ‘Ceteh oso Anut eeldon eu hina qee eeldoc ec cain madagaun,’ ten. <sup>10</sup> Eu odiodi cijeddocob ceteh cunug haun sao jobon ceseli ten. <sup>11</sup> Saen euna bahic dana cijed Sisariadec Konilias uqa ijaca suladen eu jo ija bilem euna lein. <sup>12</sup> Odocob Kis eu uqa age gami nuecnu geh cain cisdogaun ec maten. Ija wawaga meleec cotiel 6-pela Jopadec i age gami osoben Sisaria taun ono belom. Odimeb Koniliasna jona li bilom. <sup>13</sup> Odocob uqa ensel uqana jona li tawimei madonnu sagen. Ensel uqa madon, ‘Oso suldocom Jopa ono nuimei dana, ijan Saimon age Pita egina, ehudi ahoia. <sup>14</sup> Uqa age je maadigian euna hinaca, age cunug hinana jona bileginaca Anut cahahaadigian,’ don. <sup>15</sup> Odocob saen ija je sanan mi maaadigin Kis gun gug qocna egeca toni nenwe eu odi ageca toni nen. <sup>16</sup> Odocob ija Tibud maden, ‘Jon uqa wana wa joaden qa age Kis Gunna wa joadec oqagan,’ en eunu cisdom. <sup>17</sup> Weleca ege Jisas Krai Tibudnu wawige meleeceb Anut Kis Gun bagolwe igen. Odocob qila Anut uqa bagol i ege igenwe dana i ageha aden. Eunu ija cel dana Anut cahacdocwe ihoc?” aden.

<sup>18</sup> Saen age eu odi dah mimeig age Pitanu je madein eu culein. Odimeig Anut binan susuleig

madein, “Anut odadeceb Juda dana qee eundec ageha agena silailnu tului falicdumeig cebac bilec catanec oqagan!” ein.

*Antiok ono tamanec haun calen*

<sup>19</sup> Juda dana wawaga meleecca age saen Stiwen qoinna age jajabi tootoodecebil buadein eundec leih age Finisia hatuca, Saipras nuica Antiok taun isec age cocobi li Juda dana eundec dih me je maaadi belein. <sup>20</sup> Euqa Juda dana wawaga meleecca leih Saipras Sairinica dec Antiok taunna belimeig Juda dana qee eundecha Jisas Tibudnu me je qasali maadein. <sup>21</sup> Tibud uqana gagadic odoc eu ageca bilen. Odocob dana am matica Jisasnu wawaga meleeccecb Tibudca falicdoin.

<sup>22</sup> Odocob je eundec ti Jerusalem tamanecna caleceb dah mimeig age Banabas suldocobil Antiok ono non. <sup>23-24</sup> Banabas uqa dana me bahic, uqa Kis Gun am bec waug meleec ben bahic. Saen uqa ono li calimei dana cajaca age Anut amegna me bibilegin fimei uqa waug celeboeccecb hulunuga cecehi maaden, “Age wawaga culunuga cunugca Tibudnu meleen eunu dahiniga hewegina,” aden. Eunu dana caja geh bahic Tibudnu wawaga meleen.

<sup>25</sup> Odimei Banabas Sol waligiannu Tasas ono nuen. <sup>26</sup> Odimei uqa ono li gulucdumei ehudi Antiok ehi hon. Cabi gel osol cunugca tamanec onodecca gabandumeig am ben Jisas Tibudnu me je iwaladesin. Eu Antiok ono malogom age casac Kristen adein.

<sup>27</sup> Saen euna odi je hahun madec dana leih Jerusalemdec Antiok ono noin. <sup>28</sup> Agenadec oso

eu ijan Agabus caji tawimeï Kis odocna nag odi bahic maha cunugna sabnu cahel qugian ec maaden. Odocob saen Klodias uqa Rom agena king, Sisa, bibilen sabnu cahel qon. <sup>29</sup> Odocob malogom age je oso cagoin. Age osolosol agena meen qaig ganic besecwe ihoc cisdumeig age wawaga meleec cotogail Judia hatu ono bilegina cesuladecnu meen qaig leih sulduadoqagan ein. <sup>30</sup> Odi odimeig age meen qaig Banabas Solca alecebil ehi nui Judia hatu ono tamanec matu adesin.

## 12

*Herod Jems qocob cal men odocob Pita gihacdoc jona muden*

<sup>1</sup> Saen euna odi King Herod\* wawaga meleec tamanec dana leih hewi aqecéb qee moqagannu sanan men. <sup>2</sup> Uqa uqana han dana maadeceb age Jems, uqa Jon waliag, han siginna qocobil cal men. <sup>3</sup> Saen Herod uqa uqana odoc Juda dana gale aaden fimeï uqa uqana han dana maadeceb age Pita gihacdoc jona mudoqagannu hewein. Uqa Juda dana age bred jisca qee jec saenna odi odon. <sup>4</sup> Odocob age Pita hewimeig gihacdoc jona mudein. Odimeig age Pita han dana am 4-pela 4-pela ebenegana mudecebil cofdoin. Herod uqa Pasowa ja qoc saen hedocob dana gelgel amagana Pita gesildumig qocomin cal migian ec cisdon.† <sup>5</sup> Eunu age Pita gihacdoc jona cofdodogin bilen.

---

\* **12:1:** King Herod i uqa Herod eu Maria Jisas basecdon saenna king bilen eu asag. Eu King Agripa memeg. † **12:4:** Age je Mak 14.1na nijia eu feiga.

Euqa dana cajaca tamanec age gagadic bahic Pitanu Anut inondoin.

*Ensel Pita gihacdoc jonadec ehuden*

<sup>6</sup> Odocob witic euna han dana cofdoc lecis ale tatawesi Pita gemo mudecebil us nijen, cojageceb Herod uqana han dana suladeceb age ehudimeig gesilec cudunna mudecebil qoqagannu. Uqa sen lecisna qagein. Odocob gihacdoc jo cebecna han dana cofdoc ageha cofdu tawein. <sup>7</sup> Nag odi bahic Tibudna ensel ono taweceb fulacdoc ono hamol cujawen. Odocob ensel Pita qeih tudocob cajeceb madon, “Mahuc cajaga!” don. Odocob sen Pita ebennadec mahuc bahic filicihdu tonen. <sup>8</sup> Odocob ensel madon, “Hinana lotoc haluca, jaim tacec haluca qagaga,” don. Odocob Pita lotoc halu jaih haluca qageceb ensel haun madon, “Hinana duan lotoc tacimeg tootaga,” don. <sup>9</sup> Odocob Pita ensel todocob gihacdoc hamolnadec cali hosin. Euqa ensel hu ehuden eu uqa bebeligina ec cisdon. Eu mele uqa qee dol. <sup>10</sup> Odocob gihacdoc jo cofadec dana tawegina aqunec tawein cudun eu wooldosin. Odimesi tesi oso eu todoc ha wooldosin. Odocob qila eu cit qoc cebec ben ainna mudein taun benna nuen eu gulucdosin. Odocob cebec ben eu uqadodoc hudeceb cali lesin. Limesi ale jic nag eu toodu numesi ensel Pita culden.

<sup>11</sup> Odocob Pita qila ensel culdi qisacdocob cisdoc fogo don. Odimej maden, “Eu mele bahic qila ija dugina! Tibud uqana ensel suldocob nimej Herod ebennadec Juda dana ija adi odituqagannu, cisdoginanadecca cacawitia,” en.

<sup>12</sup> Odocab uqa gihacdoc jonadec cali honnu cisdudu uqa Maria, Jon uqa ijan oso eu Mak anagna jona nuen. Uqana jo euna dana cajaca mati bahic inondudu cegulein bibilegin len. <sup>13</sup> Odocab Pita jic cebec maha gemo isec gohugohudon. Odocab cabi mel aid, ijan Roda, uqa in gohugohudona figiannu len. <sup>14</sup> Odimei mel aid Pita jejeg dah mimei waug celeboeceb Pitana jic cebec qee huditoc guguli ceseli limei Pita maha gemo taweia ec maaden. <sup>15</sup> Euqa age madoin, “Hina gad,” doin. Euqa uqa eu mele bahic mele ec cesusaadi maaden. Odocab age madoin, “Eu uqa dolog,” doin.†

<sup>16</sup> Oodogin Pita tawimejic jic cebec haun gohugohudon. Odocab age jic cebec hudi age uqa fimeig filicitein. <sup>17</sup> Euqa uqa ebenna cahacaden. Odimei uqa Tibud adi cesuldu gihacdoc jonadec ehudi cali hoiannu sildiaden. Odimei uqa maaden, “Je i Jems wawaga meleec cotugulca maadeiga,” aden. § Odimei uqa culadi cudun osona nuen.

<sup>18</sup> Cojageceb gihacdoc jo cofdoc dana ben bahic dadanein. Age mamadiein, “Pita ana isec nuian?” ein. <sup>19</sup> Odocab Herod Pita waloqagannu je gatiti maaden qa age fecwe qee. Eunu uqa gihacdoc jo cofdoc dana sisiladeceb qee fecebilfi aqecebil cal moqagannu je gatiti maaden.

---

† **12:15:** Saen euna Juda mati age odi wawaga meleen. Dana cunug age osolosol ensel oso uqana bilina, eu dana cofdona. Odimei saen osona eu dana ola fecnu cinigwe camasac calena.  
 § **12:17:** Jems i uqa Jisas waliag, uqa Jerusalem tamanec cofadec dana oso. (Age Gal 1.19 feiga.) Jems uqa Jon waliag age qocobil cal men. (Age but 2 feiga.)

Odimei uqa Judiadec Sisaria taun numei ono nag odi bilen.

### *Herod cal men*

<sup>20</sup> Herod uqa dana cajaca Taia Saidondeccanu gemag gagadic bahic ben. Eunu age gaban-dumeig amnana Herod foqaga lein. Hahawan age Blastas cesusdocobil agena isec hon. Uqa kingna jo bennu ilo. Odimeig agena taun ben cunugca King Herodna hatunadec sab oloignu age Herodca limeig malol bilecnu sisildoin.

<sup>21</sup> Odocob gesilec deel osona Herod uqana kingnu lotoc tacimei uqana bilec cabal balabal-acana bilimei dana je maaden. <sup>22</sup> Odocob age utai madein, "Eu dana qee madel. Eu anut oso madeia!" ein. <sup>23</sup> Euqa Herod uqa Anut qee binan sulel. Eunu mahuc bahic Tibudna ensel Herod qocob tonen. Odimei uqa gumac qu jejegin cal men.

<sup>24</sup> Euqa Anutna me je ben dumei hatuhatu cunug nuen.

<sup>25</sup> Odocob Banabas Solca alena cabi Jerusalem onodoc odoc eu cunug ihoc leceb ale Jerusalemdec Jon uqa ijan oso eu Mak ehudecebil Antiok ono ceseli belesin.

## 13

### *Age Banabas Solca tamanec gug cehecnu cabinu nesili ehalimeig sulalein*

<sup>1</sup> Antiok tamanecna je hahun madec dana iwaladec dana leihca bilein. Eu age Banabas, Simion age Naija\* dogina, Lusias uqa Sairinidec,

---

\* **13:1:** Ijan Naija uqana gug eu "Cudu Dana." Eunu dana leih age Simion eu Afrikadec ec cisdogina.

Manejen uqa Herod gabman dana uqana begabeg meh, Solca. <sup>2</sup> Odocob saen age Tibud binan susuli cud bibilegin Kis Gun maaden, “Banabas Solca cabi mugumula mem eu ija aligennu qagualeiga,” aden.

<sup>3</sup> Odocob age cud bibilegin inondoin. Odimeig ebenega ilomolana mimeig sulalecebil belesin.

*Ale Saipras nui ono me je maadesin*

<sup>4</sup> Odocob Kis Gun Banabas Solca sulaleceb Selusia taun ono numesi onodec wag umesi Saipras nuina macas gemo ono lesin. <sup>5</sup> Saen age Saipras taun Salamis ono calimeig Juda dana agena cuha jona Anutna me je maadesin. Ale Jon gami cabinu cesulaligiannu osoben belein.

<sup>6</sup> Odocob age Saipras nui cunug cobimeig Pafos taunna calein. Ono age ceeh dana oso gulucdoin. Eu ijan Ba-Jisas. Uqa Juda dana agena je hahun madec dana uhulec. <sup>7</sup> Uqa Saipras nui agena ilo Segias Polasca gami bilesin. Segias Polas uqa doc dana. Odocob uqa Banabas Solca ale uqaca hocnu je oso suldualen. Uqa Anutna me je dah mecnu gale don. <sup>8</sup> Euqa ceeh dana eu, uqa Grik jena ijan Elimas, uqa Banabas Solca cahacaligia odon. Uqa Saipras ilo dana waug meleecdainnu fanindugia odon. <sup>9</sup> Odonqa Sol, uqa ijan oso Pol,† Kis Gun am bec uqa ceeh dana eu gugca mecidon. <sup>10</sup> Odimei madon, “Hina Seten melah! Hina ititom coboc cunug agena cad. Hina wawin uhulec je

---

† **13:9:** Ijan Sol eu Hibru jenadec, odocob ijan Pol eu Grik jenadec. Dana leih age odi cisdogina. Sol uqa Grik je madec eundec me je qasali maadecnu cabi sanan men. Eunu uqa saen euna uqa ijan Grik jena ibuldon.

qaudocca cacawac. Hina Tibudna tutuc coboc siho qocnu gaidgaid temdogona! <sup>11</sup> Faga, Tibud eben qila hinaca nigian. Odocob hina amen galuc migian. Odocob hina cahineg camajac nag qee fagaun,” don.

Odocob mahuc bahic huduhut gagatucca cinigwe ni ameg jahuldodon Elimas tebandon. Odocob uqa oso jic gimdugiannu megen. <sup>12</sup> Odocob dana ilo uqa Tibudna kobolkobol iwaladecnu fimei filiciten. Eunu uqa feceb waug meleen.

*Ale Antiok ono Pisidia hatu nagna cabi osin*

<sup>13</sup> Odocob Pol uqa dana gami beleinca wagna Pafosdec Pega taunna belein, eu Pamflia hatu nag ono. Euqa Jon ono culadi Jerusalem ceseli nuen. <sup>14</sup> Odocob age cocobi Pegadec belimeig Antiok Pisidia taun ono hu calein. Odocob Juda agena cuha deelna age Juda agena cuha jona li bilein. <sup>15</sup> Odocob age Mosesna loo je gunnadec sanijimeig je hahun madec dana agena jaqec je ha sanijimeig cuha jona ilo dana agena je oso sulduadein. Eu odi madein, “Cotigeil, age dana cajacanu cesuladec je osocafi maadeiga,” ein. <sup>16</sup> Odocob Pol caji tawimei eben suli u maaden.

“Isrel dana age, Juda dana qee age Anut binan sulegina, ageha doiga! <sup>17</sup> Isrel dana agena Anut ege jajanigeil nesili cedadimeig uqana odocna Isrel dana Isip hatuna bibileig sihul ben bahic fulusdon. Odocob Anut uqana gagadic odocna Isipdec ceseli cedaden. <sup>18</sup> Odimeig cabi gel 40 odi wadauna



camuhulaadi coboloi.† 19 Odocob uqa sihul benben 7-pela Kenan hatuna odadeceb fadalecebil agena hatu eu uqa Isrel dana mugumuga maden. 20 Cabi gel 450 lelen age ceteteh eu cunug odoin,” aden.

“Hibna uqa gesiladec dana aadi li je hahun madec dana Samjuelna saen calen. 21 Odocob Isrel dana age kingnu sisildoin. Eunu uqa Sol agena king muden. Uqa Kis melah, Benjaminna sihulnadec. Odocob uqa Isrel agena king cabi gel 40 bilen. 22 Odocob Anut uqa Sol qee mudimei Dewid uqa Isrel agena king muden. Anut Dewidnu je oso edi maden, ‘Dewid Jesi melah dana eundecnu ija gale tena. Dana i ija je madocominfi odi toodu odigian,’ en. 23 Odocob wele Anut uqa je hahun oso Jisasnu maden. Anut odudeceb Jisas uqa Dewidna sihulnadec hibna caligian. Anut uqa Isrel dana cahahaadigiannu Jisas i Isrel aden. 24 Jisas uqa cabi qee sanan mec ninijen Jon uqa Isrel dana agena silailnu tului falicdumeig wa joc oqagannu me je maaden. 25 Odocob saen Jon uqana cabi oc qee migia oodon uqa dana maaden, ‘Age ija in ec cisdogina? Dana age sumudegina eu ija qee. Euqa dana oso uqa ija tootec hib hona, uqa ija wooltec, uqana jaih tacec eu ija hulitocnu me bahic ihoc qee,’ aden,” aden.

26 “O cotiel, Ebrahimna sihul, Juda dana eundec qee age Anut binan sulegina eu, me je i Anut dana cahahaadecnu eu Anut egeca suldon! 27 Anut cahahaadecnu je eu dana Jerusalem

---

† 13:18: Dana leih age but i odi madena, “Odimei cabi gel 40 odi wadauna cofaadi coboloi,” ena ec cisdogina.

bilegina agenu dana Jerusalem bilegina agena iloca age uqa agena cahahaadec eu qee felein. Age je hahun madec dana agena jaqec je cuha deelna gaid sanijegina euha wawaga qee fogo dona. Euqa age jaqec je eu toodumeig Jisas um qudein. <sup>28</sup> Uqa dewegnu balijimeig qocobil cal mecnu je qee felein qa age Pailat qocob cal migiannu sisildoin. <sup>29</sup> Odocob age Anutna jaqec je uqanu madena ihoc ligiannu odi toodu hedocobil age na babalecnadec umeig ehi nui heelna mudein. <sup>30</sup> Euqa Anut cal mecnadec haun tulidocob cajen. <sup>31</sup> Odocob deel mati bahic dana uqa gami Galilidec Jerusalem tein age amagana camasac mimien. Age uqa feinnu qila Isrel dana cajaca qasali maadegina. <sup>32</sup> Eunu ege ene me je i maadecnu hoqa. Je hahun Anut wele ege jajanigeil maaden eu <sup>33</sup> qila egena saenna Anut odocob je hahun eu egenu camasac men. Anut Jisas cal mecnadec haun tulidocob cajen. Eu odi Buk Song dac lecisdocna jaqec je taweiawe madena:

‘Hina ija melami.

Qila ija hina memen caliga,’ ena. *(Buk Song 2.7)*

<sup>34</sup> Anut Jisas cal mecnadec tulidocob cajen eu deweg qee huluoiaunnu uqa je odi maden:

‘Eldoc je gagadic odocca ija wele Dewid je hahun madom eu ihigen,’ en. *(Aisaia 55.3)*

<sup>35</sup> Eunu Anut uqa je osoha Buk Song jaqec je osona maden:

‘Hina hinana dana gun culdocom deweg qee huluoiaun,’ en. *(Buk Song 16.10)*

<sup>36</sup> Ge, Dewid uqa bilen saenna Anut gale doc eu toodu odon. Odimei cal meceb uqa jajana-gail qehemegana isec heel cisein. Odocob cal mecna deweg huluen. <sup>37</sup> Euqa dana eu Anut cal mecnadec tulidocob cajan eu deweg qee huluel. <sup>38</sup> Cotigeil, dah meiga. Ija me je i maadigina. Dana ina himec Anut uqa agena silail cagasiadena. <sup>39</sup> Odocob age Mosesna loo je toodoginana dih Anut uqa agena silail cagasiadecwe qee. Euqa age dana inu wawaga meleecebfi uqa ihoc agena silail cagasiadigian. <sup>40</sup> Eunu je hahun madec dana madein eu ageca calecdainnu batut feiga. Age odi madein:

<sup>41</sup> 'Age Anut madena cewudegina eu feiga!

Agena saenna odoc oso ija odigina.

Eunu wawaga dadaneceb cal meiga!

Dana oso odoc inu sildiadecebfi age wawaga qee meleeiaun!' ein," aden. (*Habakuk 1.5*)

<sup>42</sup> Odocob Pol Banabasca cuha jonadec cajesin nuuwasa oodosin dana age cuha deel osona humesi me je haun madecebil doqagannu cesusaali maalein. <sup>43</sup> Odocob dana cegulec eunadec wele budocobil Juda danaca Juda dana qee eundec age Juda agena kobol toodoginaca mati bahic age Pol Banabasca tooalein. Pol Banabasca waldumesi dahiniga hewec je maadimesi Anutna eeladec uqa uum aden euna bilecnu cesusaadi maadesin.

<sup>44</sup> Odocob cuha deel osona dana cajaca cunug bahic odi age taun euna bilein Anutna je dah moqagannu cegulein. <sup>45</sup> Euqa saen Juda dana eu age dana am ben cegulein eu meciadimeig age Polnu heel mimeig je eu mele qee ec mamadeig

Polnu je me qee mamadiein. <sup>46</sup> Odocob Pol Banabasca ale je saluqi u maadesin, “Ele casac Anutna me je maadouhqa age je eu hibemdogina. Odocob agedodoc madegina ege euna cebac bilec catanec eu ocwe qee egina. Eunu ele age cuculadi Juda dana qee eundecca lowona. <sup>47</sup> Ge, eu odiwe Tibud uqa ege je gatiti magen:

‘Tja Juda dana qee eundecnu hina fulacdocwe mihigina.

Hina dana mahamaha cunug bilegina eundec

Anut cahahaadigiannu cesuladegan,’ gen,”  
adesin. *(Aisaia 49.6)*

<sup>48</sup> Saen euna Juda dana qee eundec age je eu dah mimeig age celeboeig Tibudna je binan sulein. Odocob leih Anut cebac bilec catanecnu nesiladen eundec age wawaga meleec dana ibuldoin.

<sup>49</sup> Odocob Tibudna me je hatu cunug ihoc len. <sup>50</sup> Euqa Juda dana age caja age ijanagaca, eundec age Anut binan suloloig euca, dana ben age taun ben euna bileginaca jajahil adecebil age Pol Banabasca me qee odalimeig age hatu ben uqana gadacna ititacalein. <sup>51</sup> Odocob kobol me qee odoin eundec ihacadecnu Pol Banabasca ale jaimalana comis foidocobil Aikoniam taun ono belesin. <sup>52</sup> Odocob malogom Antiok ono bilein eundec Kis Gun wawagana ihoc leceb age celeboein.

## 14

*Ale Aikoniam ono cabi osin*

<sup>1</sup> Odocob Pol Banabasca ale Antiok Pisidia ono cabi osin odiwe Aikoniam taunna cabi osin. Ale Juda dana agena cuha jona ono limesi me je maadecebil Juda dana Juda dana qee eundecca mati bahic age Jisasnu wawaga meleen. <sup>2</sup> Euqa Juda dana leih wawaga qee meleel eundec age Juda dana qee eundec wawaga ihulahaladecebil me je makesin eunu me qee cisdoin. <sup>3</sup> Eunu Pol Banabasca ale Aikoniam ono saen cecelacca bilesin. Bibilesi ale Tibudnu saluqi u mamadiesin. Tibud uqa ale madi, Tibud eelgena esin je eu mele ihacadimeu uqana gagadic odoc aleceb kobolkobol gagaca oodiesin. <sup>4</sup> Euqa dana cajaca age taun benna bilegina age qatani lecisdoim, leih Juda danaca tawein, leih aposelca tawein.

<sup>5</sup> Odocobil Juda danaca, Juda dana qee eundecca agena ilo gami aposel ilag oodaleig meenna aqaloqagannu cisdoin. <sup>6</sup> Saen aposel age eu odoqagan ec dumesi ale Listra Debica ono busali belesin. Listra Debica ale taun ben lecis Likionia hatu nagna nijesin. Taun ben lecis nijesia euna belimesi hatu eu gadac taldu jobonca, cudun nagnagca cunug cobosin. <sup>7</sup> Ono ale me je qasali maadi cobosin.

### *Ale Listra ono cabi osin*

<sup>8</sup> Odocob dana oso cobocnu ihoc qee Listra taun ono bilen. Uqa jaih laleg mealen, uqa anag basennadec qee coboloi. <sup>9</sup> Odimeu uqa ono Pol je mamaden dah mimi bilen. Pol dana eu gugca mecidumeu uqa waug meleen eunu uqa me mudecnu ihoc Pol eu fimeu <sup>10</sup> uqa je-jeg mecana madon, “Caji tawimeg jaim tutuc muduga!” don. Odocob dana eu bitaci caji jic

cobon. <sup>11</sup> Odocob dana am ben cegulen eu fimeig age agena Likionia jena jejenega utai madein, “I ale anut dana ibuldumesi egeca nesia!” ein. <sup>12</sup> Odimeig Banabas ijan Sus tibud qoin. Odocob Pol uqa je madec dana eunu uqa ijan Hemis tibud qoin.\* <sup>13</sup> Odocob Sus tibudna cuha jo eu taun ben gesacna tawen. Odocob Susna nawel tawec ihanec dana bulmakau manahal bobogca cedi jic cebec benna ahon. Uqa dana am ben cegulein eu ageca aposel ihanaloqagannu odoin.

<sup>14</sup> Odoqagaqa Banabas Polca eu odi odoqagan ec dumesi ale alena lotoc baladumesi utaii guguli dana am ben cegulein gemogemo lelesi maadesin, <sup>15</sup> “O dana, age eetanu edi odogina? Eleha dana mahanadec, ele age cinigwe! Ele ceteħ caunca qee i culimeig Anut cebac bilec catanec uqaca falicdu loqagannu ene me je maadewa hoh. Anut eu saoca mahaca macasca ceteteħ cunug euna nijia uqa ifanen. <sup>16</sup> Saen wele uqa culadeceb dana mahamaha bilegina agedodoc agena cisdoc toodu coboin. <sup>17</sup> Odonqa uqa gaid uqadodocnu ihacadoloi. Uqa ceteħ me dana cunug age ageha adoloi. Uqa wa sao ohisdec suldocob neceb sab saenna wal moloi. Uqa age sab jecnu igimei wawaga celeboecnu ha igoloi,” adesin. <sup>18</sup> Je eu odi maadesin euna cahacadecwe mecebil ihanalecnu odoin eu culein qa eu cabi bahic.

### *Age Pol meen heli qoin*

---

\* **14:12:** Grik dana cajaca age anut mati bahic bilein eunu wawaga meleen. Sus uqa agena anut agena king bilen, odocob Hemis uqa anut agena sos dana cinigwe.

<sup>19</sup> Oodosin Juda dana leih age Antiokdec, Aikoniamdecca Litra ono hoin. Humeig age dana cajaca am ben eu cesusadecebil cunug ageca li gabandumeig Pol meenna qoqoig ceceli ehi li taun benna gel ono isec euna qisacdu cal meia ec cisdumeig culdein. <sup>20</sup> Euqa saen malogom age uqaca hu taldu tawecebil uqa cajimei taun ben euna ceseli len. Odocob deel oso uqa Banabasca Debi taun ono belesin.

<sup>21</sup> Odocob Pol Banabasca Debi ono me je qasali maadesin. Odimesi dana mati bahic wawaga meleceeb age malogom cabi oin. Odocob Debidec Litra isec ceseli belesi Aikoniam calimesi eunadec Aikoniamdec belesi Antiok Pisidia ono calesin. <sup>22</sup> Ale bebelesi malogom hulunuga cehi aadesi wawaga meleec eu duuec tawigiannu dahiniga hewimesi ale ulicaadi maadesin, “Ege Anutna me cul ocnu culumen mati bahic gisi cacagu gemo euna odi leqan,” adesin. <sup>23</sup> Odocobil ale tamanec cunugna inondudu cud bilecnu aquniadec dana matu ale nesiladimesi Tibud eunu age wawaga meleen uqa ebenna madesin.

*Ale Antiok Pisidia ono ceseli belesin*

<sup>24</sup> Odocob ale Pisidia hatu nagna cunug cobihedumesi hibna ale Pamfilia hatu nagna calesin.

<sup>25</sup> Odimesi ale me je Pega ono dana cunug maadimesi onodec Atalia taunna nosin. <sup>26</sup> Ale haun wag umesi onodec Antiok ceseli belesin. Ono ale wele cabi u hedosin eunu Anutna eelalec uum alen cofaaleb cobowasannu Anut ebenna malein.

<sup>27</sup> Odimesi ale Antiok ceseli humesi ale tamanec cunugca gabanadimesi Anut cabi cunug ale gami cabi oinnu saadesin. Juda dana qee Anut jic

hudeceb uqanu wawaga meleennu ha saadesin.  
<sup>28</sup> Odocob ale ono malogom gami saen geh bahic  
 bilein.

## 15

*Tamanec uqana cegulec ben Jerusalem ono calen*

<sup>1</sup> Odocob dana leih Judiadec Antiok limeig wawaga meleec cotogail iwalaadeig maadein, “Age Mosesna loo jena toodu odi dewenega cagu qee qufeig Anut age cahahaadecnu ihoc qee,” adein. <sup>2</sup> Eu odi odocobil Banabas Polca gami fee dadanein. Eunu Banabas Polca dana leih Antiokdecca age Jerusalem ono belimeig je fee dadanec ein eundec aposel tamanec agena matuca maadoqagannu madein.

<sup>3</sup> Odocob tamanec suladeceb jic cocobi belein. Odocob saen age Finisia Sameriaca ono li calimeig age Juda dana qee Anutnu wawaga meleennu saadein. Odocob wawaga meleec cotogail cunug je eu dah mimeig age ceelein.

<sup>4</sup> Saen age Jerusalem li calecebil tamanecca, aposelca, tamanec agena matumatuca alalagadecebil age cabi cunug Anut uqa age gami cabi oinnu saadein. <sup>5</sup> Euqa dana wawaga meleec age Farisi agena amnadec cajimeig madein, “Age dewenega cagu qocnu Mosesna loo je toodu odocnuca age age odoc bahic odoqagan,” ein.\*

<sup>6</sup> Odocob aposel dana matuca age je eu tutuc mudoqagannu cegulein. <sup>7</sup> Odimeig saen cecelac bahic togodumeig Pita cajimeig maaden,

---

\* 15:5: Age je Aposel 11.2na nijia eu feiga.



“O cotiel, ija Juda dana qee me je maadecnu weleca Anut age gemonadec ija nesili ehiten. Eunu Juda dana qee age dah mecebil wawaga meleigiannu eu dogina. <sup>8</sup> Odocob Anut uqa dana wawaga meleecnu dona eu uqa Juda dana qee eundec ageha uqanu wawaga meleecnu ihoc eu ihacadime i uqa Kis Gun egeca suldocob nenwe eu odi uqa ageca ha suldocob nen. <sup>9</sup> Odocob uqa egeca ageca eu gug fil qee odel. Euqa age uqanu wawaga meleen. Odime i age wawaga meleecna age wawaga soidon. <sup>10</sup> Eunu qila age eetanu Anut temdogina? Age culumen i ege jajanigeil egeca gahidocnu ihoc qee eu malogom adecwe qee. <sup>11</sup> Anut uqa Jisas Tibud uqana uum igecna cahahaadigianwe uqa odi egeha Jisas Tibud uqana uum igecna cahahagigian eunu wawige meleena,” aden.

<sup>12</sup> Odocob dana am euna cunug tiliein. Age Banabas Polca ale Anut Juda dana qee gemona ebenelana kobolkobol gagaca odon eunu saadesinnu dah mein. <sup>13</sup> Ale je madi hedocobil Jems co suli u maaden, “O cotiel, ija dah miteiga! <sup>14</sup> Saimon uqa wele sildigia, Anut hahawan Juda dana qee eundec age cahahaadecnu limei gemonadec leih uqanagul bilituqagannu cedaden. <sup>15</sup> Odocob je hahun madec dana agena jaqec je ica caca bahic madena odi:

<sup>16-17</sup> “Tibud madena, “I hedocob hibna dana ca-jaca saen euna bileginaca Juda dana qee age ijanagul biliteginaca age cunug Tibud walutuqagannu ija ceselimig Dewidna jo qahen eu haun sulecemin cajigian.

Jo teful qahaden eundec ija cisindugen,” ena.  
(*Amos 9.11-12*)

<sup>18</sup> Tibud eu odi madena,  
uqa wele bahic je i edi madeceb hu li made-  
ceb doin,’ ena,” aden.

<sup>19</sup> “Eunu ijana cisdoc eu odi. Juda dana qee  
age Anutca falicdogina eu ege culumen i qee  
adoqaun. <sup>20-21</sup> Euqa jajanagail saennadec dana  
age Mosesna loo je taun ben cunugna Juda agena  
cuha jona cuha deel cunugna ha sanijimeig me  
je maadecebil doqona. Eunu ege jaqec je oso  
sulduadom. Je odi maadom, ‘Age kadan tibud  
ihanecnadec sab eundec cain jowain. Sab eu  
gegehinca. Dana uqa caja qee oc cajaca cain ni-  
juwasin. [Dool benega coldocobil cal men eu cain  
jowain.] Ceteq golacha cain jowain,’ adom,”  
aden.†

### *Age Kristen sihul fil agena je oso sulduadein*

<sup>22</sup> Odocab aposelca, tamanec matumatuca,  
tamanec cunugca age je madi cagoin. Odocab  
age dana leih gemonadec Judas Basabas dogina  
uqaca Sailasca nesili cedalimeig ale Pol Ban-  
abasca gami Antiok suladecebil beloqagan ein.  
Judas Sailasca ale wawaga meleec cotoilail aquni-  
adec dana. <sup>23</sup> Jaqec je i edi sulduadein:

---

† **15:20-21:** Juda age Isrel hatuna himec qee bilelein. Weleca age  
budu beladimeig hatu cunug ono nihein euna ilag bilein. Odocab  
agena cuha jo eu taun cunugna bilein euna tawein. Age Aposel  
2.5-11 feiga. Eunu dana cajaca age taun euna bilein age Mosesna  
loo jenu je mati dah mi hedoin.

“Ege, aposelca tamanec matuca, age Juda dana qee, age ege wawige meleec cotigeil Antiokca, Siria hatuca, Silisia hatu nagca bilegina, egena feele adec je sulduquna,” adein.

<sup>24</sup> “Ege dana leih egena amnadec belimeig age je ihulahal maadecebil wawaga me qee men odi dah mom. Euqa ege age odi odocnu qee maadolom. <sup>25</sup> Eunu ege ceguli togodumeb dana sos lecis nesili cedalimeb ageca suladecnu ege cunug cois oqan. Ale egena danah lecis Banabas Polca gami loqagan. <sup>26</sup> Dana i ale Jisas Krais Tibud ijannu cabi oosin dana age aqalecebil cal mowasa odoin. <sup>27</sup> Eunu ege Judas Sailasca ale conolagulna je jaqoqa i edi maadowasan sulaloqona. <sup>28</sup> Kis Gun egeca culumen haunhaun oso qee adoqaun qa gadac i himec wooldocnu ihoc qee adoqona eunu wawige osol moqan. <sup>29</sup> Age kadan tibud ihanecnadec sab cain jowain. Ceteh golacca eu cain jowain. Dool benega coldocobil cal men eu cain jowain. Dana uqa caja qee oc cajaca cain nijuwasin. Age ceteteh i ilag qee odifeig eu age me odoqagan. Odio,” adein.

<sup>30</sup> Odimeig age dana sos suladecebil Antiok belein. Ono age dana wawaga melecca cunug gabanadimeig jaqec je eu adein. <sup>31</sup> Odocobil age jaqec je eu sanijimeig age hulunuga cehec je eunu celeboein. <sup>32</sup> Judas Sailasca, ale je hahun madec dana, saen cecelac bahic wawaga meleec cotogail je mati bahic hulunuga cehi maadecebil agena wawaga meleec gagadic men. <sup>33-34</sup> Odimeig hibna ono saen leih age gami bilimeig Antiok tamanec

dana age dana sos sulalein age malolca ceseli sulalecebil belesin. [Euqa Sailas uqana cisdoc ibuldumei Antiok ono nijigiannu maden.]

<sup>35</sup> Odocab Banabas Polca Antiok ono nag odi bilesin. Ale dana matica osoben tamanec ono Tibudna me je iwaladein.

*Pol Banabasca fee dadanimesi filigandosin*

<sup>36</sup> Odocab deel leih hedocab Pol Banabas madon, “Hoga, cotileil taun ben cunugna bilegina ele Tibudna me je maadoh eu haun ceseli belimeu age adi cabi ogina eu fewan,” don. <sup>37</sup> Odocab Banabas uqa Jon age Mak ein age gami belo-qagannu cisdon. <sup>38</sup> Euqa wele uqa age gami bilimeig beli me je iwaladec cabi qee oloi, odimeu uqa Pamfilia hatu nagna culali Jerusalem ono ceseli nuen. Eunu Pol uqa ehudi nuecnu culen. <sup>39</sup> Odocab aledodoc fee dadan bahic imesi filfil filigandu belesin. Banabas Mak ehudeceb wagna Saipras nuina belesin. <sup>40</sup> Euqa Pol Sailas nesili ehuden. Bebelesin wawaga meleec cotelail age Tibudna waug qoc cofaaleb cobowasannu Anut ebenna mein. <sup>41</sup> Odimeu uqa Siriaca Silisiaca hatu eu gemogemo nuen. Nunuei tamanec cesuladi maadeceb agena wawaga meleec gagadic men.

## 16

*Timoti Polca belesin*

<sup>1</sup> Odocab Pol cocobi nui Debi Listraca ono cobon. Odocab malogom oso, ijan Timoti, ono biloloi. Uqa anag ha waug meleecca Judadec qa memeg Grikdec. <sup>2</sup> Wawaga meleec cotogail age Listra Aikoniamca bilein age gaid Timotinu je

me dih saoloig. <sup>3</sup> Odocob Pol Timoti ehudeceb osoben belowasannu cisdon. Euqa Juda dana cunug ono bilein eu age Timoti memeg Grikdec eu age doloig. Eunu Pol uqa Timoti deweg cagu quten. <sup>4</sup> Odocob ale taun benbenna bebeli bilesi ale cagoc je aposelca, tamanec matumatuca Jerusalem ono bilein age je jaqimeig Juda dana qee age Antiokca, Siria hatuca, Galesia hatuca ono bilegina sulduadein eu siwiaadi age toodu odocnu maadi belesin. <sup>5</sup> Eunu tamanec ono eu agena wawaga meleec gagadic mimei deel abesabes cunug dana sanijadec fulusdoloi.

*Pol dana oso Masedoniadec ola codocna fen*

<sup>6</sup> Odocob Kis Gun Esia hatuna me je maadecnu cahacaden. Eunu Pol uqa age gami coboin eu age Frisia Galesiaca hatuna isec belein. <sup>7</sup> Odocob saen age Maisia hatu gadacna li calimeig age Bitinia hatuna lecnu cisdoin qa Jisasna Kis qee culadel. <sup>8</sup> Eunu age tutuc Maisia hatu gemo belimeig li Troas taunna calein. <sup>9</sup> Odocob witic euna Pol ola codocna bebelimei Masedoniadec dana oso cesusdudu tatawen fen, “Masedonia ene humeg cesulgaga!” don. <sup>10</sup> Pol ola codocna bebelimei eu odi feceb ege Anut dana Masedonia hatu ono bilegina eu me je maadecnu mageia eu dom. Eunu Masedonia belecnu saciadom.\*

*Lidia Kristen men*

---

\* **16:10:** Cudun ina Luk uqa “ege” madec sanan men. Age aqu nec je feiga. Saen ina Luk uqa Polca cocobosi belesi Filipai ono calesin. Odocobil Pol uqa Filipai culdi hedocob Luk uqa “ege” qee madel. Age Aposel 16.40 feiga. Eunu dana age Luk uqa Filipai bilen ec cisdogina.

<sup>11</sup> Odocob Troas ono wag tobimeb tutuc qeti li Samotres nui too qudi numeb deel osona waldu li Niapolis taunna calom. <sup>12</sup> Onodec Masedonia hatuna taun ben Filipai taun ben ono belom. Filipai eu Rom cofdoloji. Odocob ege deel leih taun ben ono bilom. <sup>13</sup> Odocob cuha deelna ege taun ben eu uqana fele cehec cuculdi wa gesacna lom ege Juda dana agena inondoc cudun om ec cisdom. Odimeb ege ono limeb caja ono cegulein bibilegin eu ege ono bilimeb je maadom. <sup>14</sup> Caja oso uqa cegulec euna bilen uqa egena je dah men eu ijan Lidia. Uqa Taiataira taun bendec, lotoc golca idadu suldoloji. Uqa Anut binan suloloji. Odocob Tibud uqa odudeceb Lidia uqa waug fogo docob Pol je mamaden dah mudi bilen. <sup>15</sup> Odocob uqaca, age uqana jona bileinca age wa joadec oin. Odimeis cesusgi ege magen, "Ija mele bahic Tibudnu wawi meleen ec cisdufeig humeig ijana jona bileigale," gen. Odimeis uqa ege uqana jona lecnu bahic magen.

*Age Filipai ono Pol Sailasca gihacdoc jona malein*

<sup>16</sup> Deel osona ege inondoc cudunna bebeli bilob ege begabeg meh mel aid osoca gulucdadanom. Uqa buga me qee hewuden. Buga me qee eu odudeceb ceteh hibna caligiannu dado moloi. Uqa dado mec je mamadi meen qaig geh bahic dana uqa cofdoloig agena mudiadoloi. <sup>17</sup> Odocob uqa Pol ege gami toogigi utaen, "Dana i age Anut Ohis Bahic uqana cabi dana! Age adi Anut caha-haadecnu je maadegina!" en. <sup>18</sup> Uqa deel mati eu odi odon. Odocob Pol uqa gemag beceb waldumeis

buga me qee madon, “Ija Jisas Kraiss ijanna je gatiti mahigina, mel aid eu culdi qisacdogal!” don. Odocob buga me qee saen euna dih qisacdon. <sup>19</sup> Euqa dana uqa cofdoloig eu age Pol agena meen qaig oc jic cagocob fimeig age Pol Sailasca hewalimeig ceteteh fajecnu cudunna diali ehi nu Rom je gesilec dana amagana malein. <sup>20</sup> Odimeig age Rom je gesilec danaca ehali limeig madein, “Dana i ale Judadec ale egena taun ben ene ceteh me qee suluwassannu odosina. <sup>21</sup> Ege Rom egena kobol eu qee odoqaunnu cahacgena eu i ale odocnu iwalgesina. Kobol eu umeb qee ihoc moqaun,” ein. <sup>22</sup> Odocob dana am ben ageha aqaloqaga bili cegulein. Odimeig Rom je gesilec dana age Pol Sailasca alena lotoc baladumeig geh bahic qisaaloqannu je gatiti maadein. <sup>23</sup> Odimeig age geh qisaali hedumeig gihacdoc jona helalecebil lesin. Odimeig age gihacdoc jo cofdoc dana cofali cuhadugiannu je gatiti madoin. <sup>24</sup> Odocob uqa je gatiti odi umei gihacdoc jo cofdoc dana uqa helaleceb cudun dunuh bahicna lecebil jaimala na culumenca gemo mimei gagadic qagalen.

<sup>25</sup> Euqa witic tu gemo bahic Pol Sailasca inondodosi Anut binan sulec due sisilesin gihacdoc dana age dah mali nijein. <sup>26</sup> Oodogin nag odi bahic mim ben nen. Odimeig gihacdoc jo eu uqana big gug lugudocob jic cebec cunug hudaden. Odocob sen gihacdoc dana cunug agena cufaladen. <sup>27</sup> Odocob gihacdoc jo cofdoc dana caji meciimeig jic cebec cunug hudec fimeig gihacdoc dana cunug busaleiga ec cison. Eunu uqana han sigin cecelac uqana cudunnadec umeig uqadodoc

qocob cal migia odon. <sup>28</sup> Euqa Pol jejeg suli u utai madon, “Ege cunug ihen! Hinadodoc cain dewen tudogaun!” don.

<sup>29</sup> Odocob gihacdoc jo cofdoc dana uqa cejalnu utaimei guguli limei cucuiii Pol Sailasca jaimalana toni qeleli nijen. <sup>30</sup> Odimei uqa ehali cali humei sisilalen, “Dana ben lecis, Anut caha-hatigiannu ija eeta odigen?” alen.

<sup>31</sup> Odocob ale jejeg hewi madosin, “Jisas Tibudnu wawin meleeia. Odocob Anut hinaca, age cunug hinana jona bileginaca cahahaadi-gian,” dosin. <sup>32</sup> Odimesi ale uqaca, leih age cunug uqana jona bileinca Anutna me je maadesin. <sup>33</sup> Odocob uqa witic saen euna dih ehali li isomola wasacudialen. Odocob uqaca, age cunug uqana jona bileinca age wa joadec oin. <sup>34</sup> Odimei uqa Pol Sailasca uqana jona ehali ehi timei sab aleceb jesin. Odocob uqaca age leih cunug uqana jona bileinca age Anutnu wawaga meleennu ceelein.

<sup>35</sup> Deel osona qasil wele Rom agena je gesilec dana age dana eu ale cois culalecebil belesia ec polis dana maadimeig suladecebil lein.

<sup>36</sup> Eunu gihacdoc jo cofdoc dana je eu Pol madon, “Rom je gesilec dana age hina Sailasca ale culalecemin gihacdoc jonadec belowasannu je gatiti sulduteiga. Odocob ale wawala malolca cois belesiale,” don.

<sup>37</sup> Euqa Pol polis dana maaden, “Ele cahuldoc elena oso qee felein qa cunug amemeg qisaleigan.



Euqa elena gug jobon eu Rom!† Adinu age gihacdoc jona ehili tacileigan? Odocob qila age jahuni sullecebil nuewannu odogina? Qee bahic! Rom je gesilec dana age bahic humeig ehili tecebil belewan,” aden.

<sup>38</sup> Odocob polis dana age ceseli belimeig Rom je gesilec dana Polna je maadein. Odocob age Pol Sailasca alena gug jobon eu Rom ec dumeig age cucuiein. <sup>39</sup> Eunu age belimeig eu cahuldom ec maalein. Odimeig age gihacdoc jonadec ehali ahumeig ale taun ben eu culdi belowasannu ninialein. <sup>40</sup> Eunu Pol Sailasca gihacdoc cudun culimesi Lidiana jona lesin. Ono ale wawaga meleec cotelail gulucadimesi dahiniga hewec je maadimesi belesin.

## 17

### *Tesalonikadec dana age Pol Sailasca aqalecnu gale aden*

<sup>1</sup> Ale tutuc Amfipolis taun gemogemo limesi onodoc Apolonia taun gemogemo odi nui Tesalonika taunna calesin. Ono Juda dana agena cuha jo oso tawen. <sup>2</sup> Odocob Pol uqa gaid odoloiwe uqa odi cuha jo euna len. Ono cuha deel cijed uqa dana gami Anutna jaqec jenu

---

† **16:37:** Saen euna Rom agena king, age Sisa ein, uqa hatu cunug eu Mediterenian Macas cemenug nijein eu cofaden. Eunu Rom dana cunug age binanca bilein. Odocob Rom agena loo je eu dana age Rom dana gihacdoc jona gauc madecnu cahacaden. Saen osona Rom age culadeceb Rom dana qee eundec age Rom dana calein. Pol memeg eu dana eundec odi fena. Eunu Pol anag basecdon saenna Pol uqaha Rom dana calen. Age Aposel 22.24-29 euha feiga.

fee dadanein. <sup>3</sup> Anutna jaqec jenadec sildiaadi agena cisdoc tutuc mumudi age Anutna Kraiss uqa dain ben umei cal mecnadec ceseli cajennu sildiaden. Odimeis Pol maaden, “Jisas uqanu ija je maadiga eu uqa Kraiss,” aden. <sup>4</sup> Odocob Pol uqa leih cesusaadi maadeceb wawaga meleeceb Pol Sailasca tooalein. Eu odi Grik dana mati bahic ageha Anut binan suloloig, ageca qam caja mati ageha wawaga meleen.

<sup>5</sup> Euqa Juda dana age Polnu heel mimeig dana gauc jicna loldoc dana eundec cedi gabanadecebil dana geh bahic doin. Age odadecebil taun ben cunug euna uceldodoig je alalac beceb age Pol Sailasca walali hewalimeig dana ebenegana moqagannu Jesonna jo talildudu tawimeig kokodoin.

<sup>6</sup> Odocob age qee fecialimeig Jeson wawaga meleec cotugul leihca gami ceceladi taun ben eu cofdoc cabi danaca cedi ehi limeig utai madein, “Dana i age hatuhatu cunug sibenega qaqahi cocobi qila age egena taun benna hoiga. <sup>7</sup> Odocob Jeson uqana jona ehadi nijen. Age cunug Sisa uqana loo jeha sibeg qahegina, odimeig age king oso ijan Jisas bilina ec madegina,” ein. <sup>8</sup> Age je eu madimeig dana am ben taun ben cofdoc cabi danaca age uceldodoig je alalac ten. <sup>9</sup> Odocob cabi cofdoc dana eu age Jeson dana leihca meen qaig gadac eu odi je gesilec fajimeig beloqagan ec maadecebil fajein. Odocobil culadecebil belein.

*Pol Sailasca Beria ono cabi osin*

<sup>10</sup> Witic memen wawaga meleec cotalail age Pol Sailasca sulalecebil Beria taun ono belesin. Ale Beria ono li calimesi Juda dana agena cuha jona lesin. <sup>11</sup> Juda dana ono age me je dah

mecnu dahiniga qolocijeceb bilein. Age Tesalonaika dana cinigwe qee. Age me je dah mi cuhadodoig deel cunugca Pol mele madenafo eundecnu doqagannu Anutna jajec je sanijoloig. <sup>12</sup> Eunu agenadec mati bahic wawaga meleen. Odocob Grik caya qam leihca, Grik dana leihca ageha wawaga meleen. <sup>13</sup> Euqa saen Juda dana Tesalonaika ono bilein age Pol Beria taun ono me je maaden ec dumeig age ono limeig age dana am ben ihulahaladecebil je alalac ten. <sup>14</sup> Odogin wawaga meleec cotugul age Pol suldocobil lanna non. Euqa Sailas Timotica himec Beria ono bilesin. <sup>15</sup> Dana Pol ehudi ehi belein eu age Atens taun ben ono ehi beli cuculdeig ceselein. Age saen ceselein hohogin Pol uqa Sailas Timotica maalecebil mahuc bahic toodu Atens lowasannu maaden.

### *Pol Atens ono me je maaden*

<sup>16</sup> Odocob Pol uqa Sailas Timotica Atens taun ben ono sumali bibili uqa uhulec tibud agena kadan mati bahic taun ben eu cunug ihoc len eu odi feceb waug me qee men. <sup>17</sup> Eunu uqa Juda agena cuha jona Juda danaca, Juda dana qee eundecca age Anut binan suloloig age gami fee dadanoloig. Odocob fajec cudunna dana holoig eu deel cunugna age gami ha fee dadanoloig. <sup>18</sup> Odocob iwaladec dana leih age Epikurian Stoikca amnadec\* gulucadeceb fee dadanein.

---

\* **17:18:** (naha osoldoc) Grik gemona dana mati age dana doc silecca age wele bilein agena je toodo in eu bilein. Dana eundec agena sihil lecis eu Epikurian Stoikca.

Pol uqa Jisas cal mecnadec ceseli cajennu me je maaden.† Eunu leih madein, “Je lawilawi madec dana i eetanu madigia odona?” ein. Euqa leih madein, “Uqa tibud filfilnu madenafa?” ein. <sup>19</sup> Eunu age Pol ehudi Ariopagas cegulecna ono ehudi ehi limeig madoin, “Iwaladec je haun hina maadagana eu magecem doqale. <sup>20</sup> Ge, ceteteh leihnu hina je madagana eu ege cete haun odi dah moqona. Eunu ege eu uqana gug docnu wawige nijia,” doin. <sup>21</sup> Odocob Atensdec danaca, dana hatu filfilnadec ono bilein ageca saen cunugna age cete haun hon eu dah mamadi je togodocnu wawaga ben bahic nijen.

<sup>22</sup> Eunu Pol Ariopagas cegulec eu amagana gemo ono caji tawimej maaden, “Dana Atensdec! Age jic cunugna cuha fegina eu ija fem. <sup>23</sup> Ge, saen ija taun benna cocobig age tibud agena kadan eu binanaga sulegina eu fem. Ija ihanec cabal euha fem eu jaqec je odi maden, ‘Tibud ana bilia qee doqona eu uqana,’ en. Tibud i age binan sulegina qa qee dogina eunu ija qila maadigina. <sup>24</sup> Anut maha cunugca ceteteh cunug mahana bileginaca muden eu uqa sao jobonca mahacanu Tibud. Odocob uqa cuha jo nag dana mudegina euna qee bilina. <sup>25</sup> Odocob uqa cete osoca qee qee bilel. Dana age uqa cesuldocwe ha qee. Uqadodoc himec maha ina cebac bilecca kisca ceteteh cunug dana cunug adena. <sup>26</sup> Uqa dana

---

† **17:18:** (naha lecisdoc) Grik jena je “cal mecnadec ceseli cajan” age Anastasis ein. Grik age dana cal mecnadec ceseli cajecnu eu ihoc qee ec cisdoin. Agenu cisdoc eu fil bahic. Eunu Pol uqa Anastasis ec madeceb age uqa tibud filfilnu maden ec cisdoin.

osolnadec himec dana sihul filfil mahana cunug bilegina eu ifanadem. Age mahana biluqagannu saenha hatu agena gadacha uqadodoc wele si-wiaden. <sup>27</sup> Age uqa waloqagannu uqa eu odi odon. Age uqa megimeig gulucdoqagannu eu odi odon. Euqa Anut uqa ege cemenige bilina. <sup>28</sup> Ge, dana oso odi maden, ‘Uqa odigeceb ege cebac biluquna, coboqona, eu odinu ege dana caja biluquna,’ en. Eu agena galolo je dana leih madein odiwe, ‘Egeha uqa talacul biluquna,’ ein.† <sup>29</sup> Ege Anut talacul eunu ege Anut uqa goldfo, silwafo, meenfo cinigwe, danana docna mudec kadan tibud cinigwe ec odi cain cisdoqaun. <sup>30-31</sup> Odocob saen wele dana age Anutna loo je qee doc bibilegin Anut uqa qee wadacadel. Euqa uqa maha ina dana cunug gesiladigiannu eu uqa dana oso uqana ititom cobocna wele cabi eu odigiannu ehudimei deel oso gadac men nijia. Uqa eu mele bahic dana cunug doqagannu wele dana i cal mecnadec tulidocob cajan! Eunu qila Anut uqa dana cunug age mahana cunug bilegina eu agena qisol mec kobolnadec falicdoqagannu maadena,” aden.

<sup>32</sup> Odocob Pol cal mecnadec ceseli cajan ec madeceb dumeig leih age lelandoin qa leih age madoin, “Ege hina magaga eu haun magecem doqan,” doin. <sup>33</sup> Odocob eunu Pol cegulecnadec cuculadi nuen. <sup>34</sup> Euqa dana leih age uqaca gabandumeig age je eunu wawaga meleen. Age-

---

† **17:28:** Pol uqa je eu Grikna galolo je dana lecis wele jaqesin eu umei Grik dana age fogo adecnu maden, eu odi fena. Galolo je dana lecis i ale Epimenides Aratasca.

nadec eundec dana oso Daionisias, uqa Ariopagas cegulecnadec dana oso, caja oso ijan Damaris. Odocob dana leihha ageca gabandoin.

## 18

### *Pol Korin ono cabi on*

<sup>1</sup> Odi hedocob Pol Atens culdimej Korin taun benna nuen. <sup>2</sup> Ono uqa dana oso Judadec ijan Akwila gulucdon. Uqa anag Pontas hatu ono basen. Uqa aideg ijan Prisila Italidec ale saen euna hosin. Rom agena king, Klodias, uqa Juda dana cunug age Rom ono biloloig eu age Rom culdimeig beloqagannu je gatiti maaden eunu hosin. Odocob Pol eu ale mecialigia bili len. <sup>3</sup> Odocob Pol uqa talah jo mudec dana. Aleha talah jo mudec lotoc eu mudimesi euna meen qaig olosin. Eunu Pol ale gami ninijeig cabi oin. <sup>4</sup> Odocob uqa Juda agena cuha jona cuha deel cunugna dana gami fee dadanoloig. Odimej uqa Grikca Judaca mati bahic cesusaadi je maadeceb wawaga meleen.

<sup>5</sup> Saen Sailas Timotica ale Masedoniadec hosin Pol uqa saen cunug eu me je qasali maadecnu odon. Uqa Juda dana Anutna Krajs eu Jisas ec sildiaden. <sup>6</sup> Odocob age me je eu cahacdoc sanan mena imeig uqanu je me qee madecebil uqa uqana lotocnadec comis foidudu maaden, "Age fadalifeig agedodoc agena cahuldoc! Eu ijana cabi qee. Qila sanan mimig Juda dana qee eundec gami himec ligen," aden. <sup>7</sup> Eunu uqa culadimej li Juda dana qee eundec osona jona nuen, ijan Tisias Jastas. Uqa gaid Anut binan suloloi. Uqana jo eu Juda agena cuha jo nag cemenug. <sup>8</sup> Krispas

uqa Juda agena cuha jo ilo uqaca, uqana jona bileinca Tibudnu wawaga meleen. Odocob dana cajaca mati bahic Korin taun benna bilein age Polna je dah mimeig wawaga meleeceb wa joadec oin.

<sup>9-10</sup> Odocob witic osona Pol ola codocna bebelen euna Tibud Pol madon, “Ija hinaca biligina. Mati bahic taun ben ina eu ijana bilegina. Eunu oso uqa hina dewen tudocnu qee hoiaun. Eunu cain cucuiagaun, cain me je madecnu culogaun. Euqa me je odi dih mamadiaga,” don. <sup>11</sup> Eunu Pol cabi gel osolca oso naha himec ono bilen. Bibilei dana Anutna me je iwalaadien.

<sup>12</sup> Odocob saen Galio uqa Rom gabmanna ilo Grik hatuna bibilen Juda dana gabandumeig wawaga osolna Pol hewi ehudi je gesilec cud-unna ehi lein. <sup>13</sup> Odimeig madein, “Dana i uqa dana cesusaadieceb Anut binan suluqagannu eu Mosesna loo je madena gadac eu wooldona!” ein.

<sup>14</sup> Euqa Pol je madigia oodon bahic Galio uqa Juda dana maaden, “O Juda dana, dana i uqa cahuldoc odoc osofo, qisol mec odocfo odoubmi agena um qoc je dah moum. <sup>15</sup> Euqa agena jeca, ijanagaca, agena loo jeca eunu himec fee dadaneginanu ija ceteh i edinu je gesilec dana qee biligaun. Agedodoc tutuc mudeiga,” aden. <sup>16</sup> Odimeig uqa je gesilec cudunnadec ititacadeceb cali hoin. <sup>17</sup> Odocob eu age cunug Sostenis cuha jo ilo ehudimeig je gesilec cudun cemenug qoin.\*

---

\* **18:17:** Cel dana age Sostenis qoin, eu Grik danafo, Juda danafo ege qee doqona. Grik jena gug eu camasac qee. Dana leih age Juda himec age Sostenisnu gemanaga beceb uqa qoin ec cisdoin.

Euqa eu Galio adih oso odocnu qee cisdol.

*Pol Antiok Siria hatuna ono ceseli nuen*

<sup>18</sup> Odi hedocob Pol Korin ono wawaga meleec cotugul gami deel mati bahic bilein. Odimeu uqa cotugul eu culadimeu Akwila Prisilaca gami Korindec wagna Siria hatuna ono belein. Uqa macas gemo qee lec ninijen uqa Anutnu je cagoc madennu Senkria ono ilona gosic cunug cocdon.†

<sup>19</sup> Belimeig age Efesas taun ben ono calein. Ono uqa Akwila aideg Prisilaca culalen. Euqa uqa Juda agena cuha jona leceb Juda dana gami fee dadanein. <sup>20</sup> Odocob uqa ageca saen nag cecelacca biluqagannu ninidoin qa uqa age gami bilecnu qee cois adel. <sup>21</sup> Euqa uqa odi maaadi cuculadi nuen, “Anutna waug odi nijecebfu ija ageca haun ceseligen,” aden. Eunadec Efesas ono wag umei Sisaria taun nuen.

<sup>22</sup> Uqa Sisaria calimeu Jerusalem tamanec feele adigiannu ten. Odimeu Antiok ono non. <sup>23</sup> Odimeu Antiok ono saen leih bilimeu cuculadi Galesia Frisiaca agena hatuna jobonjobon cocobi nui malogom cunug agena wawaga meleec gagadic mudiaadi cobon.

*Apolos Efesas ono je maaden*

<sup>24</sup> Odocob Judadec dana oso, ijan Apolos, uqa anag Aleksandria taun ben ono basen saen euna uqa Efesas taun ben ono len. Uqa je madi cuhadoc dana. Uqaha Anutna jaqec jenu du cuhadon. <sup>25</sup> Uqa Tibudna jicnu iwaldoin. Odocob

---

† **18:18:** Juda dana oso uqa Anutnu je cagoc hedon eunu ihacadeccnu uqa ilona gosic cunug cocdolo. Eu agena kobol oso. Age Namba 6.1-21 feiga.



uqa waug Tibud todocnu gagadic tawen. Jisas uqana odocnu tutuc maaadi iwaladoloi. Euqa uqa Jon wa joadennu himec don. <sup>26</sup> Odocob uqa Juda ono agena cuha jona me je saluqi u maaden. Euqa Akwila Prsilaca dah mudimesi ehudi alena jona ehi limesi Anutna jicnu je tutucna silditosin. <sup>27</sup> Odocob Apolos Grik hatuna nuigia madeceb wawaga meleec cotugul age cesuldumeig age malogom ono bilein agena je jaqimeig uqa ono leceb feele dumeig ehudoqagannu suldoin. Uqa ono li calimei dana cajaca Anut uqa eeladec uum adeceb wawaga meleen eundec age geh bahic cesuladen. <sup>28</sup> Ge, uqana je gagadic madecna uqa Juda dana age gami file dadanimeig uqa dana caja amemeg wooladen. Uqa mele bahic Anutna jaqec je Anutna Kraiss eu Jisas ec madena eu ihacaden.

## 19

### *Pol Efesas ono cabi on*

<sup>1</sup> Apolos uqa Korin ono bibilen Pol jic cocobi aluhna isec nu Efesas calen. Ono uqa malogom leih gulucaden. <sup>2</sup> Odimei sisiladen, “Age wawaga melececeb Kis Gun oinfo?” aden.

Odocob age jejeg hewi madoin, “Qee, ege Kis Gunca ec oso qee dolom,” doin.

<sup>3</sup> Odocob Pol haun sisiladen, “Age cel wa joc oin?” aden.

Odocob age jejeg hewi madoin, “Wa Joadec Jon uqana wa joadec eu om,” doin.

<sup>4</sup> Odocob Pol maaden, “Jonna wa joadec eu dana agena silail hibemdoqagannu. Odocob uqa Isrel dana age dana oso uqa hib toodu honanu

wawaga meleigiannu maaden eu uqa ijan Jisas,” aden.

<sup>5</sup> Age eu odi dah memegin Jisas Tibud uqa ijanna wa joadec oin. <sup>6</sup> Odocob Pol eben ilomogana meceb Kis Gun ageca nen. Odocob age beilamaga falicdocob je filfil mamadeig je hahun madec danawe Anutna me je madein. <sup>7</sup> Dana eu age sanijec 12-pela cunug eu odi.

<sup>8</sup> Odocob Pol Juda agena cuha jona limei jagel cijed me je saluqi u maaden. Uqa age gami fee dadaneeig Anutna me culnu sildiaden. <sup>9</sup> Euqa leih age dahiniga qutum qu bilimeig wawaga mele qee el. Odocob am cegulein eu amagana Tibud uqana jicnu qisol je madein. Eunu Pol malogom cedadeceb cuha jonadec cali hoin. Odimeid deul cunugna Tiranasa iwaladec jo ben euna je togodoloig. <sup>10</sup> Eu cabi gel lecis eu odi odoin. Odocob dana cunug Esia hatuna biloloig Juda dana Juda dana qeeca osoben Tibudna me je dah mein.

### *Siwa melahul*

<sup>11</sup> Oodon Anut odudeceb Pol uqa kobolkobol filfil bahic ebenna men. <sup>12</sup> Eunu Pol uqana lotoc qetec nag mede cacoc jamelca age ehi li Pol dewegna mimeig ahu dana hagca dewenegana mecebil agena hag qee memen buga me qee ha qisacadoloig. <sup>13</sup> Odocob Juda dana leih cocobi bileig age dana age buga me qeeca eu dewenegadec buga me qee ititacadoloig ageha Jisas Tibud ijanna buga me qee ititacadecnu temdoin. Age buga me qee maadein, “Ija Jisas eu Pol uqa uqanu me je madena uqa ijanna je gatiti maadigina, age dana i deweg culimeig busaleiga,”

adein. <sup>14</sup> Odocob Juda dana ihanec dana ben, ijan Siwa, uqa melahul 7-pela age odi odoloig.

<sup>15</sup> Euqa buga me qee jejenega hewi maaden, “Ija Jisasnu dugina, Polnu ha dugina, ge age an?” aden.

<sup>16</sup> Odimei dana buga me qeeca eu gagadic odocca age gami cadimeig wooladen. Eu age cunug uqana jonadec lotoc baladocca golanagaca bical busali belein. <sup>17</sup> Odocob Juda danaca, Juda dana qee eundecca cunug Efesas biloloig je eu dah mimeig age cunug cucuiein. Odocob Jisas Tibud ijan meca bahic mudein. <sup>18</sup> Odocob dana wawaga melecca geh bahic humeig amemeg agena me qee odoc qasali madein. <sup>19</sup> Odimeig mati bahic age ceeh jelec cas mecca odoloig eu cunugca buk eu haudumeig dana cajaca amagana jana manein. Age buk fajein uqana ameg qaig gadac eu sanijec 50,000 kina. <sup>20</sup> Eunu gagadic odoc jic euna Tibudna me je gagadic mimei hatuhatu cunug ihoc len.

*Efesas dana age Tibudna jicnu gemanaga ben*

<sup>21</sup> Hibna ceteteh eu hedocob Kis Gun odudeceb Pol uqa Masedonia Grikca hatuna limei hibna Jerusalem isec nuigiannu cisdon. Uqa odi maden, “Hibna ija ono limig Rom ha figen,” en. <sup>22</sup> Odocob uqa Timoti Erastasca uqana cesuldoc lecis eu ale Masedonia sulaleceb belesin. Odimei uqa saen nag cecelacca Esia hatuna ono bilen.

<sup>23</sup> Saen euna bahic Efesas ono Tibudna jicnu cacadi utai madein. <sup>24</sup> Silwa mudec dana oso, ijan Demitrias, uqa Atemis caja tibudna cuha jo nag ihicon qoc silwana mudoloi. Odocob silwa

mudec dana age cabi inu meen qaig ben bahic didoloig. <sup>25</sup> Eunu uqa silwa mudec dana cunugca leih age cabi eundec oloig ageca maadeceb cegulein. Odimei maaden, “O dana, age dogina, ege cehewanige eu cabi ina hona. <sup>26</sup> Agedodoc dudu fifi egina dana Pol i dana cajaca mati bahic qauaadi uqa kadan tibud dana ebenegana mudegina eu anut qee ec madena. Odocob dana mati bahic uqa je madennu wawaga meleceb hibemgimeig uqaca lein. Efesas eneca odocob Esia hatu cunugnaca age hatuhatu cunugnuca odi eu odon. <sup>27</sup> Eunu egena meen qaig oc cabi jic cagocdainnu nijia. Eu himec qee, osoha eu Atemis caja tibud ben uqana cuha jo qee mec-dainnu nijia. Odocob caja tibud i Esia age hatu cunugna binan sulegina eu uqa ijan ben eu me qee muduqagan!” aden.

<sup>28</sup> Odocob dana cegulein eu je odi dah mimeig age gemanaga geh beceb utai madein, “Atemis Efesas egena eu uqa ben bahic!” ein. <sup>29</sup> Eunu taun ben eu cunugca je alalac ben. Dana am ben Gaias Aristakasca, dana lecis Masedoniadec Polca coboin, eu ale hewalimeig udoc jona diaali ehi lein. <sup>30</sup> Odocob Pol uqa cuhanuc dana am ben amagana ligia odocob malogom age cahacdoin. <sup>31</sup> Esia dana meca leih age Polna danah ageha je suldutoin, hina udoc jo euna cain camasac magau ec ninidoin. <sup>32</sup> Odocob dana leih age ceteh osonu utaeegin leih age fil utaiiein. Odimeig dana eundec mati bahic age cel gugnu cegulein eu qee doloin. Eunu dana age udoc jona cegulein age ucelduduein. <sup>33</sup> Odocob cegulec euna Juda dana age Aleksanda uqa agena je maadecnu madon.

Eunu dana leih age Aleksanda madocobil uqa aqunecna ten. Odimej Aleksanda ebenna caha-caadi age amagana eetanu odi ceguleginanu je maadigia odon. <sup>34</sup> Euqa age uqa Judadec dana camasac fimeig age cunug je osol eu aua lecis odi utai mamadiein, “Atemis Efesas egena eu uqa ben bahic!” ein.\*

<sup>35</sup> Odocob hibna taun benna kuskus limei dana am ben maadeceb tiliein. Odimej uqa maaden, “Efesas dana! Efesas taun ben eu Atemis Ben Bahicna cuha joca, meen gun sao ohisdec tonen euca alena cofalec age cunug dogina. <sup>36</sup> Oso uqa ceteteh inu mele qee ecwe qee. Eunu age gemanaga bodoeia, ceteteh ihulahal edi cain odowain. <sup>37</sup> Ge, age dana i ale cedali ene hoiga qa eu ale cuha jona ceteteh qee heje cedalesin, egena caja tibudnu ha je me qee oso qee madalesin. <sup>38</sup> Demitrias silwa mudec danaca age osonu jecafi je gesilec deelna je gesilec dana amagana age saen euna je balijimeig ono qocob leceb qocob hocob eigale. <sup>39</sup> Euqa age je menu cisdufeig age Efesas agena cegulec benna je tutuc muduqagan. <sup>40</sup> Ge, egenu qila je alalac bec i odoqanu balijec je cali hocdainnu nijia. Je alalac ben eunu ege je wasacudecwe qee. Odocob Rom cofgec dana age eunu sisilgecebil je me oso maadecwe qee,” aden. <sup>41</sup> Odimej uqa je eu madi hedumei dana cegulein eu age maadeceb budoin.

## 20

---

\* **19:34:** Juda ageha Atemisnu qee cuha felein, eunu Grik dana age Atemis ijan suli u utai madein.

*Pol Masedonia hatuca Grik hatuca ono cobon*

<sup>1</sup> Hibna je alalac bec eu cunug qee meceb Pol malogom je sulduadeceb hocobil cegulein. Odocobil uqa hulunuga cehec je maaadi odio aden. Odimei uqa Masedonia hatu ono nuen. <sup>2</sup> Odocob uqa hatu cunugna cobimei dana hulunuga cehec je filfil maaden. Odimei Grik hatu ono hon. <sup>3</sup> Odimei uqa ono jagel cijed bilen. Uqa Siria hatu nuigiannu saciadudu bili Juda dana age uqa qocomun cal migian ec don. Eunu uqa haun Masedonia hatu gemogemo cocobi nuigiannu cisdon. <sup>4</sup> Dana leih age Pol gami belein. Eu age Sopata uqa Piras melah Beriadec uqaca, Aristakas, Sekandasca ale Tesalonaikadec aleca, Gaias Debidec uqaca, Timotica, Tikikas Trofimasca Esiadec aleca age Pol gami belein. <sup>5</sup> Age casac aquni belimeig Troas ono sumigein. <sup>6</sup> Euqa bred jisca qee uqana saen hedocob ege wag umeb Filipaidec waeg beli cocobi deel 5-pela hedocob Troas calom. Ono age ceguladimeb cuha osol bilom.\*

*Pol Troas ono Jutikas tulidocob uqa ceseli cajan*

<sup>7</sup> Odocob Sarere wesuna ege cunugca bred fenoqa bili cegulom.† Odimeb Pol uqa uqadec odi culadigiannu dana me je maaden. Odimei je maaaden tu ibuldon. <sup>8</sup> Odocob jo cabalu ohis isecna hamol euna gowoc mati bahic ono cegulomna bilein. <sup>9</sup> Odocob dana haun oso ijan Jutikas

---

\* **20:6:** Luk uqa haun “ege” jaqen. Eunu doc dana age Pol uqa Filipai ono Luk haun gulucdon ec cisdoim. Age Aposel 16.10 eu feiga. † **20:7:** Doc dana age Pol uqana eundecca age Jisas deweg golaccanu cisdocnu sab jein ec cisdoim.

uqa fufu oc cebec qahein euna bilen. Odocob Pol je gehgeh mamaden Jutikas us don. Odimei uqa us dahig celeceb jo cabalu cijed ohis onodec mahana toni qon. Nu hewi suladoin qa wele cal men. <sup>10</sup> Odocob Pol jo ohisdec toni numei dana haun deweg lalan cosolimec cogadon. Odimec uqa maaden, “Cain geh cisdowain. Uqa cebac nijia!” aden. <sup>11</sup> Odimec uqa haun jo cabalu cijeddocna ceseli timec bred feni jen. Odimec age gami je mamadegin cam beceb Pol cuculadi nuen. <sup>12</sup> Odocob dana haun jo ohisdec toni mahana qon eu cebac meceb ehudi jobon beleinnu wawaga me bahic nijen.

*Pol Troas culdimec Mailitas ono nuen*

<sup>13</sup> Odocob ege aquni wagna limeb onodec Asos taun ono waeg belom. Pol uqa jic cocobi ono nuigiannu magen. Eunu ono wagna ehudeqannu magen. <sup>14</sup> Odocob uqa Asos ono cegulgeceb ehudocomun Mitilini taunna waeg belom. <sup>15-16</sup> Pol uqa mahuc bahic Jerusalem caligiannu umnana saen cusdocnu culen saen ihocfi uqa Pentikos Deel Benna† caligiannu cisdon. Eunu uqa Esia hatuna saen qee cusdoiaunnu uqa wagnagul Efe-sas cuculdi macas tutuc nuigiannu cisdon. Eunu belimeb ege onodec wagna nui deel osona Kaios taunna calom. Deel oso hedocob Samos taunna hom. Odocob deel eu todocna Mailitas taun ono calom.

*Pol uqa Efe-sas tamanec cofadec odio ec maaden*

---

† **20:15-16:** Age je Aposel 2.1na nijia eu feiga.

17 Odocob Pol ono Mailitas bibili Efesas agena tamanec matu uqa hu foqagannu je sulduaden. §  
 18 Odimei eu age hu calecebil uqa maaden, “Saen ija hahawan Esia hatuna hom hocob qila ija dumanu age gemo biled eu age dogina. 19 Juda dana age gaid ija qocomun cal migian oloig. Eunu ija cewel uadec danawe amulini nenen culumen mati teten ija Tibudna cabi om. 20 Ija ceteteh age cesuladecnu eu qee jahuniadelem eundec saen ija agena jonanaca, dana cunug amaganaca je maaadiem iwalaadiem eu age dogina. 21 Ija Juda dana Grikca agena silailnu tului falicdumeig Anutca loqagannuca, age egena Tibud Jisasnu wawaga meleigiannuca ulaulaadiem. 22 Odocob qila Kis Gunna cisdoc toodu Jerusalem ono nuigina. Ono ijaca cel culumen oso cali hugian eu qee dugina. 23 Odigeqa taun ben cunugna age ija qisatimeig gihacdoc jona mituqagan eunu Kis Gun ulictena. 24 Euqa ija deweni eu cete hawac cinigwe figina. Eunu ija ijana me je madec cabi Jisas Tibud iten eu qee mudigennu gale tena. Anut uqa dana cajaca eeladec me bahic uum aden eunu me je qasali maadecnu cabi eu,” aden.

25 “Qila feiga, ija wele age gemo cocobig Anutna culnu je maaadig cobom age haun ija olani qee fowain eu ija dugina. 26-27 Eunu ija Anut uqana cisdoc cunugnu je maadecnu qee jahuniadelemnun deela age dahiniga hewegina agena eundec oso fadalecebfi eu ijana cahuldoci qee. 28 Agedodocnuca, Kis Gun uqa tamanec age ebenegana men eunuca cofdu cuhadoiga.

---

§ 20:17: Mailitas eu Efesasdec onoca nijen, eu odi 50 kilomita.



Tamanec eu Tibud uqa Melah uqadodoc go-lacna ehaden eunu cofadi cuhadoigale. <sup>29</sup> Ija culadecemin hibna dana age qa cus cinigwe age tamanec gemo humeig waadecebil wawaga dain ben adigian eu ija dugina. <sup>30</sup> Saen caleceb dana leih agena amnadec cajimeig cuhulec je madimeig malogom age diadecebil tooadoqagan. <sup>31</sup> Eunu cofdoigale. Ija amulini nenen witic cahinegca cabi gel cijed dahiniga hewemnu cis-doiga,” aden.

<sup>32</sup> “Odocob qila ija maadi Anut ebenna adigina igina, uqa eelgec uum igennu je eu cofadeiale. Anut eelgec uum igec je eu agena wawaga meleec gagadic mudecnu ihoc. Euna Anut uqa caha-haadec dana cajaca cunug qagu madena adigian eu ageha adecnu ihoc. <sup>33</sup> Ija osona golnu, silwanu, lotocnu ami qee qol. <sup>34</sup> Agedodoc dogina, ija odi cabi uug ceteh ijaca qee eundec ijadodoc cesultecnu cabi om. Dana ija gami bilom eundec cesuladecnu ha odom. <sup>35</sup> Ege dana agedodoc cabi ocwe qee eundec ege cabi gagadic ocnu cesuladecnu ija ceteh cunug iwaladem. Age Jisas Tibud uqana je madec eu cisdoigale, ‘Oso uqa ceteteh utina uqana ceelec eu oso uqa ceteteh ona eu uqana ceelec eu wooldona,’ en,” aden.

<sup>36</sup> Odimej Pol je eu madi hedocob cunugca gob cehimeig inondoin. <sup>37</sup> Odocob eu age cunug qaqajeig cogadu cotdoin. <sup>38</sup> Eu age uqa ola haun qee fowain ec je maaden eunu wawaga me qee men. Odocob age cunug Pol gami wagna lein.

*Pol Jerusalem nuigiannu wagna non*

<sup>1</sup> Ege dana odio aadeb culadom. Wagna macas gemogemo qeti li Kos taun ono calom. Deel osona ege wagna bebeleb Rouds nui calimeb Rouds nuidec Patara taun ono belom. <sup>2</sup> Ono wag oso Finisia nuigiannu tatawen fom ege wag eu tobimeb belom. <sup>3</sup> Ege Saipras nui fecidudu anse isec waldumeb ege Siria hatuna calom. Onodec Taia ono li hewimeb age wagna ceteteh leih ononu tacein eu hidein. <sup>4</sup> Odocob ege malogom leih ceguladom. Odocob ege age gami ono cuha osol bilom. Kis odocna age Pol Jerusalem qee nuiannu cahacdoin. <sup>5</sup> Ege eu ageca bilec saen hedocob cuculadi belom. Eu age cunug age aidagailca, talaculunugailca toogecebil taun ben eu cuculdi belimeb ege cunug lanna numeb ono gob cehimeb inondom. <sup>6</sup> Odocob euna ege cunug odio adimeb ege li wag totoboqon malogom aidagailca, talaculunugailca haun jobon ceseli belein.

*Sisaria ono je hahun madec dana oso ijan Agabus uqa Pol je oso madon*

<sup>7</sup> Ege wagna Taia culdimeb belimeb Tolemes taunna calom. Ege wawaga meleec cotigeil leih ono feele adimeb ege age gami deel osol ono bilom. <sup>8</sup> Cojageceb ege wawaga meleec cotigeil eu age culadimeb nui Sisaria taunna calom. Ono ege me je maadec dana Filipna jona lom. Odocob uqa gami nijom. Filip dana 7-pela Jerusalem ono caja wij agena sab siwiadec cabinu ehadein eundec oso. <sup>9</sup> Uqa ategul 4-pela danaca qee. Age je hahun madec danawe Anutna me je maadoloig. <sup>10</sup> Odocob ege ono deel osooso bibiluqun je hahun

madec dana oso ijan Agabus uqa Judiadec nen. <sup>11</sup> Odimeu uqa egeca limei Polna lotoc taqec halu umei uqadodoc jaih ebenca qagalimeu magen, “Kis Gun edi madeia, ‘Lotoc taqec halu i gug uqa Jerusalem ono Juda dana edi qagoqagan. Odimeig Juda dana qee eundec ebenegana moqagan,’ eia,” gen.

<sup>12</sup> Ege odi dah mimeb eu egeca, leih ono bileinca ege Pol Jerusalem cain lecdainnu cesusdom. <sup>13</sup> Euqa Pol jejenige hewi magen, “Age eetanu edi qaqajeig wawi qatanegina? Ija Jerusalem ono age jaimi ebenica qagalecnu saciaduga euqa Jisas Tibud ijannu ono cal migennu ha ija saciaduga,” gen.

<sup>14</sup> Odimeu uqa mageceb culecwe qeenu ege culimeb madom, “Tibudna waug nijec eu ihoc leiale,” om.

### *Jerusalem ono Pol cofadec cabinu je saaden*

<sup>15</sup> Odocob ono saen leih hedocob ege ceteteh saciadumeb Jerusalem ono tom. <sup>16</sup> Sisariadec malogom leih ege gami tom. Odimeb age ehigi dana oso uqana jona nijeqannu uqaca lein. Dana eu ijan Neson, uqa Saipras nuidec. Uqa sanan mecnadec malogom bibili hon.

<sup>17</sup> Odimeb ege Jerusalem li calocomun wawaga meleec cotigeil ono celeboi alalaggein. <sup>18</sup> Odocob deel osona Pol ege gami Jems feqannu lom. Odocob tamanec agena matucaca eundec cunug cegulein. <sup>19</sup> Odocob Pol feele adimeu uqa Anut uqana odoc Juda dana qee eundec gemo Anut uqa Pol ebenna cabi osolosol onnu saaden.

### *Pol cofadec agena je dah mimei tempelna nuen*

<sup>20</sup> Odocob uqa dah mumudegin je madi hedocob Anut binan sulein. Odimeig age Pol madoin, “O cotige, hina dogona, Juda dana mati bahic age wawaga meleen. Odocob age cunug Mosesna loo je todocnu gagadic megina. <sup>21</sup> Leih age hinanu madecebil doin. Hina Juda dana cunug Grik hatuna bilegina age Mosesna loo je hibemdocnu maadagana. Hina Juda dana age melemegail dewenega cagu cain qowain, age agena kobol cain todownain ec euha dah mein. <sup>22</sup> Hina ceseli hogannu euha age wele doiga. Eunu ege eeta odocnu ihoc? <sup>23</sup> Ege cel je mahocomun eu hina odoga. Dana 4-pela ene bileiga age Anutnu je cagoc oin. <sup>24</sup> Hina dana eu age ehadi lecem hinadodoc age gami soidoc biluqagan kobol todu odoiga. Odimeg agena meen qaig ceteteh eunu gadac fajiadaga. Eunu age ihoc gosiniga cocdoqagan. Hina odi odocomfi age hinanu je doin eu mele qee qa hinadodoc Mosesna loo je todu odogona eu doqagan.\* <sup>25</sup> Euqa Juda dana qee eundec wawaga meleen ege egena jaqec je suld-uadom. Jaqec je eu odi maden, ‘Age kadan tibud ihanecnadec sab cain jowain. Cete golacca cain jowain. Dool benega coldocobil cal men eu ha cain jowain. Odocob dana uqa caja qee oc cajaca cain nijuwasin,’ en,” doin.

<sup>26</sup> Hibna Pol uqa deel osona dana eundec ehadeceb soidoc biluqagan kobol eu uqa age gami odoin. Odimei uqa tempelna limei deel ganic hedocob age soidoc biluqagannu maadigia bili len. Odimei age osolosol agena ihanec odoqagannu

---

\* **21:24:** Age je Aposel 18.18na nijia eu feiga. Ageha Namba 6.1-21 feiga.

saen euha maaden.

*Juda dana age tempelna Pol hewein*

<sup>27</sup> Odocob agena ihanec odoqagannu saen deel 7-pela eu hedugia oodon Juda dana Esia hatu-nadec age Pol tempel hamol ono fimeig age dana am ben eu ihulahalaadeig Pol hewein. <sup>28</sup> Odimeig age utai madein, “Isrel dana! Cesulgeiga! Dana i hatu cunugna cocobi uqa dana cunug Isrel dana cajaca Mosesna loo jeca tempelca hibemdocnu maaadiena. Euha qila uqa Juda dana qee tempelna cedadi ehi limei gun jo i gegehin mudia!” ein. <sup>29</sup> Ge, age Trofimas Efesasdec uqa Polca taun benna mecialein. Odimeig age Pol uqa ehudeceb tempelna lesia ec cisdoim. Eunu age eu odi madein.

<sup>30</sup> Odocob taun ben euna cunug dadanein. Odocob dana cunug osoben guguli li Pol hewimeig tempelnadec didu maha gemo calein. Odimeig mahuc bahic age tempel jic cebec ben eu menein.†

*Rom han dana ilo uqa Pol cahahadon*

<sup>31</sup> Odimeig dana am ben Pol qagadoqaga oodogin age Jerusalem cunugca je alalac benanu

---

† **21:30:** Meen gel ben eu tempel maha gemo cunug talildon. Odocob Juda dana qee eundec age meen gel eu maha gemo talildon eu dunuh lecnu ihoc. Je i “dana cunug osoben guguli li Pol hewimeig tempelnadec didu maha gemo calein” eu maha gemo meen gel ben eu talildonnu maden. Odimeig je i “tempel jic cebec ben eu menein” eu tempel jonu maden. Juda dana qee eundec age tempel jo dunuh lecnu ihoc qee, Juda himec age lecnu ihoc. Rom han dana agena jo eu meen gel ben ohisna tawen. Odocob wadowad oso eu tempel maha gemo cudunnadec han dana agena jona toben.

je suldocobil Rom agena han iloca ten. <sup>32</sup> Mahuc bahic han ilo uqa uqana han dana 100 agena ilo leihca han dana leihca cedadime i dana am ben cemenug guguli nen. Odocob age han ilo uqana han danaca fimeig Pol qudi dadandoin eu culein. <sup>33</sup> Odocob han ilo Polca limei hewen. Odime i sen lecisna qagoqagannu je gatiti maaden. Odime i uqa sisiladen, “Dana i indec? Uqa eeta odeia?” aden. <sup>34</sup> Odocob dana am ben eunadec leih ceteh osonu utaeegin leih age fil utaiiein. Eunu je alalac becnu han ilo uqa cel gugnu ceteh odi cali hon eu docwe qee. Odocob uqa uqana han dana maadeceb Pol ehudi agena cabi jona ehudi ehi tein. <sup>35</sup> Odimeig age uqaca wadowad gugna ono tein qa dana am ben eu age hihibanaga teinnu han dana age Pol ilomoga cehimeig gahidumeig wadowadna jo ohis tein. <sup>36</sup> Ge, dana am eu age cunug toodudu utaein, “Qagadoiga!” ein.

*Pol Juda dana age uqana waug meleec gugnu maaden*

<sup>37</sup> Odimeig han dana Pol jo ohis ono ehudi ehi tetegin uqa han dana eu agena ilo madon, “Ija hina je oso mahecnu coisfo?” don.

Odocob han ilo Pol madon, “Hina Grik je dogona. <sup>38</sup> Hina Isipdec dana osofo uqa wele nag han dana 4,000 ihulahaladime i age Romca cadecnu aquniadime i wadauna nuen? Hina dana eu qeefo?” don.

<sup>39</sup> Odocob Pol jejeg hewi madon, “Ija Juda dana, ija Tasas taun ben Silisia hatu nagna ono cali hom. Ijana gun eu taun meca. Eunu cultecem dana cajaca je maadigale,” don.

<sup>40</sup> Odocob han ilo Pol cois ec madocob caji wad-owad igocna tatawi ebenna tiliuqagannu maadec eb tiliecebil Hibru jena maaden:

## 22

<sup>1</sup> “Dana, cotielca memielca eetanu ija odi odiginanu maadigen eu dah meiga!” aden. <sup>2</sup> Odocob uqa Hibru jena maaden dah mimeig age tilitili bahic ein.

Odogin Pol je maaden, <sup>3</sup> “Ija Juda dana Tasas taun ono Silisia hatu nagna cali hom qa Jerusalem ene Gamelielna iwaltec uu uu ben mem. Ija ege jajanigeil agena loo jenu iwaltec gagadic om. Odocob ija Anutnu cabi oqagannu cagucag cobolig odiha age qila odogina. <sup>4</sup> Ija dana jic eu toodoloig eundec hewadimig dewenega tudocomin cal moloig. Ija dana cajaca hewadimig gihacdoc jona madolig. <sup>5</sup> Ihanec dana ilo uqaca, Juda agena matumatuca, cunug agena cegulec benbenca age ihoc ija qila mele madigina ec qasali maadoqagan. Ija agena jaqec je wawaga meleec cotigeil Damaskas bilein sulduadecnu om. Dana cajaca age Damaskas bilein age jic eu toodoloig ija eu age hewadimig senna qagaadimig Jerusalem cedadi ehi becemin dewenega tудоqagannu sultecebil nom,” aden.

*Pol uqa adi Kristen mennu maaden  
(Aposel 9.3-19; 26.12-18)*

<sup>6</sup> “Odimig ija jic cocobi Damaskas cemenug mumudigin cahineg cam gemo odi fulacdoc ben mahuc bahic sao jobondec iletimei alilten.

<sup>7</sup> Odocob ija mahana toni ninijig jejeg mateten

dah mem. Uqa maten, ‘Sol, Sol! Eetanu ija jabiti tootootagana?’ ten. <sup>8</sup> Odocob ija sisildom, ‘Tibud, hina in?’ dom. Odocomin uqa jejeni hewi maten, ‘Ija Jisas Nasaretdec hina jabi tootoodogona eu,’ ten. <sup>9</sup> Odocob dana ijaca cobom age fulacdoc fein qa jejeg ija je maten eu qee dah melein. <sup>10</sup> Odocobil ija sisildom, ‘Tibud, ija qila eeta odigen?’ dom. Odocomin Tibud maten, ‘Cajimeg Damaskas ono laga. Odocom ono hina Anut cabi mugum men eu mahoqagan,’ ten. <sup>11</sup> Fulacdoc gagadic bahic eunu ija ami galuc men. Eunu dana ijaca jic cobom eu ija tootec ebeni hewimeig jic gimtetegin li Damaskas calom,” aden.

<sup>12</sup> “Ono dana oso, ijan Ananias, uqa cuha fec dana uqa Mosesna loo je toodoloi. Odocob Juda dana Damaskas biloloig uqa co toodu cuhadoloig. <sup>13</sup> Odocobil uqa ijaca hu cemeni tawime i maten, ‘Coti Sol, meciaga!’ ten. Saen euna dih ija meciimig mecidom. <sup>14-15</sup> Odime i uqa maten, ‘Hina Jisasnu dana cunug Jisasna ceteteh cunug amenna femca, dahinna dah memca eu qasali maadegan. Eunu ege jajanigeil agena Anut hina uqana odoc cisdocnuca, uqana dana ititom fecnuca, dana ititom eu uqa jejeggul je mamadeb hina dah mecnuca nesili ehikia. <sup>16</sup> Hina qila cain daleagaun. Cajecem oso wa joiheia. Odimeg uqa ijanna utadocom Anut hinana silail cagasihigian,’ ten,” aden.

*Anut Pol suldocob Juda dana qee eundec me je maaden*

<sup>17</sup> “Odocob ija Jerusalem ceseli bem. Odimeg ija tempelna inondudugin majauten. <sup>18</sup> Euna



ija Tibud fifigin maten, ‘Dana ene hina ijanu je qasali maadecem qee dah mowain. Eunu mahuc Jerusalem culdi nuuga,’ ten. <sup>19</sup> Odocob ija jejeg hewi madom, ‘Tibud, age ija Juda agena cuha jonana limig dana hinanu wawaga meleen eundec hewadimig gihacdoc jona madimig geh qisaadolog eunu dogina. <sup>20</sup> Odocob age hinanu qasali maadec dana Stiwen age qocobil cal mennu ijadodoc wawi me ninijen tatawigin odoin. Odimig dana qocobil cal migiannu agena lotoc huli mein eu cofduadem. Eu cunug age ijanu du cuhadogina,’ dom. <sup>21</sup> Odocomin Tibud maten, ‘Ija hina sulhecemin ene qee onoca bahic Juda dana qee eundec gemona nuegan. Eunu nuuga!’ ten,” aden.

### *Rom han dana ilo Pol cofdon*

<sup>22</sup> Pol uqa dana am ben je maaaden age dah mein qa uqa Juda dana qee eundecnu gemona nuegan ten je i madeceb age conoga suli u utaein, “Dana eundec uqa cebac bilecnu ihoc qee. Ehudi nueiga! Qagadoiga!” ein. <sup>23</sup> Odimeig age lotocna ebelacdodoig bagaiiein comis ohis bilisadocobil titien. <sup>24</sup> Odocob Rom agena han ilo uqana han dana je gatiti maadeceb Pol agena cabi jo hamol ehudi ehi lein. Odimei han ilo uqa Pol sisildodobil uqa Juda dana cel gugnu hewein eu qasali madigiannu geh qisadocnu je gatiti maaden. <sup>25</sup> Euqa saen age geh qisadoqagannu haluna qagein tatawen han dana 100 agena ilo oso ono cemenug tawen eu madon, “Hina dana oso uqana gug jobon eu Rom geh qisadocnu gadac

cois ec oso taweiafo, uqa cahuldoc oso ha qee felein?” don.\*

<sup>26</sup> Odocob han dana 100 agena ilo eu dah mimei han iloca limei madon, “Dana i uqana gug jobon eu Rom! Hina eeta oodoga odogona?” don.

<sup>27</sup> Eunu han ilo Polca limei sisildon, “Mataga, hinana gug jobon eu Romfo?” don.

Odocob Pol jejeg hewi madon, “Ese, ijana gug jobon eu Rom,” don.

<sup>28</sup> Odocob han ilo madon, “Ija meen qaig gadac meca fajimig ija dana uqana gug jobon eu Rom odi calem,” don.

Odocob Pol jejeg hewi madon, “Euqa ija Rom hatuna basiten,” don.

<sup>29</sup> Odocob mahuc bahic dana age Pol je oso sisildoqagannu tawein eu age bicbic ceselein. Odocob han ilo uqa Pol Rom hatunadec ec dumei uqa senna qageinnu uqaha cucuien.

<sup>30</sup> Odocob han ilo uqa eetanu bahic Juda dana age Polnu um qoin eunu jic megen. Eunu deel osona Polna sen cufalitumei ihanec dana benbenca, Juda agena cegulec benben cunugca ceguluqagannu je gatiti maaden. Odimeu uqa Pol ehudi ehi nu amagana muden.

## 23

### *Pol Juda agena cegulec benna je maaden*

<sup>1</sup> Odocob Pol cegulec ben eu ameg gugca meciaadi je maaden, “O cotiel! Ijana wawina cisdoc eu camasac bahic Anut amegna cocobi hu

---

\* **22:25:** Age je Aposel 16.37na nijia eu feiga. Rom agena loo je eu dana age Rom dana qisadocnu cahacaden.

deel i gadacna biliga,” aden. <sup>2</sup> Odocob ihanec dana ilo Ananias leih Pol cemenug tawein eu age Pol cona qelecnu maaden. <sup>3</sup> Odocob Pol Ananias madon, “Anut hina bahic qihigian, hina gel age baial senenec tatacan joudein, age cete me qee dunuh fecwe qee! Hina Mosesna loo je eu toodudu gesiltecnu biliga qa hina qitecnu je maadagana eu loo je wooldogona,” don.\*

<sup>4</sup> Odocob dana Pol cemenug tawein eu age madoin, “Hina Anutna ihanec dana ilonu je me qee madagana!” doin.

<sup>5</sup> Odocob Pol jejenega hewi maaden, “O cotiel, Anutna loo je madena:

‘Hina qisol je hinana dana cajaca cofdoc ilonu je cain madagaun,’ ena,” aden. (*Kisim Bek 22.28*)

Uqa ihanec dana ilo eu ija qee dolom.

<sup>6</sup> Euqa Pol uqa am leih age Farisidecca, am leih age Sadjusidecca eu uqa fen eunu cegulec euna utai maaden, “Cotiel! Ija Farisidec. Ija Farisi age melemega. Cal mec dana age cal mecnadec ceseli cajoqagannu wawi meleec hewi sumudigina eunu ija ene je gesilec amagana tawiga!” aden.

<sup>7-8</sup> Sadjusi dana age dana cal mecnadec ceseli cajecwe qee, odocob age ensel kisca eu mele qee ec madegina. Euqa Farisi age je cijed eu cunug mele ec madegina. Eunu Pol uqa odi maaden bahic Farisi Sadjusica am lecis age fee dadanein. Odocob dana age am lecisdu qatani

---

\* **23:3:** Wok Pris 19.15 eu gesilec dana uqa gesilec jona kobol tutuc odigian ec maden. Acahna Pol uqa je eunu cisdumei ihanec dana ilo uqa je eu tefacdon eu cisdon.

tawein. <sup>9</sup> Odocob dana agena utaec li ben don. Odocob loo je iwaladec dana leih Farisi agena amnadec caji tawimeig culec bahic culein. Age madein, “Ege dana inu ceteh cahuldoc oso qee folom! Acahna enselfo, qee kisfo mele bahic je madoia!” ein.

<sup>10</sup> Odocob je fee dadanec li ben bahic docobil age Pol qu tatali susul falecnu ihoc oodogin fimei han ilo uqa cucuien. Eunu uqa han dana suladecb numeig Pol dana am dunuhdec umeig agena cabi jona ehudi ehi tein.

<sup>11</sup> Odocob witic euna Tibud Pol qeihna tawimei madon, “Cisdoc fifil cain ogaun! Hina ijanu Jerusalem ene qasali maadaga. Eunu Rom ono ha odi bahic ijanu qasali maadegan,” don.

### *Juda dana age Pol qagadocnu madein*

<sup>12</sup> Cojageceb qasil wele Juda dana leih cegulimeig cisdoc gabandoin. Age wa sabca qee jec bibileig Pol qagadocnu je cagoin. <sup>13</sup> Dana cegulimeig je gabandoin agena sanijec eu 40 wooldoc. <sup>14</sup> Odimeig age ihanec dana benbenca, Juda agena matumatuca ageca limeig maadein, “Ege wa sabca qee jec bibileb Pol qagadocnu je cagoqa eu gagadic muduqa. <sup>15</sup> Odocob qila age cegulec ben ageca je suldocobil Rom han iloca teceb Pol suldocob ageca nigianu, uqana je mele bahic eu sisildumeb doqan ec mimeig je suldoiga. Euqa uqa ene qee calec ninijeb umna qagadocnu sumudeqan,” adein.

<sup>16</sup> Odocob Pol cebinag melah Pol qagadocnu madein je eu don. Eunu uqa han dana agena cabi jona timei Pol madon. <sup>17</sup> Odocob Pol han

dana 100 agena ilo oso utadocob hocob madon, “Dana haun i han iloca ehudi ehi laga. Uqa je oso madugian,” don. <sup>18</sup>Eunu han dana aquniadec eu ehudi han iloca ehi len. Odimei madon, “Dana haun i uqa hina mahecnu je osoca. Eunu gihacdoc dana Pol dana haun i hinaca ehudi ahocnu niniteceb ehudi ahuga,” don.

<sup>19</sup>Odocob han ilo uqa dana haun eu eben umei ale cuhanuc limesi sisildon, “Cel je ija mategan?” don.

<sup>20</sup>Odocob uqa madon, “Juda age uqadec hina Pol ehudi cegulec amagana nocnu sisilhuqagannu je wele cagoin. Uqana je mele bahic eu sisildumeig doqagannu euna memeig je sulduhuqagan. <sup>21</sup>Euqa dana am euna agena sanijec eu 40 wooldoc age jahunimeig uqa sumudi biluqagan. Age je cagoc oso madein eu odi age wa sabca qee jec bibileig Pol qagadoqagan ein. Eunu agena je cain dogaan. Age qila odoqagannu saciadoiga bileiga. Odocob hinana je adi dah moqagannu dih sumudegina,” don.

<sup>22</sup>Odocob han ilo je gatiti madon, “Hina in oso je ija mataga eu cain madogaun,” don. Odimei dana haun eu suldocob ceseli nuen.

### *Han dana ilo Pol suldocob uqa gabman ilo Filiksca nuen*

<sup>23</sup>Odimei han ilo uqana han dana 100 agena ilo lecis utaaleceb lecebil maalen, “Han dana 200 Sisaria beloqagannu saciaadesia. Hos dana 70ca sawal dana 200ca witic 9 kilok beloqagannu ageha saciaadesia. <sup>24</sup>Hos leih Pol euna nuigiannu saciaadesia. Odocob cofdu cuhadodosi ehi nui

gabman dana Filiksca Sisaria ono mudesia,” alen.

<sup>25</sup> Odimeï han ilo je oso jaqen eu i edi:

<sup>26</sup> “Ija Klodias Lisias, hina dana meca bahic Filiks, Sisaria gabman ilo feele higina,” don.

<sup>27</sup> “Dana i ija sulduhigina Juda dana hewimeig qagadoqagan odoïn. Age oodogin fimig uqa Rom hatunadec eu dumeig eunu ija ijana han danaca numeb dana ebeneganadec cacawudom. <sup>28</sup> Odimig ija uqa eetanu hewein eu gug dugennu ehudi agena cegulec benna ehi nom. <sup>29</sup> Odimig age agena loo jenu balijimeig hewein eu fem qa uqa ameg oc cal mecnuca, gihacdoc jona lecnuca dewegna cahuldoc eu oso qee felem. <sup>30</sup> Odocob saen ija Juda dana leih uqa qagadocnu saciadogina ec dumignu hinaca mahuc suldocomin hoia. Ija dana age uqanu um qoin eu age eetanu uqa hewudein eu hina amenna madoqagannu je gatiti maadem,” don.

<sup>31</sup> Eunu han dana je toodu saciadoin. Age Pol ehudimeig witic euna Antipatris ono calein.

<sup>32</sup> Cojageceb han dana jic coboin age haun agena cabi jona ceceselegin hos dana age uqaca belein.

<sup>33</sup> Numeig age ehudi nui Sisaria ono calein. Gabman ilo jaqec je eu uuteig Pol uqa ebenna mein.

<sup>34</sup> Odocob gabman ilo Filiks jaqec je sanijimeï Pol uqa cel hatunadec ec sisildon. Saen uqa Silisiadec ec dumei <sup>35</sup> uqa madon, “Dana age hina dewennu um qoin eu age calecebil ija hinana je dah mihigen,” don. Odimeï uqa jo King Herod bilia euna cofdodobil biligiannu je gatiti maaden.

## 24

*Juda dana age Filiks amegna Polnu je me qee madein*

<sup>1</sup> Deel 5-pela hedocob ihanec dana ilo, Ananias, Juda agena matu leihca, agena je gesilec saenna cesuladec dana, ijan Tetalas, uqaca age Sisaria ono nimeig Filiks amegna limeig Pol dewegnu balijein.

<sup>2</sup> Odocob Tetalas ijan ocob limei Pol dewegnu odi um qu maden, “Dana meca! Hinana me odocna egena hatu i cofdodogon saen cecelac bahic malol bibili hom. Odocob ceteteh meme geh bahic egena hatu ijan menu mudein. <sup>3</sup> Ege ceteh i edi geh bahic saen cunugna gale gena. Eunu ege cunug hegaga oqona. <sup>4</sup> Ija hinana saen geh cusduhaga qee tel qa eunu ija ninihigina egena je saecnu nag odi dah mecnu wawin qoia. <sup>5</sup> Ege dana i uqa duman me qee bahic eu foqona. Uqa Juda dana cunug hatu cunugna bilegina sisigaladi cobona. Odimeu uqa Juda dana am oso Nasaret egin agena iwaladec ilo oso bilia. <sup>6-8</sup> Uqa tempel ha ceteteh me qee ehi li gegehin mudigia oodon hewom. [Ege egedodoc egena loo je gadacna uqana odoc gesilecnu je gabandoum qa han ilo Lisias dana am ben dunuh limei gagadic odocna ege ebenigenadec ehuden. Odimeu Lisias uqana um qoc dana hina amenna hoqagannu je gatiti maaden.] Hina dana i sisildufeg hina hinadodoc ege eetanu dewegnu um qoqona eu dogan,” en. <sup>9</sup> Odocob Juda dana cunug limeig je eu mele bahic ein.

*Pol Filiks je oso madon*

<sup>10</sup> Odocob gabman ilo Pol ebenna je madecnu ihohdocob Pol maden, “Hina hatu ina je gesilecnu cabi gel mati bitem eu ija dugina. Eunu ijadodocnu hina amenna je wadacduhecnu wawi ceelena. <sup>11</sup> Hinadodoc sisiladecem mahecebil docnu ihoc deel 12-pela qee hedoc ninijen ija Anutnu cuha figennu Jerusalem ono tem. <sup>12</sup> Odocob Juda dana age ija osoca tempelna fee dadanoowon qee fecitelein. Odimeig age tempelnaca agena cuha jonaca, taun bennaca dana ihulahalaadigin ha qee fecitelein. <sup>13</sup> Odimeig age qila ija deweninu um qoginanu ha je mele oso qee mahowain. <sup>14</sup> Euqa ija je i mele mahigina. Ija jic eu toodugina eu age cahuldogina egina euna ija ege jajanigeil agena Anut binan suligina. Ija ceteh cunug Mosesna loo je madenanuca, je hahun madec dana agena jaqec jenuca eunu ha wawi meleena. <sup>15</sup> Ija Anutnu wawi meleec hewi sumudigina odi i ageha hewi sumudegina eu dana cunug meca me qeeca cunug age cal mecnadec ceseli cajoqagan. <sup>16</sup> Eunu ija Anutca, danaca, amagana ijana kbolca, ijana wawina cisdocca, jic coboc me himec foqagannu gagadic migina,” en.

<sup>17</sup> “Odocob cabi gel leih ija Jerusalem ono qee bilelem. Odocob hibna ija Jerusalem ono ceseli limig ijana dana cajaca ono bilingina agena meen qaig sawen eundec siwiadecnu ehi li aadig ihanii hetaga docnu ono tem. <sup>18</sup> Ija saen euna tempelna tatawigin fecitein. Ija Juda agena soidoc kbol



odi hedom.\* Ono dana am ben qee cedi ehi lelem. Odocob ija qee odudecemin je alalac tel. <sup>19</sup> Euqa Juda dana leih Esiadec age ono bilein. Age ijanu jecafi agedodoc hina amenna hu tawimeig ija deweninu um qocnu biloub. <sup>20</sup> Qeefi, dana i age ene bilegina culadecem agedodoc ija cegulec benna amagana tawem cel cahuldoc ija odom fein eunu mahoqagan. <sup>21</sup> Ija ceteh osol himec amagana tatawi qasali maadem, ‘Ija qila ijana je gesiligina ija dana cunug cal mecnadec ceseli cajecnu wawi meleena ec maden eunu hina amenna tawiga!’ adem,” en.

<sup>22</sup> Odocob Filiks uqa Jisasna jic eu odinu du cuhadon je gesilecnu menen. Uqa maaden, “Isi han ilo Lisias hocob ija ceteteh i gesili maadigen,” aden. <sup>23</sup> Odimei uqa han dana aquniadec Pol cofdocnu je gatiti madon. Euqa uqa Pol gihacdoc jona biligianqa uqa ceteteh uqana danah cois ahu utuqagannu ec madon.

*Filiks Pol gihacdocna mudeceb cabi gel lecis bilen*

<sup>24</sup> Odocob hibna deel leih hedocob Filiks uqa aideg Drusilaca hosin. Aideg uqa Judadec. Uqa Polnu je suldocob ehudi ehi lecebil uqa Pol Kraïs Jisasnu waug meleecnu mamaden Filiks dah mudi bilen. <sup>25</sup> Euqa Pol uqa ititom kobol odocca, me cobocca Anut deel hib cit qocna humei gesiligigi tutuc migeccnu madeceb Filiks uqa cucuimeimei madon, “Hina qila cois nuugale. Ija saencafi haun

---

\* **24:18:** Tetalas uqa Pol eu tempel Anut amegna gegehin mudigia oodon ec maden. Pol uqa jejeg hehewi uqa soidoc kobol odi hedumei tempel dunuh len ec maden.

mahecemin hogan,” don. <sup>26</sup> Saen euna himec uqa maden Pol meen qaig utigian ec uqaha cisdon. Eunu uqa Pol utadocob hocob je madolosi.

<sup>27</sup> Odocob cabi gel lecis hedocob Posias Festas uqa Filiksna cabi cudun on. Odimei Filiks Juda dana age uqanu gale adigiannu Pol gihacdoc jona culdeceb bilen.

## 25

*Pol uqa Sisa Juda dana agena balijec je eu haun dah miigiannu sisilen*

<sup>1</sup> Odocob Festas uqa Judia hatu cofdocnu humei deel cijed hedocob uqa Sisariadec Jerusalem ono ten. <sup>2-3</sup> Ono ihanec dana benbenca, Juda aquniadec dana ageca age Festasca limeig Pol dewegnu balijein. Odimeig age jicna hohob Pol qagadoqagannu wele saciadoinnu Festas agena gale adec toodumei Pol Jerusalem suldocob ceseligiannu ninidoin <sup>4</sup> Festas jejenega hewi maaden, “Pol uqa Sisaria ono gihacdoc jona mudein bilia. Ijadodoc ono nag odi ceseli nugen. <sup>5</sup> Eunu agena iloilo culadecebil ija gami numeb uqa ceteh cahuldoc oso odonfi dewegnu um qoiga,” aden.

<sup>6</sup> Odocob Festas ageca deel 8-pelafo, 10-pelafo eu odi bilimeig Sisaria ono non. Cojageceb deel osona uqa je gesilec cudunna bilimeig Pol hamol ehudi ehi loqagannu je gatiti maaden. <sup>7</sup> Odocob Pol hamol leceb Juda dana Jerusalemdec noin eu age talildu tawimeig age dana i uqa ceteh me qee mati bahic odonnu madein qa um qoc je eu age mele je oso madocwe qee. <sup>8</sup> Euqa Pol uqadodoc cahahadoc je maden, “Ija Juda agena loo jeca

tempelca Sisaca age cunugnu cahuldoc oso qee odolom,” en.

<sup>9</sup> Euqa Festas uqa Juda dana agena gale adec toodugia cisdon euna uqa Pol sisildon, “Hina Jerusalem ono timeg um qoc je inu ija amina haun madecem gesiligenfo?” don.

<sup>10</sup> Euqa Pol jejeg hewi madon, “Ija Sisana je gesilec cudunna tawiga eu ene hina temtoun. Ija Juda dana i age cahuldoc oso qee odadelem eu du cuhadogona. <sup>11</sup> Eunu ija cahuldoc oso odomfi ija cal mec ameg ocnu ihoc ija eu wooldocnu qee sisilelem. Euqa agena je meleca qee ija um qitecebilfi oso ija eu age ebenegana mitecwe qee. Ija Sisa amegna je haun madigennu sisilhigina,” don.\*

<sup>12</sup> Odocob Festas uqana dado mudec dana gami togodumeig jejeg hewi madon, “Hina Sisa amegna je haun madecnu madaganu hina euna nuegan,” don.

### *Festas uqa Agripa Polnu sisildon*

<sup>13</sup> Odocob saen leih hedocob King Agripa† aideg Benaisica Sisaria ono Festas feele dowasa hosin. <sup>14</sup> Odimesi ale ono deel leih bilimesi Festas Polna je gesilen eunu Agripa sildi madon, “Dana oso ene uqa Filiks gihacdoc jona culden bilina. <sup>15</sup> Saen ija Jerusalem tecemin ihanec dana benbenca, Juda agena matumatuca uqa dewegnu balijein.

---

\* **25:11:** Rom agena loo je oso eu Rom dana oso uqa gesilec dana eu uqana je qee dah mi cuhadol ec cisdufei uqa Sisa amegna uqana je madocob Sisa gesildugiannu gesilec dana sisildocnu ihoc ec maden. Sisa eu Rom cunug agena king ijan. † **25:13:** King Agripa uqa King Herod i uqa Jon waliag, Jems, qocob cal men eu uqa melah. Age Aposel 12 feiga.

Odimeig uqa cal mec ameg ocnu ija cois igennu sisiltein. <sup>16</sup> Euqa ija Rom agena kobol eu odi qee ec maadem. Ege dana oso uqa dewegnu balijecebil uqa age ebenegana deweg tudocnu mahuc qee moqaun. Euqa casac dana uqa um qudec dana eu age uqaca mecidodii um qudec je eunu madocobil uqa uqadodoc cahahadoc je maadigian. <sup>17</sup> Eunu saen eu age ene hu gabandoin euna ija qee daleelem qa cojageceb deel osona ija je gesilec cudunna bilimig dana eu hamol ehudi ehi lecnu je gatiti maadem. <sup>18</sup> Odocob um qoc dana eu age caji tawein qa dana eu uqana cahuldoc me qee bahic oso madoqagan ec cisdom age eu odi oso qee madelein. <sup>19</sup> Euqa agena um qoc je cunug eu agena cuha fecnu kobolnuca dana oso ijan Jisasnuca himec. Odocob Jisas i uqa wele cal men qa Pol uqa cebac bilia ec madena. <sup>20</sup> Ija jic osona je mele bahic je i gesilecnu oso qee felem. Eunu ija Pol Jerusalem ono leceb je i haun ono gesilecnu ihocfo ec sisildom. <sup>21</sup> Euqa Pol uqa Sisa amegna je haun madigiannu sisilten. Uqa ene cofdodobil bibileb Sisa je eu gesiligiannu sisilten. Eunu age cofdodobil leceb ija Sisaca ihoc suldocomin nuigian eunu je gatiti maadem,” don.

<sup>22</sup> Odocob Agripa Festas madon, “Ijadodoc dana i dah mudecnu gale tena,” don.

Odocob Festas jejeg hewi madon, “Hina uqadec dah mudegan,” don.

<sup>23</sup> Odocob deel osona Agripa aideg Benaisica cegulecna hocobil bala hewalecebil udoc fifi bileginana jo ben hamol euna han dana mecaca ageca taun ben aqunec dana gami lein. Odocob

Festas je gatiti maadeceb Pol hewi hamol ehudi ehi lein. <sup>24</sup> Odimei Festas maden, “King Agripa, cunug qila ene egeca biluqa, age dana i fegina Juda dana cunug Jerusalemca ene bileginaca uqa dewegnu uh megina, age uqanu je ahu ija matein. Age gemanagana uqa maha ina cebac geh cain bilecdain eu odi utaein. <sup>25</sup> Euqa ija uqa ameg oc cal mecnu ceteh oso qee felem. Odocob uqadodoc Sisa amegna haun tawecnu sisilen. Eunu ija uqa suldocnu cisdom. <sup>26</sup> Euqa ija ceteh oso mele bahic uqanu Sisa jaqutocnu oso qee felem. Eunu ija uqa ene age amagana hewi ahuga. Odocob King Agripa, hinaca bahic, hewi ahuga! Eunu hibna uqana je eu wali fimig ija ceteh eunu jaqigen. <sup>27</sup> Ge, ijana cisdoc eu odi. Ija gihacdoc dana oso Sisaca suldugenqa uqanu um qoc je uqana gug oso qee camasac mudigaun eu tutuc qee,” en.

## 26

### *Pol Agripa amegna je sildi madon*

<sup>1</sup> Odocob Agripa Pol madon, “Hina qila cois hinadodocnu hinanu je madaga,” don. Odocob Pol eben suli umei uqadodoc uqanu je odi maden, <sup>2-3</sup> “King Agripa! Hina Juda agena kobolnu sisilecnuca cunug du cuhadogona. Eunu ija ijadodoc ijanu mele je himec qila hina amenna Juda dana ceteteh cunugnu ija balijitein eunu ha madigen eu me bahic. Eunu ija hina cehna dah miti bibilem mahigen,” en.

<sup>4</sup> “Juda dana cunug age ija wele mel haunna adi bilem eu dogina. Ija simnadec sanan mimig ijana hatuna bahicca Jerusalemca bibili cocobi hom adi

bilem eu age dogina.\* <sup>5</sup> Wele bahic age dudu hoin eu age ija deweninu je qasali madecnumi eu casac bahic ija egena am gun bahic euna bilem eu Farisi, agena jic coboc toodu cuhadom age gaid doloig. <sup>6</sup> Odocob Anut uqa je hahun ege jajanigeil maaden eunu wawi meleecna eunu qila ija ene temtecna tawiga. <sup>7</sup> Je hahun eu ege Juda dana agena sihul 12-pela cunug ocnu wawaga ben bahic ninijen age Anut witic cahinegca binan suloloig. O King, wawi meleec eunu Juda dana age balijitegina. <sup>8</sup> Eetanu Juda age madegina, ‘Anut uqa cal mecnadec tuliadeceb cajecnu wawige qee meleeiaun,’ egina?” en.

<sup>9</sup> “Ija jic filfilna Jisas Nasaretdec ijan me qee mudigen ihoc ec cisdom. <sup>10</sup> Jerusalem ono eu odi odom. Ija je cois ec ihanec dana benben cabi itecebil Anutna qagu coboc dana cajaca mati bahic gihacdoc jona madem. Saen age euna aqecebil cal mecebil ija eunu cois olig. <sup>11</sup> Saen geh bahic Juda agena cuha cunug jonana culumen adolig. Agena wawaga meleec hibemdoqagannu odadolig. Ija eu agenu gemani gagadic beben taun ben hatu filfilna nijoloig han mige bili jabadi tooadolig,” en.

*Pol adi Kristen mennu sadon  
(Aposel 9.3-19; 22.6-16)*

<sup>12</sup> “Odocob ija eu odi odigennu ihanec dana benben agena je gatiti matiti cabi itecebil Damaskas nuem. <sup>13</sup> O King, nunuigin jicna cahineg cam gemo cehen tatawen saonadec

---

\* **26:4:** Pol uqa sim bilen saenna uqa Tasas taun ono Silisia hatu nagna bilen. Age Aposel 22.3 feiga.

fulacdoc camna iletéc wooldoc ijaca dana osoben belom gami iletí talgen fem. <sup>14</sup> Odocomin ege cunug toni mahulom ninijuqun jejeg oso Hibru jena ija mateten dah mem. Uqa maten, ‘Sol, Sol! Hina eetanu jabiti tootootagana? Hina doc ceteh aigca tohol qocom jehina eu bulmakau cinigwe culum hewec dana uqa kom aigca ihocdocob jaih toholeceb uqadodoc qonawe qihina,’ ten. <sup>15</sup> Odocob ija sisildom, ‘Tibud, hina in?’ dom. Odocob Tibud maten, ‘Ija Jisas, hina jabi tootoodogona eu. <sup>16</sup> Euqa caji tawaga. Hina ijana cabi dana ehigennu hinaca camasac miga. Hina qila ijana odoc fimeg qasali maadegan. Odocob hibna ceteh ihachigen eunu ha qasali maadegan. <sup>17</sup> Ija Isrel danaca Juda dana qee eundecca age ebeneganadec cacawihi oihimig eu ageca sulhigen. <sup>18</sup> Hina eu age amaga hulelduadecem age tu hibemdumeig fulacdocna falicdoqagan. Odocob Setenna gagadic odoc culimeig Anutca hoqagan. Eunu ijanu wawaga meleeceb agena silail cagasiadecemin agena cudun Anut dana qagu maden ageca oqagan,’ ten,” en.

*Pol uqana misin cabinu Agripa madon*

<sup>19</sup> “Eunu, O King Agripa, ija saonadec majaudoc amina calen eu qee wooldolom. <sup>20</sup> Ija casac Damaskas me je maadimig hibna Jerusalemca Judia hatu cunugnaca Juda dana qee eundec ageha maadem. Agena silail hibemdumeig Anutca falicdoiga ec maadem. Odimeig age agena silailnu tului falicdoin uqana odoc eu ihacecnu ec maadem. <sup>21</sup> Eu odi odomnu Juda dana tempelna

hewitimeig qagatoqaga odoin. <sup>22</sup> Weledec hocob deel ina bahic Anut ija cesulteten ija dana ijana-gaca ijanagaca qeeca je qasali maaadi ene tawiga. Ija madigina je hahun madec dana ageca Mosesca odi cali hugian ein eunu himec maadigina. <sup>23</sup> Je eu odi Anutna Kraiss uqa dain ben dugian. Odocob uqa cal mecnadec aquniadi ceseli cajigian. Uqa Juda dana Juda dana qee eundecca fulacdocna je Anut age cahahaadecnu ihoc ec maadeceb doqagan,” en.

*Pol Agripa hina wawin meleecnu bahic ec madon*

<sup>24</sup> Odocob Pol eu odina uqadodoc uqanu je madden Festas gagaladon, “Pol, hina gad! Hinana doc ben bahic odiheceb hina gad magana!” don.

<sup>25</sup> Odocob Pol jejeg hewi madon, “Festas meca! Ija gad qee. Ija je madigina eu mele bahic, docnu me bahic. <sup>26</sup> King Agripa uqa ceteteh i agenu dona. Eunu ija je cunug saluqi u madugina. Ceteteh i eu jahunec sucunna qee calel. Eunu ceteteh i cunug dona eu ija dugina,” don. <sup>27</sup> “O King Agripa, hina je hahun madec dana agena jenu wawin meleenafu? Hina wawin meleena eu ija dugina!” don.

<sup>28</sup> Odocob Agripa Pol madon, “Saen gohic ina hina oditecem Kristen dana migen ec cisdogonafu?” don.

<sup>29</sup> Odocob Pol jejeg hewi madon, “Saen gohicfo, saen cecelacfo ijana Anutnu inodoc eu hinaca dana qila ene ija dah miteginaca eu age ija cinigwe ibuldoqagan. Sen iqa agenu cain biliaun!” don.



<sup>30</sup> Odocob kingca gabman iloca Benaisica cunug age gami bilein age caji tawein. <sup>31</sup> Odocob age hamol osona belimeig togodudu madein, “Dana i ameg oc cal mecnuca gihacdoc jona mudecnuca ceteh oso odocnu qee nijel,” ein. <sup>32</sup> Odocob Agripa uqa Festas madon, “Dana i uqa Sisa amegna je haun madecnu qee sisiloubmi ege gihacdoc jonadec besitoum,” don.

## 27

### *Age Pol wagna mudecebil Rom ono nuen*

<sup>1</sup> Odocob ege wagna Itali hatuna nuecnu je nijeceb eu age Pol gihacdoc leihca han dana 100 agena ilo oso ebenna mudein.\* Uqa ijan Julias. Uqana han am age “Sisa Ogastasna han am” doloig. <sup>2</sup> Odocob ege wag Adramitiamdec eu taun Esia lan toodu nijeginana nuigiannu saciadon tatawen euna tobi belom. Aristakas uqa Masedonia dana Tesalonaikadec uqa egeca osoben belom. <sup>3</sup> Cojageceb ege Saidon taun ono calom. Odocob Julias uqa Polnu waug qocob uqa Pol cois ec madocob uqa uqana danah eundecca limei meciadeceb ceteteh utoin. <sup>4</sup> Odocob ege on-odec haun wag tobimeb belom qa fufu medemige cagu qahi ege nom odi becebnu ege Saipras nui hibilohu isec qaqali belom. <sup>5</sup> Odimeb ege Silisia Pamfiliaca macasna qeti limeb Maira taun ono calom, eu Lisia hatu ono. <sup>6</sup> Ono han dana 100

---

\* **27:1:** Luk uqa “ege” haun jaqen, eunu Pol uqa Rom taun ono nuen saenna Luk uqa gami belesin eu odi fena. Age Aposel 16.10ca, 21.17ca euha feiga.

agena ilo Aleksandriadec wag Itali ono nuigiannu tatawen fimei wag euna cedi migen.

<sup>7</sup> Odimeb ege macas launa deel mati cebitnana cobom. Cabi memeb hibna taun Naidas ono calom. Fufunu ege macas eu gemogemo odi toodu nuecwe qeenu ege Krit nui hibilohu isec qaqali Salmoni cemenug mumudi cuculdeb macas lan toodu belom. <sup>8</sup> Odimeb ege lan toodu belom. Cabi memeb wagnu macas sucun qoc cudun me bahic egina ono calom, eu Lasia taun cemenug nijia.

<sup>9</sup> Odocob ege ono saen cecelac bahic cusdom. Juda agena Cud Bilec Saen eu hedon.† Eunu wag cobocnu saen me qee calen. Odocob Pol uqa cisdon eu maaden, <sup>10</sup> “O dana, ege wagna nuecnu saen me qee bahic eu ija figina. Ceteteh wagca cunug fadaligian. Dana agena cebac bilec ha felacudoqagan,” aden. <sup>11</sup> Euqa han dana 100 agena ilo wag hewec dana wag gugca je madesin eu hewen qa Polna je eu qee hewel. <sup>12</sup> Odocob wag tawec cudun macas sucun qoc eu duen saenna ono tawecnu me qee. Eunu dana matica age cisdoin, wag macas gemo lecnu cois ein. Odimeig Finiks ono nuecnu ihocfi beleqannu cisdoin. Finiks eu wag cudun macas sucun qoc Krit nuina eu cam noc anse meulaca isec macas mecidoc tawoloi. Odocob age ono wag ehi li duen saenna mecebil tawecnu ihoc ein.

---

† **27:9:** Cud Bilec Saen eu Anut Dana Cajaca Cunug Agena Silail Cagasiadennu Deel. Age Wok Pris 25.9 feiga. Saen euna eu Septemba leceb Oktoba odi fufu gagadic eu Mediterenian Macasna fulufuluenu cajen. Odocob wag age macas eu alildudu beloloig.

*Fufu ben hocob macas qahen*

<sup>13</sup> Odocob tim me bahic cam noc ansena isec fulufuluen. Odocob dana eu age agena cisdoc ihoc ligian ec cisdoin. Age anka hewecebil teceb Krit nui lan cemenug bahic lein. <sup>14</sup> Euqa nag odi bahic fufu gagadic Jawalti egina eu cam bec anse isec fulufuluen cajan. Fufu nuina isec cajimei macas qahen. <sup>15</sup> Fufu caji wag qocob wag fufu amegna bahic nonnu hewecwe qee ege culdocomun fufu u hewi nuen. <sup>16</sup> Odocob ege Koda nui nag macas gemo leceb qaqali cobom. Ono wag nag wag ben uqa didon eu wag benna cabalu mecnu odom qa cabi bahic. <sup>17</sup> Eu age didocobil wag benna ten. Odocob age halu gagadic helecebil wag ben bisalu lecebil diadimeig wag ben qataneiaunnu qagein. Eu age Libia hatu lanna ono gadgad esic of qowainnu cucuiein eunu age lai hewegin toneceb wag culdecebil fufu fulufuluaaden belein. <sup>18</sup> Odocob fufu ben bahic odi huhu nijen eunu deel osona eu age ceteteh wagnadec cedi helec sanan mein. <sup>19</sup> Odocob deel eu todocob eu age wag uqana cabi ceteteh age ebenegagulna cedi helein.† <sup>20</sup> Deel mati bahic ege cam malaqaca qee folom. Odocob fufu odi huhu nijen. Euna ege cahahagecnu qee cisdolom qa ege fadaleqannu cisdom.

<sup>21</sup> Odocob hibna dana eu age saen cecelac bahic sab qee jecebil Pol amagana tawimei maaden, “O dana, age ijana je doubmi wagna Krit nui qee culdi hoummi age ceteteh qee fadaloub.

---

† **27:19:** Cabi ceteteh eu wagna haluna hewen. Eunu wag eu cabi ceteteh macas dunuhna didocob wag eu mahuc qee nuel.

22-24 Euqa qila ija maadigina, witic ensel oso ijana Anut ija binan suligina uqa suldocob ijaca hoia. Odimeí uqa mateian, ‘Pol, cain cucuiagaun! Hina Sisa amegna tawec bahic tawegan. Odocob Anut uqana waug qocna dana cunug wagna hinaca cobogina i cahahaadeceb cebac biluqagan,’ teian. Eunu cisdu cuhadoigale! Agenadec oso qee fadaleiaun, wag himec fadaligian. <sup>25</sup> Dana age cisdu cuhadoiga! Anut mateian odi dih cali hugian eu ija wawi meleena. <sup>26</sup> Euqa ege nui oso uqana lanna ono ehi li heligigian,” aden.

<sup>27</sup> Saen euna witic 14 ege fufu fulugegen Mediterenian macasna cobom. Witic tu gemo eu odi wagna cabi dana agena cisdoc madein lanna cedec muduquna ein. <sup>28</sup> Eunu age halu ceteh culumenca qagec culdegin nocob macas ameg eu 40 mita eu odi fein. Nag odi gieceb haun eu odi odimeig macas ameg eu 30 mita eu odi fein. <sup>29</sup> Odimeig age wag meen tobocdain ec cisdumeig cucuiein. Odimeig anka 4-pela felaculdecebil wag bigna isecdec macas dunuh non. Odimeig mahuc cojagigia bili inondoin. <sup>30</sup> Oodogin wagna cabi dana busaloqaga odoin. Age wag nag macasna hewecebil nocob uhulec eundec anka wag mededec culdecebil nugiannu euna memeig tein. <sup>31</sup> Euqa Pol han dana 100 agena ilo uqana han danaca maaden, “Wagna cabi dana i age wagna qee bilecebilfi ege cunug cahahagecnu ihoc qee,” aden. <sup>32</sup> Odocob han dana age halu wag nag hewecebil tawen eu cagocobil wag nag eu nuen.

<sup>33</sup> Cam mamahon Pol uqa cunug sab jecnu

maaden, “Qila age deel 14 sanijadec bahic sab qee jec bilein. Age ceteḥ oso qee jelein. <sup>34</sup> Eunu ija maadigina sab leih jeiga. Age sab i jimeig cebac biluqagannu. Age dewenegana ceteḥ nag osoha qee fadaleiaun,” aden. <sup>35</sup> Je eu madi hedumei Pol bred leih cedimei Anut inondumei eu age cunug amagana fenimei jecnu sanan men. <sup>36</sup> Odocob age gagadic cisdumeig cunug sab jein. <sup>37</sup> Dana 276 cunugca wag euna tobain. <sup>38</sup> Hibna cunugca odi ihoc jimeig age wag hetec mudecnu wit cedimeig cunugca macasna helecebil non.

### *Wag lanna qocob qatanen*

<sup>39</sup> Cojageceb wagna cabi dana age macas lan fimeig qa lanna hoqa ec qee doloin. Euqa age macas sucun qoc esicca eu fimeig wag euna esic qumeig salali tobigion ec cisdoin. <sup>40</sup> Eunu age anka cagocobil macas dunuh non. Odocob saen euna himec age halu culum qagec eu cufalein. Odimeig lai medena hewegin ten, fufu wag fuludocob medena isec gagadic miigiannu. Odimeig cesawi lanna lein. <sup>41</sup> Euqa wag mede esic qatani ti of qocob maha heweceb tawen. Oodon bigna isec macas gagadic bahic qahimei qonqon qatani susul falen.

<sup>42</sup> Odocob han dana age gihacdoc age agenadec oso cesawi lanna limei busalecdainnu qagaadoqaga bili je madi cagoin. <sup>43</sup> Euqa han dana 100 agena ilo Pol cahahadugia cisdon. Eunu uqa eu odi cain odowainnu cahacaden. Odimeig uqa dana cunug ihoc wa cesawoqagan eundec age aquni wagnadec bitacimeig cesawi lanna loqagannu je gatiti maaden. <sup>44</sup> Odimeig dana

leih wagna culadein age hib wag qatanen fan eundec cedi mugumuga tacimeig cesawi lanna loqagannu maaden. Odocob eu odina ege oso fadalecca qee me himec wa cesawi lanna hom.

## 28

### *Pol uqa Molta nuina bilen*

<sup>1</sup> Saen ege me bahic cesawi hu lanna calimeb ege nui eu ijan Molta egina odi dom. <sup>2</sup> Odocob dana jobon onodec egena wawaga qocob egeca danah mimeb cete h loo igein. Wa hoc sanan memen duancaca hulen eunu age ja hudimeig ja cudun li bilecnu magein. <sup>3</sup> Pol ja sognadec cedime i jana memen man sononec ja ededannu cali humei eben qu ji caculi nijen. <sup>4</sup> Dana jobon nui onodec man sononec Pol ebenna caculen fimeig togodudu madein, "Dana i eu acahna qagaadec dana. Cois, macasnadec busalen qa waug madec eu dana qagaadecnu nijia eunu cam geldocob cal migian," ein. <sup>5</sup> Euqa Pol eben filifilidocob man sononec jana tonen. Odime i uqa man qee qu jecwe tawen. <sup>6</sup> Odocob age Pol eben waluigianfo, qee mahulime i cal migianfo eu feqan imeig sumudein. Euqa hibna saen cecelac sumudi bilimeig cete h eu odi qee caleceb fimeig agena cisdoc ceseleceb madein, "Uqa tibud oso!" ein.

<sup>7</sup> Maha oso cudun i cemenug nijen eu dana uqa nui inadec ilo uqana, uqa ijan Pablios. Uqa ehgi uqana jona leceb deel cijed uqa nijoug nijom. <sup>8</sup> Odocob Pablias memeg cabalna ninijen deweg dain cahuleceb fojecca waug golca nuen. Odocob Pol uqana hamol nagna li inondume i eben ilona

meceb hag medon. <sup>9</sup> Odocob cetez odoc ben odi caleceb fimeig hag dana cunug nuina bilein eu cegulecebil hag me maden. <sup>10</sup> Odocob age ege cetetez wawige ceeligiannu mati bahic igein. Odocob saen ege wagna ceceseloqon wagna nuecnu cetetez igein.

*Pol Rom ono nuen*

<sup>11</sup> Wag qatanec saenna hibna jagel cijed hedocob Aleksandriadez wag ijan, “Tibud Gahca,” nuina ono tatawen duen saen hedocob euna belom. <sup>12</sup> Ege Sairakus taun benna calimeb taun benna ono deel cijed nijom. <sup>13</sup> Onodec haun wagna belimeb Rigiam taun benna calom. Deel osona fufu qahec sanan men fufu saut isec odocob deel lecis dunuhna Putiolai taunna calom. <sup>14</sup> Odimeb ege ono wawaga meleec cotigeil leih ceguladocomun cuha osol eu age gami nijecnu cesusgein. Odocobnu eunadec ege Rom hom. <sup>15</sup> Ege Rom qee calec jic bebeleb wawaga meleec cotigeil age egenu dah mimeig Apiasna Fajec Cudunna odi humeig ege meciguqagannu hoin. Leihha age Loo Dananu Jo Cijed egina euna humeig ege meciguqagannu hoin. Pol meciadimeis Anut hetaga ec je madumeis waug duen.

*Pol Rom dana me je maaden*

<sup>16</sup> Odocob saen ege Rom hu calocomun Pol cuhanuc han dana oso cofdodob nuecnu cois ec madoin.

<sup>17</sup> Deel cijed hedocob Pol Juda dana taun ben dunuh bilein agena iloilo maadeceb cegulein. Saen age cegulecebil uqa maaden, “O cotiel! Ija Juda dana cajacafo, ege jajanigeil agena kobolfo

qee cahuldolom euqa Jerusalem ono gihacdoc jona mitein odocob Rom gabman ebenna sultecibil bilem. <sup>18</sup> Rom age sisiltimeig age ameg oc ija cal mecnu dewenina cahuldoc qee feleinnu gihacdoc jonadec besituqaga odoin. <sup>19</sup> Saen Juda dana je eunu cois qee ecebil Sisa amegna je haun madecnu sisilemqa ija ijana dana cajacanu um qoc je oso madecwe qee. <sup>20</sup> Eu odinu ija Isrel dana cajaca agena gaunanaga mamani sumudi bilegina eunu bahic sen i dewenina ninijen biliga. Gug eunu ija age meciadecemin je i togodocnu niniadiga,” aden.

<sup>21</sup> Odocob eu age uqa madoin, “Ege Judiadec hinanu jaqec je oso qee olom. Cotigeil onodec hoc ha hinanu je me qee oso qee ahu magelein. <sup>22</sup> Euqa ege hatu cunugna dana am i hina eundecnu cahuldogina ec madegina eu doqona. Eunu ege hinana cisdoc madecem docnu wawige nijia,” doin.

<sup>23</sup> Eunu age Pol gami cegulecnu jagel deel oso gadac mein. Odocob dana am ben bahic Pol ono bibilen cegulein. Qasildec je maaadi Anutna Me Culnu sildiaaden witic men. Uqa Mosesna loo jeca je hahun madec dana agena jeca alenadec Jisasnu sildiaadi wawaga meleigiannu temduduen. <sup>24</sup> Odocob leih age uqana jenu wawaga meleen qa leih age eunu wawaga qee meleel. <sup>25</sup> Eunu age agedodoc cois qee eeig buadein qa age qee buadec Pol je osol i maaden, “Kis Gun je hahun madec dana Aisaia cona age jajanagail je maaden eu mele! <sup>26-27</sup> Uqa odi maden:



‘Dana cajaca i age ilohonoga cisdocnu eu cal mec  
bahic.

Age dahiniga cufa qoin.

Odocob age amaga amusein.

Eunu nuimeg dana cajaca i age odi maadaga,

“Age dah moqagan qa qee dowain.

Age foqagan qa wawaga qee fogo doiaun,”  
adaga.

Qeefami age amagana fimeig fogo adoub,

age dahinigana dah mimeig doub,

age wawaga fogo doub.

Odocob age ijaca falicdocobil me madoum,’ en,”  
aden.

*(Aisaia 6.9-10)*

<sup>28-29</sup> “Eunu age doigale. Anutna cahahaadecnu  
me je eu Juda dana qee eundec agenu suldocob  
nuen. Eu age dah moqagan!” aden. [Odocob  
Pol je i madi hedocob Juda dana buadein. Age  
gemanaganu agedodoc fee dadanii belein.]

<sup>30</sup> Odocob cabi gel lecis Pol uqa ono bilen\*  
eu jo uqadodoc deel abesabes fafaji biloloi.  
Odocob cunug fecidoqagannu holoig eu alala-  
gadoloi. <sup>31</sup> Uqa Anutna Me Culnu je maadoloi.  
Odimeit Tibud Jisas Kraisnu iwaladoloi. Uqa oso  
cahacdocnu qee nijel qa uqa je saluqi u maadoloi.

---

\* **28:30:** Luk uqa cabi gel lecis i hedocob eeta Polca calen eunu  
qee madel. Dana leih Rom age Pol gihacdocnadec culdocob uqa  
Spen hatu ono nuimeit me je qasali maaden ec cisdoim. Euqa dana  
leih Rom age Pol qocobil cal men ec cisdoim.

**BAL CEHEC JE HAUN**  
**Genesis and the New Testament in the Amele**  
**language of Papua New Guinea**  
**Buk Stat na Nupela Testamen long tokples Amele long**  
**Niugini**

copyright © 1997 Wycliffe Bible Translators, Inc.

Language: Amele

Contributor: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

1997-01-01

---

PDF generated using Haiola and XeLaTeX on 11 Nov 2022 from source files dated 9 Oct 2020

efcfe8ba-c483-58bb-922c-05455e0b9491